

NZAMBI YA NSUNGI

YAYI YA YIMBI



[Mpangi Orman Neville me tuba:]

[Nsangu yayi, na manima ya kusala kisalu ya lukutakanu ya kimvuka ya conseil ya ba-Diakre mpe Conseil ya ba-Administrateur ya Tabernacle ya Kilumbu ya tanu na nkokila, beto ke tanga balukanu yayi yina ke tala bakala nyonso, kento nyonso, yina me ndimaka na kulanda ministere yayi, yina zola kuzaba dibanza ya Conseil, ya Pasteur, mpe Pasteur ya Kilandi, mu ke tanga balukanu yayi na suka yayi. Muntu nyonso fwana vwanda na luzitu mpe fwana sala bukebi na yawu mutindu beno lenda.]

[BALUKANU YAYI KUSALAMAKA MPE LUTAKA NA CONSEIL YA BA-ADMINISTRATEUR, MPE BA-DIACRE NA NGWISANI YA MUVIMBA NA PASTEUR MPE PASTEUR YA KILANDI.]

[I: Ba-bande nyonso ya Révérend William Branham fwana salama na Fred Sothmann kaka, tii kuna Conseil ba ke baka lukanu na ntuala. Beto ke ndima ve na ntangu yayi Ministere ya Bande ya Mpamba. Ba-bande yayi me pesama na ngwisani, mpe ba lenda ve kubasisa yawu diaka ata na muntu mosi ve kasi kaka Fred Sothmann kukondwa muswa ya yandi yina me sonama.]

[II: Muntu mosi ve ke sala balukutakanu, ke tekisa babuku to ba-bande, ke sonika ba-tract, ke kabula bitenda ya bisambu to bakalati ya konso mutindu yina, to ntalu ya makabu mosi, ba me zaba yawu ve na dibuundu yayi to pasteur ya yandi. Ba ke na kusalaka yayi na dibanza ya yimbi, mpe ba me pesa bawu ve muswa ya kusala yawu.]

[III: Dibuundu yayi ke fidisa ve milongi yankaka na ngaanda ya pasteur ya yandi, Révérend William Branham, samu na kusala bisalu na bisika yankaka.]

[Balukanu yayi me bakama samu na yayi:]

[Ba me zabisa beto ti milongi ke na kutambulaka na bayinsi na kukotaka na bimvuka yankaka, na kutubaka ti bawu kele ya kuvukana na dibuundu yayi, mpe ba me tinda bawu na dibuundu yayi samu na kusala balukutakanu yayi.]

[Ba me zabisa dyaka na beto ti bantu ke na kubasisaka bakalati mpe ba-tract, na kufidisaka bitende ya bisambu mpe nyonso yankaka. mutindu ti bawu wandaka ya

kutumama na kusala mutindu yina na nzila ya dibuundu yayi mpe Pasteur ya yandi, yina kele ve kieleka. Ya ke vwanda mbote ti kana beno ke zabisa na dibuundu muntu nyonso yina ba me kuzwa ke na kusala yayi.]

[Ba me tanga balukanu yayi mpe ba me siamisa yawu na Pasteur, Révérend William Branham, Pasteur ya kilandi, Révérend Orman Neville, mpe Administrateur mpe Conseil ya ba-Diacre.]

[“Ti Mfumu kusakumuna beno.”—Mu.]

[Na lukutakanu ya nkokila, na mvula 65-0801E, Mpangi Branham me tuba mutindu conseil ya dibuundu me baka balukanu yayi. Kisika ya mpamba na bande.]

. . . mambu ke salama, kwikila kaka;
Kwikila kaka, kwikila kaka,
Mambu nionso ke salama, kaka . . .

Beto kulumusa bayintu ya beto.

Tata ya Mazulu ya luzolo, beto ke vutula matondo na suka yayi ti beto lenda kwikila. yina lendaka salama na nzila ya Menga yina tiamukaka ya Mwana ya Nge, Yezu, ti beto ke vwanda bayina ke kabula kintwadi lemvo ya Yandi; mpe kumaka bana-babakala mpe bana-bakento ya Nzambi, na nzila ya kutumama ya Yandi na lufwa na kulunsi, ke vwanda ya kunungisama na kukwikilaka na Yandi mpe mvumbukulu ya Yandi, mpe ntangu yayi Mpeve-Santu me tiamuka na kati ya bantima ya beto.

² Beto ke vutula matondo samu na ntangu ya mbote yayi na kukwisa awa na suka yayi samu na kukabula mabanza ya beto mpe kusambila ya beto, banzonzolo na nzila ya bankunga, bimbangi, na kutangaka Psaumes, na kutangaka Ndinga ya Nge, mpe ke na kuvingila kieleka na zulu ya Mpeve-Santu samu na kuvulusa beto Nsangu yina ba soolaka samu na ngunga yayi. Pesa yawu, Mfumu. Ti beto kuzwa ndandu ya mbote na kuvwandaka awa bubu yayi. Mpe ntangu beto ke katuka na kivinga, bika ti beto tuba mutindu bayina katukaka na Emmaüs, “Bantima ya beto vwandaka pela ve na kati ya beto na yina Yandi vwandaka zonga na beto na suka yayi?” Pesa bima yayi, Nzambi ya Seko, na Nkumbu ya Yesu Klisto. Amen.

Beno vwanda.

³ Mbote, bankundi ya munu, awa, awa na tabernacle mpe na bankundi ya beto bisika nyonso na yinsi, nzila nyonso katuka Simu ya Wesete, dyaka na suka yayi, na Simu ya Esete, mpe node mpe sude, na bansinga ya allo-allo.

⁴ Ya kele kilumbu ya mbote awa na Indiana, ya mwa matuti fioti, ya madidi, ya kitoko mingi. Tabernacle kele ya kifuluka, tii na bibaka mpe pene-pene ya bibaka. Beto ke na kuvingila ya nene samu Mfumu kukwisa kutala beto bubu yayi. Mpe beto

ke na kivuvu ti Nzambi me pesa beno kilumbu ya mbote kisika nyonso beno kele. Mpe ya kele kilumbu ya mbote, samu ti Mfumu me pesa yawu. Ata ti wapi mutindu atimosifere kele, ya kele kilumbu ya mbote. Beto kele na kyese na kuvwanda awa, na kyese dyaka ti beto kele na bweso ya kutuba na yinza lukwikilu ya beto na Yesu Klisto. Mpe beto zola kubaka konso ntangu ya mbote yina beto lenda pesa banzonzolo ya zola ya Yandi mpe yina Yandi salaka samu na beto. Bubuyayi beto kele. . .

⁵ Ba pesaka munu, na mwa ntangu fioti me luta, luzabusu mosi samu na kusala, mpe na manima mu kele na mwa bima awa yina mu ke zola kutuba. Mpe mosi ya bawu, luzabusu kupesamaka na munu na yina me tala lukutakanu ya conseil na nkokila yankaka yina. Mpe ya kele na diacre mosi ya dibuundu yina ke zinga kuna na Arizona, yina kele Mpangi Collins, mpangi ya beto ya bakala ya lukumu. Mpe na ntangu yandi ke kwenda, bawu, conseil, me tula Mpangi Charlie Cox na kubaka kisika ya yandi na ntangu yandi ke kwenda. Mpe Mpangi Charlie Cox kele ya kubyadisa pwelele na nzila ya administrateur. . . to conseil ya badiacre ya dibuundu yayi, samu na kubaka kusalu ya Mpangi Collins, na ntangu yandi kele ntama na beno.

⁶ Mpe kima mu zola kutuba, dyaka, mu zola kutonda beno nyonso bantu, mpamba ve ti bayankaka ya beno lendaka kwenda na yinzo ntete lukutakanu ya kubeluka ya nzutu na nkokila yayi, samu na mwa makabu ya mbote, bidimbu. Ba me natina beto madia mingi kubanda beto kele awa. Mpe na kento ya munu mpe munu, mpe dibuta ya munu, kieleka beto ke sepela na yawu. Bantangu yankaka mu ke zimbanaka na kutuba kima mosi samu na yawu. Ya kele na bisalu mingi, beno zaba. Mabanza ya munu kele na kati ya kitembo ya mutindu yina ntangu nionso. Beno lenda banza yina ya kele, ya bantu, kaka awa ve na dibuundu yayi, kasi na yinza ya muvimba. Beno me mona? Mpe ya ke kangaka munu na kati ya kitembo ya ntangu nionso.

⁷ Muntu mosi vwandaka tuba samu na lusakumunu ya babébé, mpe balukutakanu ya mbotika, mpe nionso yina. Ya kele mbote mingi. Mu zolaka kaka kusala yawu, kasi ya kele mpasi mingi, mu—mu kele ve na ntangu. Mu fwana kukeba mabanza ya munu na zulu ya yayi, Nsangu yayi. Beno zaba ti Biblia ke tuba na bantumwa, to. . . Bantumwa, na kisika, na kati ya Biblia, ke tuba, “Beno kwenda, beno tala beno mosi, na kati-kati ya beno, bantu ya nsangu ya mbote, mpe ya kusungama mpe ya kifuluka na Mpeve-Santu, samu ti bawu fwana banzaka na bamambu yayi.” Mpe mu tubaka na Billy. . .

Yandi tubaka, “Nge ke sakumuna bébé yayi ntangu yayi, papa?”

Mu tubaka, “Oh, la la!” Beno me mona? Kana. . . Beto kele na mingi ya bawu yina ke na kuingila ba sakumuna beto, mpe ya kele kieleka, Mu fwana vutuka kaka mpe kubaka kilumbu mosi

ya mutindu yankaka samu na mbiekolo ya ba-bébé. Na yina mu ke zola kusala yawu, ntangu yayi.

⁸ Kasi beto zola kutonda mosi na mosi ya beno me katuka na bantima ya beto; kento ya beto, munu, mpe dibuta ya beto. Bantu ke natinaka beto madia ya babwati, madesu ya mpembe ya mubisu, ba-pasthèque, ba-cantaloup, oh, ba-fraise. Ba ke natina beto nyonso yina ba lendaka nata.

⁹ Mpangi ya bakala ya ntalu mpe mpangi ya yandi ya kento, kilumbu yina, me natila beto kinkuku ya nene mingi. Mu ke na kudia yawu diaka. Mpe na yawu kaka . . . Oh, mpe mu fwana sukula yawu na ntuala mu kwenda, mu banza. Na yawu kana ve, yandi ke baka kaka yawu na beto. Mpe na yawu—na yawu beto ke . . . Kieleka beto me sepela na bima yayi. Mu zaba bantu mingi; bayankaka na kati ya bawu mu zaba ve. Ba ke vwanda na velanda ntangu beto ke kota. Mpe na yawu kieleka mu me sepela na yawu.

Mpe mingi mu zaba. Mu me . . . Mu me monaka mingi, mpe ya kele na mingi yina mu ke monaka ve. Mu—mu ke kwikila ti muntu nyonso ke bakula ti mu—mu ke zola kukuma na muntu nyonso kana mu lunga, kasi mu kele kaka mosi. Beno me mona? Na . . . Mu lenda ve kukuma na muntu nyonso. Mu ke na kusalaka nyonso mu zaba mutindu ya kusala yawu.

¹⁰ Na yawu, Nzambi kuvwanda na beno. Mu ke kwikila ti ya kele na Mosi yina ke vwanda na beno; ya kele Yesu Klisto, mpe Yandi lenda vwanda. Yandi kele kaka Muntu yina kele bisika nionso. Mpe Yandi kele mpe yina kele na ngolo nionso, na yina Yandi lunga pesa bansatu nionso. Mpe, yina zaba nionso, mpe zaba bansatu ya beno, yina beno ke na yawu nsatu.

¹¹ Mu ke pesa muswa na muntu nyonso ti mu zola ve . . . Mu me baka kaka mbangu mutindu mu lunga, ata ti mu me vwanda awa na suka yayi, mpe mu ke kuzwa muntu nyonso yina mu lunga. Mpe kana . . . Yina mu ke kondwa, Nzambi ya ngolo nyonso ke—ke pesa bansatu nyonso ya beno landila bimvwama ya Yandi na Nkembo.

¹² (Mu lenda tanga yawu mbote mingi ve. Beno zola kutanga yawu?) Ya kele luzabusu mosi ya mutindu yankaka. Mpe mu banza ti Billy Paul fwana sonika yawu. Na yawu yandi kele mutindu munu; mu lunga tanga ve bisono ya munu mosi. Mpe na yawu mu kele na diboko ya kibakala nyonso ya munu mosi. Mpe kana beno mona mwa masonuku ya munu awa, yina ba sonikaka awa, beno banza ti beno ke bakula yawu? Mu ke zolaka mbwetete mosi, na kusabuka kiamvu mosi, mpe nionso yina, kaka nionso . . .

[Mpangi Neville ke na kutangaka, “Tuba na Mpangi Adair na Arkansas samu na kumona Mpangi Pearry Green na nswalu-nswalu ya dibuundu.”—Mu.] Mpangi Adair, Adair ya Arkansas,

samu na kumona Révérend Curry Green na manima ya yinzo-Nzambi na nswalu nionso. Mbote mingi.

¹³ Ntangu yayi, na yawu kima yankaka yina mu ke—ke zola kuzabisa awa kele—kele ti, na nkokila yayi ntangu yayi samu na balukutakanu ya kubeluka ya nzutu. Beto ke sambila samu na bambevo na nkokila yayi, mpe na yina mu—mu ke na kivuvu ti beno ke vwanda awa.

¹⁴ Mpe beto ke fidisa ba—mbote na bantu nyonso na yinsi ya muvimba, na Nkumbu ya Mfumu Yesu, ti Nzambi ke sakumuna nge na suka yayi. Ndambu ya beno kele kuna na kutala na ngunga ya midi. Kuna na New York, ya kele pene ya midi. Mpe kuna na Arizona, na Simu ya Wesete, ya kele kaka pene ya ngunga sambwadi. Na yawu ya kele. . . Mpe awa beto kele kaka na kati-kati. Na yawu Nzambi sakumuna beno na yina beno ke kuwa. Ntangu yayi yayi lendaka vwanda. . .

Mu me kuzwa yawu na ntima ya munu, na ntangu mu vwandaka awa. . .

¹⁵ Mpe ba pesaka bawu ve muswa na kuzwa bivinga ya nene, mpe na nsuka ba me pesa beto muswa; beto lendaka kuzwa lukutakanu mosi, kasi beto lendaka sambila ve samu na bambevo. Mu—mu ve. . . Yina kele ministele ya munu. Mu fwana kusala yina Mpeve-Santu me tuba na munu na kusala. Na yawu mu—mu mangaka yawu, samu ti mu zola kuvwanda na kimpwanza ya kusala nyonso yina Mpeve-Santu me tuba na kusala. Beno me mona? Na yawu mu banzaka ti beto lenda kaka kutala mpasi kilumbu mosi dyaka, na mutindu nyonso, na tabernacle. Mpe ya kele madidi na suka yayi. Mfumu me sala kaka kilumbu mosi ya mbote samu na beto awa, na yawu beto ke vutula matondo.

¹⁶ Ntangu yayi, na kusalaka yayi, mu me kwiza awa samu na lukanu ya kulonga Bambungu Sambwadi ya nsuka, Bambungu Sambwadi ya nsuka, mpe Bampungu Sambwadi ya nsuka, mpe Banzasi Sambwadi ya nsuka, ya Buku ya Apocalypse, na kusalaka kipiku na bawu kintwadi na ngunga yayi beto ke na kuzinga ntangu yayi; samu na kulanda kuzibuka ya Bidimbu Sambwadi, Bansungi Sambwadi ya Dibuundu. Na yina, beto lendaka ve kuzwa kivinga ya kusala yawu. Na yawu mu—mu banza ti, ntangu mu lunga, beto ke. . . lunga kuzwa kisika ya kulunga samu na yawu, to awa to na Louisville, na New Albany, to kutula tenta mosi, na yina beto lenda vwanda ntangu nyonso mutindu Mfumu ke twadisa beto na kusala.

¹⁷ Kasi na yayi ntangu yayi, mu me kuzwa ntangu ya mbote yayi ya kuzonza na bantu kundima ya munu mpe lukwikilu na Nzambi, mpe na manima na kunataka beno na ngunga yina beto ke na kuzinga. Mpe na yayi, ya kele ve ya kusoola na muntu mosi, ba-credo, nyonso yina ya lendaka vwanda; ya kele kaka mutindu mu ke mona Ndinga ya Nzambi. Mpe Lumingu me luta

beto vwandaka me kuzwa kutiamuka ya kitoko mingi ya Mpeve na zulu ya Ndinga. Ya vwandaka yinda mingi, mpe mu zolaka ve ti ya vwanda yinda mingi; kasi dyaka beto zaba ve wapi ntangu yina beto ke kutana samu na ntangu ya beto ya nsuka. Mpe beto fwana, mutindu. . . zola kuvwanda. Mu zola kuvwanda, na kisika, mutindu Paul tubaka na ntama, “Mu me bumba ve na kuzabisa na beno Konseye nyonso ya Nzambi.” Yesu tubaka ti Yandi bumbaka kima mosi ve na bilandi ya Yandi.

Mpe mutindu munu, na bisalu mingi na kumekaka na kuvwanda na yisi ya kupakulama ya Mpeve-Santu, samu na kutala yinki ngunga yayi, Nsangu ya ngunga kele, mu bantangu yankaka ke kondwaka na kubasika mpe kusala bisalu ya munu mutindu kisadi ya Klisto, mutindu mulongi. Kasi mu kele na babakala mingi yina ke mekaka na kusadisa munu na kusala yayi, na yina mu ke vutula matondo samu na yawu, bampangi ya munu nyonso ya ministele.

¹⁸ Ntangu yayi, mu zola ve kumeka na kukanga bantu. Kana beno, kuna na yinsi kisika Nsangu ke kwenda, beno lenda telama mpe kutala bisika nyonso na dibuundu yayi na suka yayi, na kati ya bakulwale, na ba-nurserie, na ngaanda, bisika yina ba me zibula ba-radio, na ba-bisi, ba-caravane, mpe nyonso, mpe batomabilu, beno ke mona yina kele dyambu. Mpe na manima konso lukutakanu, mingi, bantu mingi vwandaka nata ditoma; mpe vwandaka bokila, mpe nyonso yina, bawu zolaka kota ve to kubaluka. Mpe beto kele na nsatu ya bisika mingi samu bantu kuvwanda mpe kuvwanda mbote.

Mpe na manima kunata Nsangu yina mu banza kele ya kulutula mfunu mingi, Mu ke tala ti beto fwana, mosi na mosi, kuvwanda mbote mpe kuvwanda, mpe na yawu beto lunga kuwa; na bilapi ya beto mpe papié, mpe banoti mpe Biblia, mpe nyonso yina, samu na kubaka banoti. Kasi mutindu yayi mu banzaka ti mu ke vutuka na ntangu yina beto ke kuzwa, beto ke na kuzingaka, mpe kumeka na kunataka mwa bima yayi yina beno ke kutana. Mpe beno ke vwanda na nsatu ya yawu.

¹⁹ Kana mu kwiza awa bubu yayi, to kilumbu mosi yankaka yina, to mulongi mosi yankaka, samu na kumeka kunata nsangu na bantu, bantu yina ke na kufwa mutindu beto kele, mpe ntangu me belama mingi, mutindu mu ke kwikila samu na kilumbu yayi; Mu ke vwanda muntu ya luvunu na kumeka kunata kima yina mu zaba ti beno ke sepela na yawu mpe ya ke telemina Ndinga ya Nzambi, to kima mosi samu na kubenda nkonga ya bantu, to—to kima mosi ya mutindu yina; Mu—mu ke vwanda ve . . . Mu ke vwanda ve yina mu—mu kele awa samu na kuvwanda, longi ya Klisto. Mu zola kunata kima mosi yina mu banza kele mfunu mingi samu na beno, ve kaka samu na kumonana; kasi kubanza ti ya kele kima yina kana mu kufwa bubu yayi, mbasi ya ke vwanda ya kukangama na kati ya ntima ya beno samu na kulandila mpe kusadila Nzambi.

²⁰ Ntangu yayi mu zola tuba ti kima mosi ke na kukubamaka kaka na kusalama. Mu zaba yawu. Mingi ya beno awa ke bambuka moyo ntangu Mpangi Junior Jackson kwizaka na munu mwa fyoti ntete yandi kwenda na Arizona, ya ndosi yina yandi kuzwaka. Kima ya ngitukulu! Bantu yikwa ke bambuka moyo na yawu? [Dibuundu me tuba, “Amen.”—Mu.] Mpe Mfumu pesaka beto ntendulu, mpe yawu salamaka na mukanda. Ntangu yayi, yandi me kuzwa kaka ndosi yankaka, kima mosi.

²¹ Mpe kima ya ngitukulu, bakala mosi vwandaka awa kilumbu yina, kubanda Oregon. Na mpasi beno zaba munu, mpe vwandaka. . . lotaka ndosi mosi yina, ti Junior Jackson lotaka, mpe—mpe kwisaka zonza na munu. Mu—mu zaba ve ntendulu; mu ke na kuvingila na Mfumu. Kasi mu zaba ti ya ke vwanda kima mosi me katuka na Nzambi. Beno bambuka kaka moyo na yawu. Ya kele MUTINDU ME TUBA MFUMU. Ya kele kima yina ke basika na Nzambi. Mu zaba ve yinki ya kele. Kieleka ya ke na kubulaka, kieleka ya ke na kubulaka! Ya kieleka, landila bandosi yina bantu zole. . . Mosi ya bawu mu. . . yandi lendaka vwanza Baptiste, Presbytérien. Yandi—yandi lendaka vwanda ya kuvwanda awa na suka yayi. Mu zaba ve. Yandi vwanza awa kilumbu yina. Mu zaba bakala yayi ve.

²² Kasi yandi tubaka na ndosi, na masa ya meso na meso ya yandi. Mpe yawu ningisaka yandi. Yandi me katuka nzila nyonso katuka Oregon awa, samu na kutuba yawu. Mpangi Jackson me kwiza mutindu, na suka yayi. Muntu mosi na kuzabaka ve yankaka; mosi, na mafunda ya ba-kilometre ntama na yankaka, mpe nyonso zole bandosi kaka na bukielaka nyonso na kima mosi. Na yawu Mpeve-Santu ke bumba ntendulu ya yawu na munu. Mu zaba ve yinki kutuba na muntu yayi. Kasi mu zaba ti Nzambi ke zola kusala kima mosi, mpe ya ke vwanda nkembo na meso ya beto.

²³ Ntangu yayi, Nsangu na suka yayi, mu zola kutanga na Buku ya ba-Galate. Mu ke longaka ve to kaka. . . Ya kele lesu ya lukolo ya Lumingu. Mpe ntangu yayi, beno babakala mpe bakento yina kele ya kutelama na lweka ya bibaka, mpe muntu mosi zola kubika mpe bika ti beno vwanda ya kuvwanda na mwa ntangu mosi, to kima mosi, ntangu yayi, beno ke kwamisa munu ve; beno vwanza kaka na luzitu nyonso. Mpe kana bamama, yina mwa bana ya bawu ke dila to kima mosi, muntu mosi ke zola basika na kivinga ya ba-bébé samu bawu kuzwa kisika samu na mwana yayi ya fioti.

²⁴ Mpe ntangu yayi beno baka kilapi ya beno, Biblia, mpe beno kubama samu na kubaka mwa Masonuku yina beto ke tanga. Mu zola ve ti beno kuvwanda ya kukangama na yisi. Mu zola ti beno kuwa—mu zola ti beno vwanda na kimpwanza ya kuvwanda mpe kulunguka. Mpe beno lendaka wisana ve, yina kele mbote mingi. Kasi mu ke tuba kaka yayi na yinsi ya muvimba na suka yayi, samu ti bantu yina ke kwikilaka Nsangu yina Mfumu Yesu

me pesa munu samu na ngunga yayi, ya lendaka zaba yina ke na kusalama, mpe kutula yawu na Masonuku.

²⁵ Lumingu me luta beto zonzilaka na *Bapakulami Na Kilumbu ya Nsuka*. Mpe kana beno, mosi ya beno, kele bayina ke kuwa bande, beno kuzwa kieleka bande yina. Ve ti beto zola kutekisa ba-bande; yina kele dibanza ve. Ya kele dibanza ya kubasisa Nsangu. Beno me mona? Beno me mona? Kana beno kele na masini ya bande, beno vukisa bantu kintwadi, mpe beno bula yawu, mpe beno kuwa mbote. “Bapakulami.”

²⁶ Beno ke kuwa bantu kutelama mpe kutuba, “Oh, Biblia ke tuba, ‘Bilumbu ya nsuka, baprofete ya luvunu ke telama mpe ke sala bidimbu yayi.’” Ya kele kieleka Masonuku. Na yina wapi kisika yina ke tulama? Ba fwana tula yawu mbote.

Na nkokila yayi mu zola kuzonzila, kana Mfumu zola, na: *Nzambi Me Monisama Na Kati ya Ndinga ya Yandi Mosi*, wapi mutindu ba lendaka tula disu ve kisika ba fwana tula dikutu. Beno me mona? Kaka mutindu ba me sonika Biblia ya muvimba, mpe, na kati ya Biblia ya muvimba, ya me tanguna Yesu Klisto. Na yawu mu zola kuzonzila na yawu na nkokila yayi, kana Mfumu zola. Mpe ntangu yayi, kana ve, kilumbu mosi na manima.

²⁷ Ntangu yayi na Buku ya ba-Galate. Mpe na Buku ya Zole ya Corinthiens 4:1 tii 6, kuna Galates 1:1 tii na 4, mu zola kutanga mwa Masonuku. Ntangu yayi na Galates 1:1 tii na 4, “Paul, ntumwa,” beno tala mbote kisika ya kusutopé kaka na nswalu. *Ntumwa* zola kutuba “muntu yina ba me fidisa,” to, “missionaire.”

Paul, ntumwa, (ve ya bantu, to ve na nzila ya muntu, kasi. . . Yesu Klisto, mpe Nzambi Tata, yina vumbulaka yandi na lufwa;)

Mpe bampangi nyonso yina kele na munu, na mabuundu ya Galilée:

Lemvo kuvwanda na beno mpe ngemba na Nzambi Tata ya beto, mpe na Mfumu Yesu Klisto,

Yandi yina kukipesaka yandi mosi samu na masumu ya beto, ti yandi lendaka vulusa beto na yinza yayi ya yimbi, landila luzolo ya Nzambi. . . Tata ya beto:

Na yandi yina kuvwanda nkembo mvula na mvula. Amen.

²⁸ Ntangu yayi na Buku ya Zole ya Corinthiens, kapu 4, mpe beto ke tanga kubanda 1 tii na 6, banzila.

Na yina na kumonaka ti beto me kuzwa ministele yayi, na yina beto me kuzwa kyadi, beto ke zimbisa ve kivuvu;

Kasi beto me yambula bima ya nsoni yina ke salamaka na kinsweki, beto kele ve na nkadulu ya yimbi, beto

ke balula ve ndinga ya Nzambi; kasi na kumonisama kieleka beto kukipesa beto mosi na konsiansi ya muntu nyonso na meso ya Nzambi.

Kasi kana nsangu ya mbote ya beto kele ya kubumbama, ya kele ya kubumbama na bawu yina kele ya kuzimbana:

Kana yina ke nata ve na nsodolo ya ntete, mu zaba ve yina ya ke salaka.

Na kati ya yandi nzambi ya yinza yayi me kufwa meso ya mabanza ya bayina ke kwikilaka ve, na boma ti nsemu ya nsangu ya mbote ya nkembo ya Klisto, yina kele kifwanusu ya Nzambi, ke lezima na bawu.

Mutindu mosi ya vwandaka na disamba ya Eden, “Yandi basisaka bawu, na boma ti bawu simba Yinti yango.”

Samu beto ke longaka ve beto mosi, kasi Klisto Yesu Mfumu; . . . beto mosi bisadi ya nge samu na Klisto.

Samu ti Nzambi, yina tumaka nsemu na kulezima na mpimpa, me lezima na bantima ya beto, mpe me pesa nsemu ya luzabu ya nkembo ya Nzambi na kizizi ya Yesu Klisto.

²⁹ Amen! Na yawu beno tanga Ndinga! Ntangu yayi, dilongi ya munu na suka yayi, kele: *Nzambi Ya Nsungi Yayi ya Yimbi*. Mutindu beto me tanga na Masonuku, “nzambi ya yinza yayi, nsungi yayi ya yimbi.” Ntangu yayi, Nsangu yayi ke talisa bampeve ya yimbi ya nsungi yayi ya yimbi, mpe ya ke na kufwanakana na profesi samu na nsungi yayi ya yimbi.

Mpe ya kele kundima ya munu ti konso . . . ti Biblia kele na mvutu samu na konso nsungi, yimeni ya kusonama na kati ya Biblia, samu mukwikidi ya nsungi yina. Mu ke kwikila ti nyonso yina kele na beto nsatu kele ya kusonama kaka *Awa*, kele kaka na nsatu ya vwanda ba tendulaka na nzila ya Mpeve-Santu. Mu ke kwikila ve ti muntu nyonso na zulu ya ntoto kele na muswa ya kutula ntendulu ya yandi mosi na Ndinga. Nzambi kele na nsatu ya ntutu ve samu na kutendula Ndinga ya Yandi. Yandi kele mutendudi ya Yandi Mosi. Yandi tubaka ti Yandi ke sala yawu, mpe Yandi ke sala yawu.

³⁰ Mutindu mu tubaka yawu bambala mingi. Yandi tubaka, “Mwense mosi ke kuzwa kivumu,” Yandi zonzaka yawu na nzila ya bikoba ya profete, mpe yandi salaka yawu. Muntu ve lenda tendula yawu. Na mbandukulu, Yandi tubaka, “Ti nsemu kuvwanda,” mpe ya vwandaka. Muntu ve lenda tendula Yawu. Yandi tubaka, “Na bilumbu ya nsuka, Yandi ke tiamuna Mpeve ya Yandi na zulu ya bantu nionso,” mpe Yandi salaka yawu. Beno vwanda na nsatu ya kutendula Yawu ve. Yandi tubaka, “Na bilumbu ya nsuka, bima yayi” (yina beto ke mona kusalama

ntangu yayi) “ke vwanda awa.” Yawu ke na nsatu ya ntendulu mosi ve. Ba me tendulaka Yawu yimeni. Beno me mona?

³¹ Ntangu yayi, beno tala mbote ntangu yayi na yina beto ke longuka Ndinga. *Nzambi Ya Nsungi Yayi ya Yimbi*, ti beto ke na kuzinga ntangu yayi. Ya lendaka monana kima mosi kieleka ya ke yitukisa, na nsungi yayi ya lemvo, ntangu, “Nzambi ke na kubakaka bantu samu na zola ya Nkumbu ya Yandi,” ya kele Kento ya Yandi ya makwela, na nsungi yayi ya yimbi yina ba zolaka bokila nsungi ya dyabulu. Nsungi ya kieleka yina “Nzambi ke bokila bantu samu na zola ya Nkumbu ya Yandi,” na lemvo, kuna, mpe ba ke bokila bawu nsungi ya yimbi. Ntangu yayi, beto ke siamisa na nzila ya Biblia ti yayi kele nsungi yina Yandi vwandaka zonzila. Kima mosi ya ngitukulu mingi na kubanza ti, ti na nsungi ya yimbi mutindu yayi, ti Nzambi na manima ke bokila Kento ya Yandi ya makwela.

³² Beno tala, Yandi tubaka, “bantu,” ve “dibuundu.” Samu na yinki? Kasi, ba ke bokila Yawu Dibuundu, kasi Yandi ke bokila “bantu.” Ntangu yayi, dibuundu kele kuvukana ya bantu mingi ya mutindu na mutindu nyonso. Kasi Nzambi ke na kubokilaka mosi awa. . . Yandi tubaka ve, “Mu ke bokila ba-Methodiste, ba-Baptiste, ba-Pentecotiste.” Yandi tubaka ti Yandi ke bokila bantu. Samu na yinki? Nkumbu ya Yandi. Beno me mona, bantu; mosi ya ba-Methodiste, mosi ya ba-Baptiste, mosi na ba-Luthérien, mosi na ba-Catholique. Beno me mona?

Kasi Yandi ke na kubokila, kimvuka ya dibuundu ve, kasi “bantu samu na Nkumbu ya Yandi,” yina me kuzwa Nkumbu ya Yandi, yina me kuzwa nsilulu ya makwela na Nkumbu ya Yandi, na kukwendaka na makwela na kuvwanda ya kukwelana na Yandi, samu na kukuma kitini ya Yandi, beno me mona, na nzila ya nsodolo ya ntete. Kaka mutindu bakala yina soolaka kento ya kieleka na luzingu, ba tumaka yandi na kuvwanda kitini ya nzutu ya yandi. Na yawu, ya kele, Kento ya makwela ya Klisto ke vwanda, mpe ya kele ntangu yayi, kubanda ntama, ya kukubika na Nzambi na kuvwanda kitini ya Nzutu yango. Beno me mona? Oh, Masonuku kele ya kulutula mvwama mingi, ya kifuluka na mafuta ya niosi!

³³ Beno tala, ve yina muntu mosi me tuba, yina muntu mosi bokilaka; kasi yina Nzambi soolaka ntete mbandukulu ya yinza, mpe ba ke bokila bantu yayi na bilumbu ya nsuka; organisation ve. “Bantu samu na Nkumbu ya Yandi.” Mpe nsungi yayi ya yimbi kele ntangu Yandi ke na kusalaka yawu, nsungi kaka yayi ya kuvuna.

³⁴ Sabala me luta, na Matthieu 24, ya vwandaka nsungi ya ba nkadulu ya luvunu mingi ya bansungi nyonso. Bansungi nyonso ya ba nkadulu ya luvunu, katuka disamba ya Eden, nzila nyonso kuna, ya me vwandaka ntete ve na nsungi na mutindu ya ba nkadulu ya luvunu mutindu nsungi yayi. “Baprofete ya luvunu

ke telama mpe ke lakisa bidimbu mpe mambu ya ngitukulu, kana ya lendaka salama samu na kuvuna bantu ya kieleka ya Kusolama.” Beno me mona? Ntangu yayi, kaka mabuundu ya madidi, ya landila misiku, ya ngolo ya kulutila, mpe nyonso yina, ya théologie yina muntu me sala, yina zolaka ve; Musolami ke sala bukebi na yawu ata fioti ve. Kasi ya kele kuna na zulu na kutala mutindu kima mosi ya kieleka. Beno bika kaka Ndinga mosi kele kaka yina beno fwana sala. Nsilulu ya nsungi; kieleka ntangu ya nene mingi! Baklisto, bisika nionso, beno sala keba na ngunga yina beto ke na kuzinga! Beno sonika, mpe beno tanga, mpe beno kuwa mbote.

³⁵ Samu na yinki na nsungi yayi ya yimbi Nzambi ke bokila bantu na kubasika samu, Nkumbu ya Yandi? Ya kele samu na yina ya kele, ya kele samu na kumeka Yandi, Kento ya Yandi ya makwela. Ya kele na . . . Ntangu Yandi ke monisama, ya ke vwanda ba me meka, ba ke vwanda bayina me mekama, ba me talisa na Satana. Mutindu ya vwandaka na mbandukulu, mutindu mosi ya ke vwanda na nsuka.

³⁶ Mutindu nkuna ke banda na kati ya ntoto, ya ke kwizaka na kulutila na minati, luzingu na kati ya yawu, kasi na nsuka ya yawu nkuna mosi yina vwandaka ntangu ya kwendaka na kati ya ntoto.

Mpe mutindu mosi nkuna ya luvunu kubwaka na ntoto, na Eden, ya kele mutindu mosi ya ke suka na bilumbu ya nsuka.

Kaka mutindu Nsangu ya mbote vwandaka ntangu yawu kubwaka na denomination na Nicée, Rome, nsuka ya yawu ya kotaka na organisation ya kulutila nene.

Kaka mutindu Nkuna ya Dibuundu kubwaka na manima kuna, na bidimbu, mambu ya ngitukulu, mpe Klisto ke zinga na kati-kati ya bawu, ya ke suka na bilumbu ya nsuka na yisi ya ministere ya Malachie 4, mpe kuvutula dyaka Lukwikilu ya ntete yina pesamaka mbala mosi.

³⁷ Beto ke mona ntangu yayi, nsungi ya yimbi yayi kele samu na kutalisa, na Satana, Yandi kele ve mutindu Eve, ti Yandi kele ve mutindu ya kento yina. Mpe ba ke meka Yandi na nzila ya Ndinga ya Yandi, Kento ya makwela, mutindu kento ya makwela ya Adam ba mekaka na nzila ya Ndinga. Mpe kento ya makwela ya Adam kwikilaka konso kitini ya Ndinga, nyonso, kasi kotaka na kati ya poto-poto na ntuala ya nsilulu mosi, ti, “Yandi kele mutindu mosi mazono, bubu yayi, mpe kukonda nsuka,” bubu yayi, beno me mona; kasi ya kubwaka na nsilulu mosi, na nsi ya mpukumunu ya mbeni, mbunzu na mbunzu. Mpe ntangu yayi, bantu yina ba ke bokilaka samu na Nkumbu ya Yandi, ya kieleka, ya kele Kento ya Yandi ya makwela. Yandi fwana kota dyaka na ngwisani na nzila ya kima mosi; ve kaka na nzila ya kieleka ya denomination to kima mosi, kasi konso Ndinga!

³⁸ Samu, na mbandukulu ya Biblia, ba pesaka muntu Ndinga ya Nzambi samu na kuzinga. Ndinga mosi, ya ba tendulaka yimbi na nzila ya muntu yina ba ke bokilaka Satana, na kati ya muntu ya kibulu yina ba ke bokila nyoka. Satana, na kati ya muntu yayi, lendaka zonza na Ève, mpe tendulaka yimbi Ndinga na yandi, mpe vwandaka ya kuzimbana. Benzo me mona, Ya fwana vwanza konso Ndinga.

³⁹ Na kati-kati ya Biblia, Yesu kwisaka mpe tubaka, “Muntu ke zinga kaka na dimpa ve, kasi na Ndinga nionso,” ntangu ba mekaka Yandi na Satana.

Ntangu yayi, Nzambi tubaka na beto awa na bilumbu ya nsuka, ti, “Nzambi ya yinza yayi ke vumbuka na lufwa na bilumbu ya nsuka.”

“Mpe muntu nyonso yina ke bwela ndinga mosi na Yawu, to ke katula Ndinga mosi na Yawu, ba ke katula ndambu ya yandi na Buku ya Luzingu.”

Nzambi vwanza na kyadi ya beto! Mpe beto tambula ve mutindu bantu ya lunangu, bantulu ya kuvimba, yintu na zulu, bantu yina zaba nionso, samu ti beto mpe kilumbu mosi vwanza na kukondwa kutumama. Ti beto na lemvo, mpe kyadi, mpe na kutalaka na kati ya ntima ya beto na ntuala ya Nzambi, na kulemvuka kwiza na Kiti ya kimfumu ya lemvo.

⁴⁰ Ya kele ngitukulu ntangu yayi, na manima ya mwa bamvula funda mosi na nkama yivwa ya Nsangu ya mbote ke longi, mpe ntangu yayi yandi, yina kele sysiteme ya yinza, kele yimbi mingi kulutila na bilumbu yina, ntangu Yandi vwanza awa. Sysiteme ya yinza kele ya kulutila yimbi. Yinza ke na kukuma na kisika ya zulu mingi. Benzo zaba yawu. Mfumu ke na kulungisa Ndinga ya Yandi na bandambu nyonso.

⁴¹ Mazono, ya kutelama . . . Mu banza ti mwa mwana yango lenda ve . . . Yandi zola ve. Mu kwisaka na kento ya munu, mpe Mama Wood, Mpangi Roy Roberson, kisika mosi awa, Mpangi Wood, beto sutopaka awa na mwa Centre ya Mumbungu ya Youngstown, samu na kubaka koli yina vwanza ya Mpangi ya kento Wood. Mpe na . . . na yina beto vwanza ya kutelama kuna, ntwenya mosi ya bakala kwisaka pene-pene mpe kukitalisa yandi mosi, mpe nzenza samu na munu. Bakala yankaka ya ntwenya kwisaka kuna mpe yandi tubaka ti bawu me katuka na Alabama, na Georgie- . . . Mu ke kwikila na Georgie, samu ti mu yufulaka bawu kana bawu zabaka Mpangi ya beto Welch Evans. Mpe beto vwanza zonzila baminuti fyoti. Mpe ntangu mu vwanza katuka, ntwenya ya bakala yayi talaka munu. Mutindu ntwenya ya bakala yankaka mpe mwana ya yandi ya bakala kwendaka, ntwenya ya bakala yayi talaka na munu. Yandi tubaka, “Kaka kima mosi mu zola kutuba.”

Mu tubaka, “Nge kele—nge kele mukwikidi? Nge kele Muklisto?”

Yandi tubaka, “Ve, tata.” Yandi tubaka, “Mu me . . .”

⁴² Mu lendaka ve kutanga kaka ndinga yina yandi tubaka awa, kasi ya lendaka vwanda ti yandi vwandaka na mwa maketiki. Mu yufulaka yandi na yina me tala bima ya kumonika ya Wanzio ya Mfumu. Mpe yandi tubaka ti yandi kuwaka na yina me tala yawu, kasi yandi vwandaka ata fioti ve na dibuundu, na dibuundu yayi. Mu tubaka, “Nge ke kwikila Yawu?”

Yandi tubaka, “Yinga, tata.” Yandi tubaka, “Mu—mu vwandaka tala kima mosi.” Yandi tubaka, “Bantu me zabisa munu mambu yayi ke kwiza na ntwala mpe nionso yina, mpe mu kuwaka na bande yina nge tubaka na ntwala mutindu Californie ke pasuka na bitini mutindu yina.” Mpe yandi tubaka, “Ntangu mu monaka yawu na zulunale, na yina mu kwikilaka yawu.” Yandi tubaka, “Mu ke na kwiza bubu yayi to mbasi,” ya kele bubu yayi, “samu na mbala ya munu ya ntete.”

Mu tubaka, “Mfumu sakumuna nge, mwana,” mpe yandi bandaka na kuningisa diboko ya yandi.

Yandi tubaka, “Kasi mu zola tuba kima mosi na nge, tata.” Yandi tubaka, “Mu kele ya kuzimbana mutindu ya kuzimbana lenda vwanda.” Yandi tubaka, “Mu kele mutindu mbongo ya kisengo na kati ya kikunku ya zyelo, ya kuzimbana!”

⁴³ Mu tubaka, “Kasi nge fwana bikana mutindu yina ve. Ya kele na Muntu yina kele ya kutelama awa ntangu yayi Nani lenda mona nge minuti yina ti nge vwanda ya kukubama na kumonana.”

Yandi tubaka, “Mu me kubama.”

Mu tubaka, “Nge zola kulumusa yintu ya nge?”

Yandi tubaka, “Mu ke na nsoni ve.”

Yina kaka ve, kasi yandi fukamaka, kuna na kati ya parking yina, na ntwala ya bantu nionso. Bantu na bala-bala ke tala yandi mbote. Kuna beto sambilaka na yandi, tii yandi pesaka Nzambi ntima ya yandi. Yandi me kwiza, musumuki; me vutuka, mwana ya Nzambi. Yandi me belama na lweka ya ditoma, me kufwa; mpe me vutuka, ya moyo.

⁴⁴ Mu tubaka, “Baptistère ke vwanda ya kuzibuka mbasi.”

Ya kele na Kiziba mosi ya kifuluka na Menga,
Yina basikaka na misisa ya Emmanuel,
Kisika bansumuki ke kota kuna,
Bawu ke zimbisa mvindu nionso.

Mu tubaka, “Telama mpe vwanda ya kubotam0a na Nkumbu ya Yesu Klisto, na kubokilaka na zulu ya Nkumbu ya Mfumu. Nzambi ke fulusa nge na Mpeve-Santu, mpe ke pesa nge bima ya nene yayi, mpe ke sala nge mutindu ti nge lenda mona Yawu.”

⁴⁵ Yinki ya kele? Yinza ke na kukuma na kisika ya kulutila mazulu. Samu na yinki? Mpeve ya kukondwa musiku, kubeba

ya bumuntu, nsambulu ya science, me twadisa yawu na “kaze ya bandeke nyonso ya yimbi mpe ya mvindu,” mutindu Biblia ke tuba. Beto tanga yawu, Apocalypse 18. Kaka na yina beto ke baka dibanza yayi kubanda, beto ke baka Apocalypse 18:1 tii na 5. Mu banza ti mu me sonika yawu mbote-mbote.

Mpe na manima ya bima yayi mu monaka wanzio yankaka kukulumuka na mazulu, yina wandaka na ngolo ya nene; mpe ntoto wandaka lezima na nkembo ya yandi.

Mpe yandi bokaka na ndinga ya ngolo, (ntangu yayi beno bantu yina kuzwaka bandosi) . . . na kutubaka, Babylone ya nene ke na kubwa, ke na kubwa, mpe me kuma kisika ya bampeve ya yimbi, mpe kisika ya konsu mpeve ya yimbi, . . . kisika ya ndeke nyonso ya mvindu mpe ya yimbi.

Samu ti bayinsi nyonso me kunwa vinu ya nganzi ya yandi (dibuundu) bindumba, mpe bantinu ya ntoto me sala bindumba na yandi, mpe bantu ya mumbongo me vwama na nzila ya ngolo ya kitoko ya yandi.

Mpe mu kuwaka ndinga yankaka na mazulu, kutuba, Beno basika na yandi, bantu ya munu, ti beno vukana ve na masumu ya yandi, . . . ti beno kuzwa ve bampasi ya yandi.

Samu ti disumu ya yandi me kuma na mazulu, mpe Nzambi ke bambuka moyo na disumu ya yandi ya nkú.

⁴⁶ Wapi malongi! Yina ke vutula kieleka dibuundu na Apocalypse 3:14, na nsungi ya Laodicée, kukondwa musiku; musambidi ya kieleka, kasi kukondwa musiku. “Nge, samu ti nge me tuba ti, ‘Beto kele mvwama, kele na nsatu ya kima ve,’ nge zaba ve ti nge kele kinkonga, muntu ya mawa, mpofo, mpe zaba yawu ve.” Ya kulunga na Masonuku ya nsungi yayi, ve samu na Masonuku ya nsungi ya Daniel, ve samu na bayina na nkumbu ya . . . nsungi ya Noé, kasi na nsungi yayi ya nsuka, ya yimbi.

⁴⁷ Beno tala awa, “Nge kele kinkonga.” Ti ya kota kieleka na mudindu. Mu zaba ti mu lendaka wisana ve na zulu ya dibanza yayi, kasi ya me kuma na kisika yina Muklisto lenda basika na mpasi na yinzo ya yandi mpe kukondwa yandi kukutana na nsungi yayi ya yimbi, samu na bakento yina me lwata ya kulunga ve.

⁴⁸ Bakento, mu ke tuba yayi, mpe mu zola ti beno kuwa. Mpe, babakala mpe bakento, beno lendaka wisana na yayi ve, kasi mu ke na kutala lutwadusu ya kutuba yawu. Beno me zaba ti, kento nionso yina me katula bilele mutindu yina kele ve na mabanza ya yandi ya mbote? Beno zaba, yandi kele, kana yandi ke kwikila yawu to ve, to ke banza ve, yandi kele kento ya kindumba? Ata ti kento lungaka telama na diboko ya yandi na ntuala ya Nzambi mpe kuzenga ndefi ti ba me simbaka yandi ata fioti ve na bakala

yankaka kasi kaka bakala ya yandi, mpe yina lungaka vwanda kieleka ya kusungama, kasi yandi kele kaka kento ya kindumba. Yesu tubaka, “Muntu nyonso yina ke tala kento samu na kulula yandi me sala yimeni pité na yandi.” Mpe kento lenda vwanda . . .

⁴⁹ Beno me mona, yandi kele “kinkonga,” Biblia ke tuba, “mpe zaba yawu ve.” Mpeve yina ke na kupakula yandi na kusala bima yayi kele mpeve ya yimbi, mpeve ya kindumba. Moyo ya yandi na ngaanda, nzutu ya yandi, nsuni ya yandi, yandi lendaka vwanda ya kuvedila. Yandi lendaka ve kusala pité, mpe lendaka zenga ndefi na Nzambi mpe kuvwanda kieleka, ti yandi ata mbala mosi ve, kasi mpeve ya yandi kele mpeve ya kindumba. Yandi me vwanda ya kufwa meso mingi na nzambi ya yinza yayi ya mvwatulu yayi; yandi me lwata sexy yandi mosi mpe me basika kuna.

⁵⁰ Kilumbu yina, Mpangi Wood mpe munu vwandaka kutula masuwa ya beto na nzadi. Mu zolaka kuvwanda ntama na yinzo baminuti fyoti, samu na kukwenda na nzadi. Mpe bisika nionso beno me kwendaka, bakento vwandaka lwata mwa mitindu yayi ya . . . yina ba ke bokilaka bakini to kima mosi, kuzungila bawu. Ya kele nsoni. Kento lenda vwanda ve na mabanza ya yandi ya mbote mpe kulwata kima ya mutindu yina. Yandi kele ya kuyala na mpeve ya kindumba. Ntangu yayi, beno ke sukisa yawu na Nzambi, mama, samu beno ke mona kilumbu yina ya kele Kieleka.

⁵¹ Wapi mutindu beno lenda, mama, na kuzabaka mutindu nzutu ya beno kele ya santu, mpe ke talisa yawu kuna samu na bantu yayi ya kulula, bampeve ya yimbi yina ke tambula bala-bala ya kilumbu yayi? Kana bana ya Nzambi vwandaka na nyonso bana ya babakala ya Nzambi, bakala ya beno vwandaka mwana ya Nzambi, yandi zolaka to kunata beno kulwata bilele to kubika beno. Kana mwana ya bakala vwandaka mwana ya bakala ya Nzambi, yandi zolaka ata mbala mosi ve kukwela kima ya mutindu yina. Beno me mona?

Beno ke tuba, “Nge kele mada- . . .” Ve.

Mu ke na kutuba na beno Kieleka, mpe kilumbu beno ke kutana na Yawu. “Kinkonga, muntu ya pité; beno zaba yawu ve.”

⁵² “Oh, mu ke zenga ndefi ti mu me zengaka ata fioti ve bansilulu mu salaka na bakala ya munu.” Bakala ya beno ke sambisa beno samu na yawu kana beno me sala yawu. Kasi Nzambi ke sambisa beno na nzila ya wapi mutindu ya mpeve yina kele na kati ya ntima ya beno; ve kusambisa beno na nzila ya nzutu ya beno, kasi na nzila ya mpeve ya beno, muntu yina ya kati.

⁵³ Muntu yina kele na ngaanda kele muntu yina kele ya kutwadisa na ba-sense sambanu . . . to ba-sense tanu, mu zola tuba. Kati ya ntima ya muntu kele mpeve muntu yina me twadisama na ba-sense tanu; konsiansi, mpe zola, mpe nionso

yina. Muntu yina kele na ngaanda; beno me mona, ntomo, kusimba, kuwa nsunga, kuwa.

Kasi na kati ya mpeve yina kele moyo, mpe ya kele ya kutwadisa na kima mosi, kimpwanza ya beno. Beno lenda ndima yina dyabulu ke tuba to kundima yina Nzambi ke tuba. Mpe ya ke lakisa yina mpeve kele na kati kuna. Kana ya kele Mpeve ya Nzambi, Yawu ke dikisa bima ya Nzambi, mpe Yawu ke kudisa ve na bima nyonso ya yinza. Yesu tubaka, “Kana beno zola yinza to bima ya yinza, ya kele samu ti zola ya Nzambi me kota ata fyoti ve na kitini yayi ya kati.” Satana me vuna beno. “Mpe muntu ke zinga kaka na dimpa ve, kasi na konso Ndinga yina ke basika na yinwa ya Nzambi.”

Beno tala ntangu yayi, beto ke mona ti yandi kele “kinkonga,” ya kubeba mpe kinkonga.

⁵⁴ Mpe yinza ke monana ti ya kele na nsungi ya yimbi mingi yina me vwandaka ntete ve. Ata mbala mosi ve ti na nsungi mosi bakento salaka mutindu yina, ata mbala mosi ve kasi kaka ntete kubeba ya yinza ya ntama na maza. Mpe Yesu zonzilaka yawu. Beto ke kuma na yawu na manima ya mwa ntangu fyoti.

⁵⁵ Nzambi me zimbisa luyalu, to Yandi ke pesa muswa kaka na kisadisi yankaka na kubaka luyalu? Mu ke kumiyufula. Mvutu ya kieleka na kiuvu yayi, na dibanza ya munu, kele na bampeve zole ya kuswaswana kele na kunwana na yinza bubu yayi, na kusalu. Ntangu yayi, ya lenda vwanda dyaka ve ya kulutila zole, bamfumu zole. Mpe Mosi ya bawu kele Mpeve-Santu na kusalu; yankaka yina kele mpeve ya dyabulu, mpe, na bilumbu yayi ya nsuka, na kuvuna.

Ntangu yayi mu kele na kuvwandisa mabanza ya munu kaka na zulu awa samu na dilongi yayi me bikana, yina bikanaka ya . . .Nsangu ya beto.

⁵⁶ Bampeve nyonso zole. Mosi ya bawu, Mpeve-Santu ya Nzambi; yankaka yina, mpeve ya dyabulu, na kusalaka na kuvuna. Bantu ya ntoto kele ntangu yayi kusala nsodolo ya bawu.

Mpeve-Santu kele awa yina ke na kubokila Kento ya makwela samu na Klisto. Yandi ke na kusalaka yawu na kusiamisaka Ndinga ya Yandi ya nsilulu na Yandi, samu na nsungi yayi, na kulakisaka ti Yawu kele Klisto.

Kana musapi fwana kuningana na nsungi yayi, musapi ke ningana. Kana makulu fwana kuningana na nsungi yayi, dikulu ke ningana. Kana disu kele kumona na nsungi yayi, disu ke mona. Beno me mona?

Mpeve ya Nzambi, mutindu Yawu me kula na ntela ya muvimba ya Nzambi, ya kele nsungi yina beto ke na kuzinga ntangu yayi. Mpeve-Santu kele awa samu na kusiamisa Nsangu ya ngunga. Mpe Mpeve-Santu ke na kusalaka yayi, samu ti bantu

yina ke kwikila ti ba ke bokila ti Nzambi na kubasika na potopoto yayi.

Mpeve ya yimbi kele awa ke bokila dibuundu ya yandi na nzimbani, mutindu ntangu nyonso, na nzila ya kubeba ya Ndinga ya Nzambi, mutindu yandi salaka na mbandukulu. Beno me mona ya ke vutuka dyaka na ntangu yina ya nkuna, kubanda Eden? Yawu yayi diaka.

⁵⁷ Ntangu yayi, na manima kuna, beno kele ya . . . bansungi yankaka, beno vwandaka mambele ya ba-dénomination, beno vwandaka ya *yayi*, *yina*, to *yankaka*. Yinki salamaka na mwinga ya denomination? Ya ke mata mingi. Mpeve ke landila na kukwenda mpe ke landila na kukwenda, mpe Yawu ke suka na kati ya Nkuna. Beno me mona?

⁵⁸ Mpe mpukumunu, ya bawu zole, ke suka na kuvutukila na kima mosi ya vwandaka na ntonono. Beno tala. Ve—ve, ve, beno zimbana yawu ve ntangu yayi.

Mutindu Jean, mukanda ya Ntete ya Jean 4:5 mpe 6, kana beno zola kusunika yawu, yandi ke tula yawu, “mpeve ya nzimbani.”

Eve basikaka ve ata fyoti kaka mutindu yayi, na luzolo nionso, yandi tubaka, “Mu ke kwikilaka ve na Nzambi.” Ve. Ya vwandaka nzimbani yandi kwikilaka.

⁵⁹ Satana kwisaka ata fioti ve mpe tubaka, “Oh, mbote, yina kele ata fyoti ve Ndinga ya Nzambi.” Yandi ndimaka ti Yawu vwandaka Ndinga ya Nzambi, kasi yandi tulaka ntendulu ya yandi mosi na Yawu. Na yina, Nzambi tubaka yawu pwelele na bawu na kusala yawu ve.

Yinki yayi ke sala? “Ya ke sala ngolo ya kuvuna, samu bantu kukwikila luvunu, mpe ba ke bedisa yandi na yawu.” Ntangu yayi kana beno zola kutanga yawu, Thessaloniens ya Zole 2:11.

⁶⁰ Mutindu mu kele na yawu, mwa lutangu ya Masonuku awa, mpe beto ke vwanda ve na lenda ya kutanga yawu nyonso. Mosi ntangu yayi mpe na manima, mu ke pesa yawu na beno. Mutindu ya ke monana ya ke yitukisa, ti beno ke yufula yawu kiuvu to kima mosi, mpe beto lenda sonika yawu mpe kutanga samu na mambote ya beno—ya beno.

⁶¹ “Na kunataka ngolo ya kuvuna,” mutindu Biblia me tuba ti ya ke vwanda, ba-Théssalonicien ya Zole. “Ntangu yayi, muntu yayi ya disumu ke kwiza na luzingu, mpe ke vwanda na kati ya tempelo ya Nzambi, na kulakisaka yandi mosi ti yandi kele Nzambi, mpe mpamba ve ti bantu kukota na ngolo ya kuvuna, samu na kukwikila luvunu; mpe, bawu kwikila yawu, ba ke bedisa yawu na nzila ya yawu.”

Ya kele kima mutindu mosi yandi salaka na Eve. Pesa yandi . . . Ata mbala mosi ve—ata mbala mosi ve tubaka na yandi

ti Ndinga vwandaka ve ya kieleka, kasi pesa yandi ngolo ya kuvuna, ti yandi kwikilaka luvunu.

⁶² Mpeve ya kuvuna kele ya dyabulu. “Bampeve ya yimbi ntangu yayi na kusalaka na bana ya kutumama ve.” Beno tumama ve na yinki? Yinki kele bana ya bubu yayi yina ke na kutumama ve? Mutindu Eve vwandaka, na mbandukulu, Ndinga ya kieleka ya Nzambi. Ya kele kieleka. Ntangu yayi kana beno zola kuzwa yawu. . .

Beto baka yawu, Ephésiens 2, kaka minuti, samu ti ya ke monana mbote ti beto. . . Mu ke sutopé kaka minuti, kana beno ke kwenda ve nswalu na manima ya ngunga, mpe mu ke tanga mwa ndambu ya yayi. Éphésiens 2:1 tii na 2.

Mpe beno kele yandi pesaka dyaka luzingu, beno yina vwandaka ntete ya kufwa na mambu ya yimbi mpe disumu:

Kisika beno vwandaka tambula na bantangu ya ntama landila mambu ya yinza yayi, landila ntinu ya ngolo ya mazulu, mpeve yina ntangu yayi ke na kusalaka na bana ya kukondwa kutumama:

⁶³ “Bana ya kukondwa kutumama.” Mpe kana mbeni ya Klisto, na mbandukulu kuna na bumwana ya kukondwa kutumama, yinki ya ke vwanda ntangu ya ke kuma na nsuka na muntu ya mbeni ya Klisto? Mbala yikwa ya ke vwanda luvunu! Mbala yikwa ya kulutula ngolo kele luvunu ya mwana ya fyoti ke pesa kulutula ya kulutu lenda talisa na yinza! Mpe yandi tubaka, “Mpeve ya—ya luvunu ntangu yayi na kusalaka na bana ya kutumama ve,” na kutumamaka ve na Ndinga. Beno tala. Ntangu yayi mu zola kubikana na zulu ya yayi na mwa ntangu fioti, “bana ya bantu yina ke ya kutumama ve,” mwana.

⁶⁴ Beno zabaka ti, beno, na mbandukulu ya beno, mu lenda lakisa na nzila ya Ndinga ya Nzambi ti beno, muntu nyonso na kati awa, vwandaka zinga na nkooko ya nkooko ya nkooko ya beno. Mpe nkooko ya nkooko ya beno ya bakala, ba basisaka beno na nkooko ya beno ya bakala, na yina na tata ya beno, mpe na manima na beno. Beno zaba yawu?

Biblia ke tuba, mu banza ti ya kele Hébreux 7, ti, Melchisédek, ntangu Abraham vutukaka na muzingu yina ya nungaka bantinu, “Abraham futaka na Melchisédec mosi na zulu ya bandambu kumi ya bima nyonso yina yandi kuzwaka na bitumba.” Mpe awa kele Paul ke na kutuba ntangu yayi, ti, “Levi, yina kuzwaka bima mosi na zulu ya bandambu kumi, vwandaka ntete. . . Yandi futaka mosi na zulu ya bandambu ya kumi, samu ti yandi vwandaka ntete na kati ya menga ya Abraham ntangu yandi kutanaka na Melchisédek.” Na yawu nyonso yina Abraham salaka, kuna beto ke tala ti Levi vwandaka ntangu yina na Abraham, yina vwandaka nkooko ya nkooko ya

nkooko ya yandi ya bakala. Abraham butaka Isaac; Isaac butaka Jacob; Jacob butaka bankooko, Levi.

Ntangu yayi, na yina, beno me mona, awa me kwiza na kutala ya kulunga, nsodolo ya ntete.

⁶⁵ Ntangu yayi, na Bansangu yayi, mu zola ku—ku—kulanda kutubila bima yina mu me tuba na beno na Nsangu, ya Nsemo ya nkokila yayi yina Nzambi tubaka ke kwiza na zulu ya ntoto.

⁶⁶ Mpe beno tala, kuna, “Kibulu yina zolaka kwiza na zulu ya ntoto, ke vuna bayina nyonso bankumbu kutulamaka ve na Buku ya Luzingu ya Mwana-dimeme, yina ba kufwaka ntete mbandukulu ya yinza.”

⁶⁷ Na dibanza ya Nzambi yandi mosi; Nzambi, Mpeve ya nene. Na mbandukulu, ntete ya vwanda na mbandukulu, Yandi vwandaka Nzambi, mpe beno zaba ti beno vwandaka na kati ya Yandi ntangu yina? Kana beno kele Muklisto ntangu yayi, beno vwandaka na kati ya Yandi na ntangu yina.

Mpe ntangu yina, kana ya kele mutindu yina, Bunzambi nyonso na nzutu ya kusala na nzutu ya Muntu ya Yesu Klisto. Mpe ntangu yina ntangu Yesu kufwaka na kulunsi, mu kufwaka na Yandi, samu ti mu vwandaka na kati ya Yandi ntangu yina; samu ti Yandi vwandaka kufuluka ya Ndinga, yina monisamaka, na kuzabaka ti beto ke monisama na manima. Mpe beto vwandaka na Calvaire na Yandi. Beto kwendaka na ntoni na kati ya Yandi. Mpe beto vumbukaka na Yandi mpe mvumbukulu ya Yandi. Mpe ntangu yayi beto me mata, na Mpeve ya Yandi, na Kiti ya kimfumu ya lemvo, na kuvwandaka kintwadi na bisika ya Mazulu na kati ya Klisto Yesu. Ntangu nyonso!

⁶⁸ Samu ti mutindu germe ya luzingu ya yinza kubutaka, butamaka na tata na tata, na tata, na tata, mutindu mosi kele Luzingu ya nkuna ya Klisto butamaka.

Ya kele samu na yina Nzambi ke sadilaka Mpeve ya Élie bambala tanu. Yinki ya kele? Ya pesamaka na nzila ya mosi na yankaka.

⁶⁹ Kaka mutindu luzingu ya beno ya kimuntu mpe bidimbu ya nzutu me pesama na nzila ya kubutama ya luzingu ya tata ya beno, mutindu mosi kele Mpeve ya Nzambi, yina ba soolaka ntete mbandukulu ya yinza.

Mpe ntangu Ndinga ya muvimba ya Nzambi, na muvimba, vwandaka kusuka na nzutu ya muntu yina ba ke bokila Yesu Klisto, na kati kuna Nzambi salaka munu kufuta samu na masumu ya munu, na kati ya Yandi kuna. Na ntangu yina Yandi vumbulaka munu, telemisaka munu na lufwa na Yandi, na mvumbukulu. Mpe ntangu yayi beto kele ya kuvwanda na Yandi, na ngolo mpe lutumu na zulu ya bampeve nyonso ya yimbi. Oh, kana beno lendaka kwikila kaka yina Nzambi me pesa! Kasi kana beno me vwanda kuna ve, beno me kuzwa yawu ve. Mpe

kana beno me vwanda kuna, mpe beno kwikila yawu ve, mpe beno ke na boma ya kusala, beno ke sadila yawu ata fioti ve. Kasi kana beno me vwanda kuna, beno ke sadila yawu, samu ti beno kele ya kutumama na kusala yina beno ke sala.

⁷⁰ “Pharaon,” na kisika yankaka yina, “ba telemisaka yandi samu na lukanu yayi,” Biblia me tuba, samu na kuvwanda Pharaon. “Judas Iscariot ba telemisaka yandi samu na kuvwanda mwana ya zimbani.”

Ntangu yayi beno tala Babukieleka yayi ya nene yina beto ke na kubelama.

⁷¹ Ntangu yayi beto ke mona ti dibuundu mangaka na kundima Ndinga ya Nzambi samu na kuyala na zulu ya bawu, mpe ndimaka Barabbas na kisika. Ntangu yayi, kana beno zola Masonuku na zulu ya yawu, ya kele Matthieu 27:15 na 23. Yinki yayi salaka? Wapi kisika yayi salaka? Ntangu yayi beno banza na yawu. Ntangu dibuundu ya yinza, na luzingu ya yandi ya kubongisa ya bantu ya kudedama, ya santu, mutindu bawu banzaka ti bawu vwandaka, mpe vwandaka na meso ya bantu, ba komaka Yesu na kulunsi, mpe tubaka, “Beto ke vwanda ve na Muntu yayi samu na kuyala na zulu ya beto.” Mpe Yesu vwandaka muvimba ya Ndinga ya Nzambi. Mukanda ya Ntete ya Jean kapu ya 1, ke lakisa yawu. Mpe bawu tubaka, “Beto ke vwanda ve na Ndinga yayi ya Nzambi samu na kuyala na zulu ya beto.” Kasi, Yandi vwandaka Ndinga, kasi meso ya bawu vwandaka ya kufwa na yina Yandi vwandaka. Samu ti Yandi vwandaka mvutu ya mbala mosi na konso profesu yina zolaka salama na kulutula na kati ya Yandi.

Ntangu yayi, beto nyonso ke kwikila yawu, samu ti beto ke na kutalaka na manima na kumona yawu kusalama. Kasi kana yinza zola, ya kele ntangu yayi, nsungi yayi ya yimbi, yina zolaka vwanda kuna na ntangu yina, bawu ke sala kima mutindu mosi bawu ke na kusalaka bubu yayi, samu ti ya kele kaka Ndinga mosi, samu na nsungi yayi, yina monisamaka. Yandi ke sala yawu. Ba lenda ve kusala kima yankaka. “Bawu kele bana ya kukondwa kutumama.” “Ba pesaka yandi ngolo ya kuvuna, samu na kukwikila luvunu, mpe ba bedisa yandi na yawu.”

⁷² Beno tala ntangu dibuundu ya yinza ke ndima Yesu ve, Ndinga, monisamaka ya kilumbu yina, samu (samu na yinki?) bawu tendulaka Yawu mutindu yankaka. Kasi bawu zolaka zaba ti Yandi vwandaka Ndinga yina, samu ti nyonso yina Nzambi tubaka ti Yandi zolaka sala, Yandi salaka yawu. Mpe Yandi tubaka na bawu, “Beni longuka Masonuku samu na ngunga yayi; mpe kana mu me lungisa ve lenda yina ba zonzaka samu na Munu na kusala, ntangu yina beno kwikila Munu ve.”

Bawu tubaka, “Beto ke kwikilaka Moise.”

⁷³ Yandi tubaka, “Kana beno zolaka kwikila Moise, beno zolaka kwikila Munu, samu Moise zonzilaka na Munu.” Mpe

dyaka bawu kumonaka yawu ve. Nzambi ya kieleka ya Mazulu ke na kufwa na zulu ya kulunsi, mpe ke na kutuba bampova mosi profete tubaka ti Yandi ke tuba, mpe kaka bawu kumonaka yawu ve. Beno me mona?

Bawu vwandaka ve ya mutindu ya Yandi. Bawu vwandaka ve Ndinga, Ndinga ve; mpe bawu, kasi, bawu vwandaka—vwandaka misambidi ya kieleka. Kasi bawu vwandaka ve Ndinga, samu ti Yawu—Yawu zolaka zaba kisika ya Yawu samu na ngunga yina.

⁷⁴ Beno tala mutindu kitoko Masonuku ke vukana yawu mosi kintwadi na bansungi nyonso. Beno tala ntangu yayi.

Mpe ntangu dibuundu ya yinza zolaka kuzwa ve Ndinga ya Nzambi samu na kuyala na zulu ya bawu, bawu ndimaka muntu ke kufwaka bantu, Barabbas. Yinki yayi salaka? Ya me zangula Satana, nzambi ya nsungi yayi ya yimbi, na kisika yina yandi ke zolaka ntangu nionso.

Ntangu yayi beno kuwa. Samu ti, Satana zonzaka ve mutindu nzambi ya nsungi nyonso yankaka kasi nsungi yayi. Ba zonzilaka yandi ve na nzambi ya nsungi ya Noé. Ba zonzilaka yandi ve na—na nzambi ya nsungi ya Moise, nzambi ya nsungi ya Elie. Kasi, nsungi yayi ya yimbi, yandi kele. . . Oh, beno kondwa yawu ve! Yandi kele nzambi ya nsungi yayi ya yimbi, yina ba ke sambilaka na nzila ya mafuku mpe byazi ya bantu, mpe bawu zaba yawu ve. Kasi beto bika Masonuku lakisa yandi pwelele na suka yayi, mpe beto tala, na ntangu beno ke zaba. Bika ti Masonuku. . .

⁷⁵ Mutindu na balukutakanu ya kuswasikisa mabanza, ntangu Mpeve-Santu ke kota na kati-kati ya Ndinga ya Yandi mpe Yandi ke bokila muntu yayi mpe ke tuba, “Nge kele ve na muswa ya kuzinga na kento yayi yankaka. Samu na yinki beno salaka yawu, bamvula kumi me luta, ntangu beno kwendaka mbangu na kento ya bakala yina?” Yinki Yandi ke na kusala? Na kulakisaka yandi, na kutalisaka Satana, yina ke tula bakala yina na boloko, to kento yina ke zinga na bakala ya kento yankaka, to masumu yina bawu salaka, bima yina bawu salaka. Yinki ya ke sala? Ke talisa yandi.

⁷⁶ Badokotolo bakaka bisadilu mpe mekaka na kutala yina kele mbote ve. Bawu lenda ve kusala yawu. Beto lenda ve kutuba. Kasi ntangu yina Mpeve-Santu ke basika mpe ke monisa yina yandi kele, mpe ke talisa yandi. Beno me mona? Ya kele yina Ndinga ya Nzambi kele. Ya kele Nsemo yina ke lezima na mpimpa.

Mpe ntangu beno ke kuzwa makelele na kati ya kivinga, ya ke wakana yina ke yitukisa, nkonga ya kima mosi ke sala, mpe beno zaba ve yinki ya kele. Beno pelisa nsemo, na nswalu nionso, makelèlè, bampese, bawu kele—bawu kele bana ya mpimpa, mpe ntangu mwini ke pesa nsemo, bawu ke zimbana.

“Bawu basikaka na kati-kati ya beto samu ti bawu vwandaka ve ya beto,” Biblia me tuba. Beno me mona? Bawu lenda zinga ve na Nsemo ya yinza . . . Samu ti, Nzambi ya Mazulu me fidisa Nsemo ya Yandi na bilumbu yayi ya nsuka, ti Yandi lendaka pesa nsemo na nzila samu na bana ya Yandi, ti bawu lendaka ve kutambula na mpimpa mpe kubula dibaku, kasi bawu lendaka tambula na Nsemo ke na kusemaka ya Yesu Klisto, mutindu mosi mazono, bubu yayi, mpe ntangu nyonso. Amen!

⁷⁷ Beno tala, Satana bokilaka ve nzambi ya nsungi nyonso yankaka kasi ya nsungi yayi. Ya vwandaka luzolo ya ngolo ya yandi na kuvwanda mutindu Nzambi, kubanda mbandukulu ya kieleka.

Beto tanga yawu. Beto ke baka kaka ntangu ya beto. Beto vutuka na . . . Beno me mona, mu sonikaka yawu, Esaïe 14. Beto vutuka awa na Esaïe 14, kaka minuti, mpe kumona yina Nzambi tubaka. “Nzambi,” yina Satana salaka. Esaïe 14:12 mpe 14. Beno tala.

Yinki mutindu nge me kubwa katuka mazulu, O Lucifer, mwana ya suka! yinki mutindu ba me losa nge na ntoto, nge yina me nungaka bayinsi!

Samu ti nge tubaka na kati ya ntima ya nge, mu ke zanguka na mazulu, mu ke zangula kiti ya munu ya kimfumu na zulu ya bambwetete ya Nzambi (bana ya Nzambi, ntangu yayi): mpe mu ke vwanda mpe na zulu ya mongo ya dibwundu, na balweka ya node:

⁷⁸ Ya vwandaka luzolo ya ngolo ya Satana ti ba na sambila yandi mutindu Nzambi. Yandi bakaka zole na zulu ya tatu, zole na zulu ya tatu ya bambwetete ya Mazulu. Yandi mataka yandi mosi na zulu ya bambwetete yina, mpe longaka bawu, mpe vunaka zole na zulu ya tatu ya bawu. Beno me mona yawu? Mbote mingi. Beno tala, yina kele luzolo ya ngolo ya yandi.

Mpe ntangu yayi yandi kele ya kukubama, na kento ya yandi ya makwela yina ya soolaka, yina ya longaka na nzila ya luzabu ya yandi mosi, beno me mona, nionso ya kupakula na kuvuna ya yandi, na bivinga ya nene mpe ba-denomination ya nene, na mukubu ya luzabu mpe théologie, mpe ya mayela mingi mpe ya mayela, mpe ya kulongoka, samu na kuvuna yinza ya muvimba, mpe kukuma “nzambi.” Ya kele yina yandi salaka. Nyonso yina na kusukaka na kati ya muntu ya mbeni ya Klisto, yina kele yimeni ya ba pesaka lukumu “vicaire ya Nzambi,” na nzila ya kento ya yandi ya luzolo ya yinza, kento ya makwela landila science, nyonso ya kulwata pum ya mayela, ya mayela ya musambidi. Yandi me kuma musambidi mutindu yandi, mpe na nzila ya ntendulu ya yandi mosi ya Ndinga ya Nzambi mutindu yandi salaka na Eve, mpe mutindu mwana ya yandi Caïn salaka.

Ntangu yayi nge tubaka, “Mwana ya Satana?”

79 Beno lakisa munu kisika mosi na kati ya Biblia ti ba bokilaka Cain mwana ya bakala ya Adam. Biblia ke tuba ti yandi vwandaka “mwana ya muntu ya yimbi yina,” nkuna ya nioka. Ve, ba me katula kifiniku ya yawu ntangu yayi, mpangi. Pyramide me zibuka, mutindu luzayikisu me lakisa.

80 Beno tala yina yandi ke sala, mabanza ya yandi. Yandi banzaka ti Nzambi vwandaka zinga na kitoko ya yinza. Yandi salaka yawu na Mazulu. Disumu bandaka ata fioti ve na disamba ya Eden; yawu bandaka na Mazulu, ntangu Lucifer, mwana ya suka, me zanguka yandi mosi na kitoko, mpe me zola kimfumu ya kitoko mingi kulutula yina ya Michel. Mpe yandi banzaka ti Nzambi zingaka na kitoko.

81 Mpe beno tala Cain. Yandi zolaka ve munkayulu ya menga. Yandi kulumukaka mpe pesaka dikabu ya bambuma, to— to bilanga ya kitoko na zulu ya autel ya yandi. Musambidi ya kieleka, salaka nyonso, yina, kaka kieleka mutindu Abel salaka; pesaka munkayulu, kubwaka na ntuala ya Nzambi na kusambila, ya kutumama na mutindu nyonso, kasi kukondwa luzayikisu ya Ndinga.

Mpe Ndinga vwandaka, kubanda mbandukulu, dikani ya Nzambi. Kasi Nzambi me monisama, na nzila ya luzayikisu, kima ya kieleka yina Yandi siamisaka mpe me tuba ti ya vwandaka kieleka. Nsambulu ve, autel ve, kuvwanda mambele ya dibuundu ve, kupesa munkayulu ve, kuvwanda ya kusungama ve; kasi na nzila ya luzayikisu ya Ndinga ya Nzambi. Nzambi ke monisa na yandi yina yawu . . .

Mama ya yandi bakaka ve pomme yina nyoka pesaka yandi, kasi yandi vwandaka na dyambu ya kuvukisa banzutu na muntu ya Satana, na nzutu ya kibulu; ve kibulu ke komvulaka, kasi ya kulutula mayela, ya kulutula mayela na bilanga nyonso, kizizi ya muntu, kima kaka yina nkuna ke vukana. Ntangu yayi science ke na kumeka na kumona yandi. Mpe ata mbala mosi ve ti ba ke tala yandi, samu ti konso mukwa na kati ya nzutu ya yandi me soba. Kasi Biblia ke tuba ti ya kele mutindu yina.

82 Beno tala yina muntu yayi ke sala ntangu yayi. Muntu yayi, “Yandi ke vwanda na kati ya tempelo ya Nzambi,” ya kele, dibuundu, “na kumonisaka yandi mosi na kuvwanda Nzambi.” Ntangu yayi kana beno zola kutanga yawu, ya kele Thessaloniciens Zole 2:3 mpe 4, mpe Apocalypse 13:4, 11 mpe 12; wapi kisika zonzaka, bapofete nyonso zole, nyonso zole Jean mpe Paul, ya yina yandi ke vwanda na bilumbu ya nsuka. Ntangu yayi beno tanga yawu, samu ti mu me sonika yawu awa. Kasi mu . . . samu na kulutisa ntangu ve ntangu yayi.

83 Kilumbu ya beto ke na kuzinga ba ke bokila, na kati ya Biblia, “kilumbu ya muntu,” kilumbu ya muntu. Yayi kele ve kilumbu ya Nzambi. Nzambi kele ve nzambi ya ntoto yayi; Biblia

ke tuba ti Yandi kele ve. Yandi kele Nzambi ya Mazulu. Kasi yayi kele ve kilumbu ya Nzambi.

Yayi kele kilumbu ya nsodolo. To, beno zinga samu na bubu yayi, mpe beno kufwa; beno soola Nzambi, mpe beno zinga. Mpe Nzambi kele Ndinga, mpe Ndinga kele Ndinga yina me monisama samu na ngunga mpe kilumbu.

⁸⁴ Beno tala, “kilumbu ya muntu.” Kana beno zola kusonika yawu, mu zolaka kutanga yawu. Kasi ya Ntete ya Corinthiens 5:1-5. . . Corinthiens ya Ntete kapu 4:1-5, beno lemvočila munu, Ya Ntete ya Corinthiens 4:1 mpe 5, Paul vwandaka zonzila kuvwandaka ya kufundisama na nzila ya muntu, na kilumbu ya muntu.

⁸⁵ “Kilumbu, samu na yinki beno ke bokilaka yawu kilumbu ya muntu yina?” beno ke tuba. Ya kele kilumbu yina bisalu na nzila ya luzabu ya muntu ke kuzwa nkembo.

Beno tala yina, binwaninu nionso ya ba-communiste, muntu mosi ke meka na kunata muntu mosi na ngonda. Nzambi ke na kumeka na kuzwa muntu na Mazulu. Beno me mona? Kasi beno tala mutindu bawu ke na kubebisa bamafuku na bamakiasa mpe bamafunda ya ba-dollar, na ngolo ya mpamba. Ntangu ba ke kuma kuna, ba ke kuzwa kima mosi ve. Yinki kele diambu na bawu?

Mu ke kipe ve ngonda. Mu ke zola kuluta ngonda na nswalu nionso yina mu ke mona yawu ata fyoti ve; mu ke landila kaka na kukwenda na zulu mingi. Mu zola lutisa Nzila ya Miliki ya Mpembe, kulandila, na kutatamana kaka na kukwenda. Yinga!

⁸⁶ Mpe yinza bubu yayi ke na kusakumunaka bawu mosi na luzabu yina kwisaka na nzila ya Satana. Mpe kilumbu ya muntu kele ya kukembisa, ve na nzila ya Ndinga ya Nzambi, kasi na nzila ya luzabu yina yandi kele na yawu.

Ntangu yayi beno banza. Beno bika yawu kukota. Mpe ntangu beno ke bula bande yayi na manima, na kisika yayi awa, beno telama mwa ntangu fyoti mpe beno banza.

Ba me zangula bisalu ya Yandi na zulu ya Ndinga ya Nzambi mpe bisalu me monisama; ndwenga ya Satana, yina yandi pesaka na Eve na mbandukulu. Ntangu yayi beno kuwa; beno kondwa yayi ve. Ba me zangula ndwenga ya Satana na kiti ya kimfumu ya kusambila, na kati ya muntu, na zulu ya Ndinga ya Nzambi yina me siamisama samu na ngunga. Mabuundu ya beto ke siamisa ti na nzila ya baseminere ya bawu—ya bawu, balukolo ya kulongoka, yina kele kulonguka mingi kulutula Ndinga ya Nzambi zaba na yina me tala Yawu, bawu ke banza. Mpe kuna, Docteur *Kingandi*, mpe Mulongisi *Kingandi*, mpe Kitungi *Kingandi*, mpe Longi *Kingandi* me zangula luzabu ya bawu, yina ba ke bokilaka (ya Satana) kieleka, na zulu ya nsilulu ya Nzambi yina me siamisama, yina me monisama pwelele kaka na ntwala ya bawu. Mpe muntu kubwaka samu na yawu. Beno me mona?

⁸⁷ Bisalu ya Yandi landila science, ke na kumeka na kutalisa Ndinga ya Nzambi luvunu. Beno banza kaka na yawu. Yandi, ya yandi, ya kele, théologie ya muntu yina, ke tendula Ndinga ya Nzambi na bantu, mpe ke sala ti Yawu kusala kosalu diaka ve, mutindu yandi vwandaka na yawu na nsungi ya denomination ntangu Yesu monikaka na zulu ya ntoto. Yesu tubaka, “Beno bantu ya luvunu! Beno, na nzila ya binkulu ya beno,” yina kele ntendulu ya bawu, “me baka Ndinga ya Nzambi mpe me sala ti Yawu sala kosalu ve na bantu.” Mpe ya kele kima mutindu mosi bawu salaka bubu yayi. Ya kele ve na kosalu.

⁸⁸ Beno tala, “Bawu,” bantu, “beno zangula yandi na zulu ya nyonso yina ba ke bokilaka Nzambi.” Ba-Théssalonicien ya Zole ke tuba ti bawu ke sala yawu? Mpe lutumu ya dibuundu ya denomination, bantu ke na kwikilaka denomination yina ya kulutula bawu ke kwikilaka Nzambi. Mpe Nzambi kele Ndinga. Ba ke kwikila credo ya ba denomination ya bawu na zulu ya Ndinga, yina “ke kuzangula yandi na zulu ya nionso yina ba me bokila Nzambi.” Mpe ya kele kaka na Nzambi mosi, mpe ya kele Ndinga.

“Nyonso yina ba ke bokila Nzambi; na mutindu ti yandi mutindu Nzambi ke vwanda na kati ya dibuundu ya Nzambi, na kusiamisaka ti yandi kele Nzambi,” samu ti yandi kele na bantu yina ke sambilaka yandi. Nzambi kele Ndinga. Mpe yandi ke kukizangula yandi mosi na zulu ya nionso yina ba me bokila Nzambi. Mpe ya kele kaka na Nzambi mosi, mpe ti Nzambi kele Ndinga. Beno me mona? “Mpe bayina nionso ba me bokila Nzambi,” ya kele, nzambi ya nsungi yayi me zanguka yandi mosi na zulu ya Ndinga ya Nzambi ya kieleka, yina ba me siamisaka. Ya kele Santu Jean 1. Beno me mona? “Na zulu ya nyonso yina ba ke bokilaka Nzambi, samu ti yandi mutindu Nzambi kuvwanda na tempelo ya Nzambi,” na lutumu.

Beno tala, mpe yandi ke pesaka lukumu samu na yawu! Oh, ti bantu, Nzambi, kumona lukusu yango! ba ke pesa Yandi lukumu samu na yawu, mpe ke kwikilaka pwelele na nzila ya bantu ya nsungi yayi ya yimbi. Ntangu yayi beno ke mona nzambi mpe bisadi ya yandi ya nsungi yayi ya yimbi?

⁸⁹ Ntangu yayi beto tala mbote ti yawu kumonisama. Yandi tubaka ti yandi ke sala yinza ya kulutula mbote samu na bawu kuzinga, na nzila ya luzabu ya yandi na kutula na lweka Ndinga ya Nzambi yina ke kubwaka ve. Kasi na nzila ya kuvukana ya yandi, na ba-denomination, mpe ba-credo, mpe bantu ya mayela, mpe bantu ya mayela landila science, mpe nionso yina, yandi ke na kusala yinza ya kulutula mbote samu na muntu na kuzinga, mpe na kuzabaka ve nsilulu ya Nzambi, ti ntangu kaka yinza ke lunga na kuzinga kele na kati ya Millenium. Beno zaba, dibanza ya munu, yandi me sala yinza ya kulutula mbote na kusumuka na kisika ya kuzinga kuna.

⁹⁰ Beno tala. Yandi salaka yina? Yandi pesaka muswa disumu. Yandi pesaka muswa na kunwaka whisky, na kunwaka tabaka. Mpe na kati ya mabuundu, yandi pesaka muswa ti kento lendaka vwanda mambele ya dibuundu, na nsuki ya nkufi. Ntangu yayi beno sutopé fioti kuna.

⁹¹ Yandi lenda lwata bakupe, kulwata ba-fard, mpe dyaka kuvwanda ya kimvuka ya yandi ya misambidi, yina kele kieleka ya kuswaswana na Ndinga ya Nzambi. Yandi tubaka ti ya kele nyonso ya kulunga. Beno me mona luzabu ya yandi? “Yinki ya fwana sala na kento?” Kaka mutindu kubaka mbuma yina ba yiminaka, to ve mbuma yina ba yiminaka, yawu yina. Nzambi tubaka na kusala yawu ve, kasi yandi salaka yawu.

⁹² Mpe yandi ke kwikila yandi, mpe yandi ke zolaka yandi samu na yawu. Yandi ke yinaka Nzambi. Bisalu ya yandi mosi ke talisa ti yandi ke salaka yawu. Yandi tubaka ti yandi zola Yandi, kasi yandi zola Satana. Yandi ke sambilaka nzambi ya mvwatulu, nzambi ya yinza, nzambi ya kento ya Hollywood. Yandi zola yandi, kasi yandi ke yinaka Ndinga ya Nzambi ya kieleka, yina kele Nzambi ya kieleka kaka yina kele.

Beno me bakula yawu na mabuundu. “Ya kele ve na yimbi. Bakento ya beto lenda sala *yayi, yina, to yankaka.*” Kasi na Mvwandulu ya Nzambi ya moyo, yandi kele ve na muswa ya kukwisa, kana yandi me balula ntima ve.

⁹³ Beno me mona, yandi kele nzambi ya kitoko ya yinza, yandi kele. Yandi zola kutala kitoko. Mpe yandi kele nzambi ya kitoko, kubanda mbandukulu. Yandi lunga, mpe me sala na luzabu ya yandi na science mpe na bisalulu, samu na kusala kitoko samu na yandi, nsungi ya mvwatulu yayi. . . nsungi ya bilumbu yayi, na kisika, ya dyabulu. Ya kele ya kusala kitoko.

⁹⁴ Beno tala. Ya kele noti yina ba ke talaka. Na mbandukulu, Seth mpe bana ya yandi ata mbala mosi ve kwendaka nzila ya science.

Ntangu yayi beto ke zonzila na yina me tala science baminuti fyoti. kana mu tuba yayi, ve na kulomba mulemvo na kukondwa kuzaba dyambu ya munu; kasi, nkonga ya bantu yina me zaba kima mosi ve, nyonso yina ke manga Ndinga ya Nzambi. Beno me mona? Kieleka.

Ya kele na yina ya beno ke noté. Beno tala yawu mbote. Bana ya Seth ata mbala mosi ve landaka nzila ya science. Bawu vwandaka mivungi ya kukikulumusa, bisadi bilanga, mpe nionso yina.

Kasi bana ya Caïn salaka. Samu na yinki? Yandi vwandaka na lutwadusu ya kimpeve na nzila ya papa ya bawu, diabulu. Caïn, vwandaka na lutwadusu ya kimpeve na nzila ya papa ya yandi, dyabulu, mpe bayayi vwandaka na lutwadusu ya kimpeve na nzila ya nkuna yina ke kulumuka.

⁹⁵ Beno tala mbote nkuna ya Nzambi yina ke landasana na konso nsungi, mpe beno tala mbote wapi kisika ya ke na kusuka bubu yayi. Baklisto, Baklisto ya kieleka, kele ve samu na kusosa-sosa ya science mpe nionso yina. Ve. Kaka minuti, beto ke kota na yawu.

Kasi Cain salaka, na manima ya nkadulu ya tata ya bawu, dyabulu, ya kufuluka na luzabu ya yinza, kitoko, mpe science, nyonso yankaka yina. Bana ya Cain vwandaka bantu ya science. Bawu longukaka. Bawu vwandaka bayina ke bulaka musiki—musiki; Elvis Presley ya bilumbu yayi, mwa bima yayi mutindu yina conseil ya lukolo ke banda na kupesa muswa awa na bala-bala konso Kilumbu ya sambanu na nkokila. Bitungi ya mbanza, bakento ya kitoko samu na kusepelisa bakulula ya bawu mosi, mutindu dyabulu ke pesaka bakento kupakula, mpe ke zenga nsuki ya bawu, mpe ke lwatisa bawu bakupe, mpe bima ya mutindu yina. Bawu, ya kele samu na kusepelisa bakulula ya yandi mosi ya mvindu. Ya kele mbala mosi kitoko mingi, kasi mu zaba ve mutindu yankaka ya kutuba yawu.

⁹⁶ Ntangu yayi, beto zaba ti nsangu ya mbote ya Satana kele nsangu ya mbote ya science mpe ntomoso. Yandi longaka yawu na kati ya Eden; Nzambi ve; Satana salaka yawu, science ya ntomoso. Science mpe ntomoso kele nsangu ya mbote ya Satana. Beno tala kisika yandi me twadisa beto bubu yayi, na yawu. Beno me mona?

⁹⁷ Beno tala, yandi longaka yawu na Eden, na nani? Na kento ya makwela ya Adam. Mpe yandi kubwaka samu na yawu. Yandi vunaka yandi na kuyuvulaka mosi ya Bandinga ya Nzambi. Beto mona yinki yandi zolaka tuba. Yandi zolaka tuba, “Ya kele ve science na kufwa, na dibuundu yayi ya santu.” To, “Beno ke vwanda na lukolo mpe me longoka, na kukwikila ve na bima ya buzoba mutindu lufwa. Mu ke kipe ve kana Ndinga ya Nzambi me tuba yawu; ya kele buzoba.”

⁹⁸ Oh, beno tala yandi bubu yayi. “Nzambi kele Nzambi ya mbote. Beno kele na kati ya dibuundu ya Yandi ya santu; na yina, beno lenda kufwa ve.” Kasi Nzambi tubaka ti beno ke sala yawu, mpe yina ke sukisa diambu. Beno me mona yandi bubu yayi? “Oh, beno vwanda kaka ya dibuundu. Ya kele ve yina beno ke salaka, to *yayi*, *yina*, to *yankaka*. Beno kwiza kaka na dibuundu mpe beno vwanda mambele ya mbote. Beno zenga nsuki ya beno, yina kele buzoba. Mpe kulwata bakupe, mpe kutula maquillage, mpe kubina, mpe kubaka mwa bierre ntangu mosi na yankaka, ke niongisa beno ve, kana beno me lutisa kitezo ya yawu ve. Ya kieleka, mu ke zola ti beno bana kubaka yawu, samu ti bawu longuka kana bawu zola yawu to ve.” Yandi yayi, nzambi ya nsungi yayi, nsungi yayi ya yimbi.

⁹⁹ “Nzambi kele Nzambi ya mbote.” Mu me kuwa yawu mingi tii mu ke bela. Nzambi kele Nzambi ya ludedomo. Yandi kele

ve kiboba mosi ya tata ya kulemba yina ba lendaka kupusa, mpe batekolo ya Yandi kele na disumu mosi ve. Yandi kele Nzambi ya ludedomo mpe ya busantu. Yandi siamisaka yawu na disamba ya Eden, na nzila ya bana ya Yandi ya ntete. Beno ke sabuka ndilu yina, ya Bandinga ya Yandi, beno kele ya kufwa. Kima mutindu mosi ke na kutalama bubu yayi.

¹⁰⁰ Mpe beno tala, yandi longaka mutindu yina ya bantu ya mayele, ya bantu nyonso, ya kulonguka, ya ke landila ntomoso na Eve, mpe kento ya makwela ya Adam kwikilaka yawu. Mpe yandi nungaka samu ti yina ba bokilaka kento ya makwela ya Klisto kumina mambu ya mambu, dibuundu ya Adam ya Zole, na milabu mosi yayi. Ya kele kieleka.

¹⁰¹ “Oh, ya kele ve—ya kele ve samu na Nzambi; Nzambi kele mbote mingi na kusala yawu. Mbote, ntangu nyonso yina beno ke kwendaka na dibuundu. ‘Kana nge me kwikila.’” Diabulu ke kwikilaka; bantu ya kukondwa ya lukwikilu ve, kasi yandi ke kwikilaka kaka. Yandi me vulukaka ve. “‘Kana nge me kwikila.’” Huh!

¹⁰² Yandi ke tuba na kento ya makwela ya zole, to Kento ya makwela ya Adam ya Zole, mutindu mosi yandi tubaka na ya ntete. Mutindu, “Ntangu yayi, kubeluka ya Kinzambi, ya kele ve na kima ya mutindu yina. Beto lenda siamisa yawu. Ya me vwandaka ata fioti ve na diambu yina me siamisama.” “Mpe mbotika yayi na Nkumbu ya Yesu, ntangu yayi beno ke bakula ve ti mu kele lutumu ya dibuundu?” yandi tubaka. “Beto me sukisa yawu na Nicée, na Rome,” ntangu bampeve tatu ya yimbi basikaka na dalango, baprofete ya luvunu, mpe nyonso yina. “Beto ke kwikila ti ya kele na butatu ya Banzambi.” Oh, samu na bumbote! Ya kele mutindu mumpani mutindu ya lendaka vwanda. Beno kwisa ata fioti ve na ntuala ya Nzambi na kima ya mutindu yina, beno meka kutelema na Mvwandulu ya Yandi. “Oh, ya ke sala ata luswaswanu ve kana beno me botama na bisalu ya ‘Tata, Mwana, Mpeve-Santu.’ Wapi luswaswanu ya ke sala?”

¹⁰³ Ya salaka luswaswanu mingi, tii Paul pesaka muswa nkonga ya ba-Baptiste ti bawu fwana botama dyaka na Nkumbu ya Yesu Klisto ntete Mpeve-Santu kukwiza na zulu ya bawu. Mpe salaka mpe ntumwa yina kuboka, mpe tubaka, “Kana wanzio katuka Mazulu mpe longa kima yankaka, ti yandi vwanda ya kusinga.” Kieleka, ya ke sala luswaswanu. Oh, la la!

¹⁰⁴ “Ya kele ve na kima mutindu mbotika ya Mpeve-Santu na bilumbu yayi. Ya vwandaka kaka samu na bantumwa. Ya me luta. Mpe kima mutindu baprofete? Ya kele kwandi ve ya kuzabana. Bimangu? Yawu kele ve na lufulu ya science. Malachie 4? Ya vwandaka samu na nsungi yankaka. Jean 14:12? Oh, Yesu zolaka ve kutuba yawu kieleka. Luc 17:30? Oh, yina vwandaka

kaka disolo ya luvunu. Beno me mona, ya—ya kele kutendula yimbi; ya vwandaka ve na ya ntete.” Buzoba ya mutindu yayi!

Ntangu Nzambi ya Ngolo nyonso ke kulumuka na kati-kati ya beto mpe ke lakisa yawu. Ntangu Yandi ke tuba, ti, “Yesu Klisto kele mutindu mosi mazono, bubu yayi, mpe kukonda nsuka,” Yandi ke talisa yawu mutindu yina. Mu ke kipe ve nani ke tuba samu na yawu; Nzambi ke tendula Ndinga ya Yandi Mosi. Yandi tubaka ti Yandi ke sala kima yayi na bilumbu ya nsuka. “Ya ke vwanda na Nsemo na ntangu ya nkokila.” Mpe Nsemo kele, samu na kumonisama ya Mwana ya Nzambi.

¹⁰⁵ Mwini mosi yina ke basikaka na esete kele mwini mosi yina ke lalaka na wesete. Profete tubaka, “Ya ke vwanda na kilumbu yina ba ke bokila ve kilumbu to mpimpa.” Ya kele matuti, matuti, mutindu na zulu ya kizizi ya mwini. Kasi yandi tubaka, “Pene ya ntangu ya nkokila ya ke kwiza dyaka Nsemo.” Mwana mosi! Yandi kele Alpha mpe Omega. Mwana mosi yina telamaka na esete ba zabisaka yandi na ntwala na kuvumbuka na wesete dyaka, na bilumbu ya nsuka, kaka ntete kilumbu kusuka. Mu zaba ve mutindu bawu ke tendula Yawu; Nzambi ke tendula Ndinga ya Yandi Mosi. Yandi ke siamisama Yawu. Yayi kele ntangu ya nkokila.

¹⁰⁶ Ya kele mawa, kasi kieleka yandi me kubwa na pano samu na yawu dyaka. Kento ya makwela ya Klisto kubwaka na pano samu na yawu, mpe bakaka luzabu ya mayela ya mulongi mosi ya seminere na kisika ya kukwikila Ndinga ya Nzambi ya kuvedila, yina me siamisama.

¹⁰⁷ Ntangu yayi milongi kuna na yinsi kisika nyonso beno kele, beno lenda wisana ve na Yayi. Mu ke na kulwadisa beno ve. Mu ke meka kaka . . . Mu ke na kutuba na kimvuka ya munu mosi. Mu ke na kumeka kaka . . . Kana beno zola kuvwanda, kieleka mu ke sepela samu na beno na kuwa Yawu. Mpe ntangu yina beno kuwa Yawu. Beno me mona? Kasi mu ke tuba kaka na bawu yina bawu me—yina bawu me mona, mpe na kutalisaka yawu na bawu; Nzambi na kusiamisaka yawu, ti ya kele kieleka. Beno me mona?

Yayi kele ngunga. Beno vwanda ve na nsatu ya muntu mosi samu na kutendula Yawu. Luzabu ya beno ya yinza ke sala kima mosi ve . . . Beno fwana vwanda na Licence na Lettres, Doctorat na Théologie, Grade ya Associé, to ya lenda vwanda yina ya lendaka vwanda; ya zola kutuba kima mosi ve. Nzambi ke tendulaka Ndinga ya Yandi, Yandi mosi. Yandi silaka yawu, mpe yawu yayi.

¹⁰⁸ Kasi na luzabu ya seminere, kulonga ya denomination, “yina me sala ti yinza ya muvimba kuyituka na manima ya kibulu yina mputa ya lufwa belukaka,” kubanda na mumpani na bupape. Beno me mona kisika yandi ke kusuka? Yandi ke kwikila yawu. Yandi ke kwikila luzabu yina yandi ke tuba na yandi.

¹⁰⁹ Ya kele, ntangu yayi beno tala mbote, ya kele nzila nyonso zole yina kwikilaka Satana kele luzabu ya Ndinga ya Nzambi. Kento ya makwela ya Adam kwikilaka ti Satana kele luzabu yina me telemina Ndinga ya Nzambi, mpe kento ya makwela ya Klisto me kwikila ti Satana kele luzabu, na nsungi yayi ya mayele ya yimbi, na kutelemina Ndinga ya Nzambi.

Mpe beno tala. Eve, na kimuntu, yina kwikilaka yawu, mpe nataka dikanda nyonso ya bantu na lufwa. Kento ya makwela ya yinza! Adam, muntu ya yinza ya ntoto; kento ya yandi ya makwela, na ntwala yandi kuma na yandi, samu na kuvwanda kento ya yandi, samu na kulosa na lufwa dikanda nyonso ya bantu. Ya lenda vwanda ya kele science to ve, beto ke kufwa kaka mutindu mosi, mpamba ve ti Nzambi tubaka ti beto ke sala yawu.

Ata ti beno kele na Eden ya santu, to dibuundu ya santu, to denomination ya santu, to nyonso yina ya lendaka vwanda, beno ke kufwa kilumbu yina beno ke kwikila ve na Ndinga ya Nzambi mosi samu na kuvwanda Kieleka, ntangu Yawu me siamisama mpe me siamisama na beno. Ya kele kilumbu beno ke kabwana beno mosi na Nzambi. Ve kaka nsasa nyonso; Ndinga mosi. “Muntu nyonso yina ke bwela ndinga mosi, to ke katula Muntu Mosi,” ya kele kilumbu beno ke kufwa.

¹¹⁰ Beno tala, kento ya makwela ya Adam nataka lufwa ya yinza na dikanda ya yandi, dikanda ya bantu.

Mpe kento ya makwela ya Zole ya Adam, Kento ya makwela ya Klisto yina kuzwaka nsilulu ya makwela, me kota na dibuundu ya muvimba tii na lufwa ya denomination, samu na kubaka kidimbu ya kibulu, na nzila ya science, ya mayela, ya ba-dénomination ya nene. “Beto kele ba-Baptiste. Beto kele ba-Presbytérien. Beto kele ba-Pentecotiste,” mpe nyonso yina. “Beto kele na *yayi*, mpe beto kele ya bima mingi. Beto, ba me pesa beto ve na luyalu. Beto nyonso kele bisika nyonso na yinza,” mpe bima nyonso ya mutindu. “Mpe ya kulutula mbote, mpe mfumu ya mbanza, mpe nyonso yina, ke kwiza na beto. Ata mpe Ntwadisi ya yinsi me kwisa samu na kutuba na beto, mpe beto me kuma na *yayi*, *yina*, to *yankaka*.” Yinza ya muvimba me losama na lufwa ya kimpeve, ya denomination; dibuundu ya muvimba. Yandi me kufwa!

Beno ke tuba, “Nge ke na kunungaka kizunga ya mvimba.”

¹¹¹ Yesu tubaka, “Mutindu ya vwandaka na bilumbu ya Noé, kisika mioyo nana kuzwaka mpulusu, mutindu mosi ya ke vwanda na nkwezulu ya Mwana ya muntu.” “Na bilumbu ya Lot, kisika ba basisaka tatu na Sodome, na kilumbu yina. . .” Ntangu yayi ya kele yimeni na nkonga yina me basika yimeni, beno bambuka moyo. “Kasi, mutindu ya vwandaka kuna, ntangu Mwana ya muntu ke monisama.” Beno tala wapi kilumbu, beno tala kisika beto ke na kuzinga!

¹¹² Ntangu yayi yandi me sala ti yinza ya muvimba kundima lutwadusu ya luzabu ya yinza ya manaka ya malongi ti Satana me pesa yandi na yisi ya nkumbu ya dibuundu, lutwadusu ya malongi, manaka ya luzabu ya yinza. Mu ke kutangunaka na beno nzambi ya yinza yayi.

Ntangu yandi, mutindu Eve, vwandaka kieleka ya kifuluka ya mvimba na Ndinga ya Nzambi na diboko ya yandi, yandi zolaka kuzwa Ndinga ya Nzambi. Kasi yinki yandi salaka na Yawu? Na kisika ya kuingilaka samu na mbotika ya Mpeve-Santu, yandi me bika science talisa na yandi ti Mpeve-Santu vwandaka kaka samu na bilandi.

Na kisika ya kukeba kubeluka ya Kinzambi na kukwenda na ntuala, ntangu yandi zolaka vumbula bantu ya kufwa mpe na kusalaka bimangu ya nene; yandi me bika Satana, na yisi ya lutwadusu ya yandi ya musambidi, kubaka Ndinga ya Nzambi mpe kumeka kutuba ti Yawu vwandaka samu na nsungi yankaka. Mpe yandi me kwikila yawu.

¹¹³ Ntangu, Biblia ke tuba, “Bima yina Mu ke sala beno mpe ke sala.” Yesu tubaka yawu. “Beno kwenda na yinza ya muvimba mpe beno longa Nsangu ya mbote na bantu nionso.” Beto kele kaka bivangu. “Bidimbu yayi ke landa bayina nionso ke kwikila.” Yandi ke manga Yawu nionso.

¹¹⁴ Yandi ke manga nionso ya kimpeve, mpe yandi ke manga Yawu samu na dibanza ya yandi ya mayele ya Biblia; kisika banganga-nzambi, mpe bayina ke banza kuvwanda, batata ya longo, kisika ba-évêque, ba-archevêque, kisika ba-surveillant ya kizunga, ba-surveillant général, mpe nionso yina, me tula ntendulu ya bawu mosi na Yawu. Mpe Nzambi bikaka bawu, ya kuvwanda kuna, ya kufwa mutindu ngunga kumi na zole na mpimpa.

Bima mosi kaka me bikana na bilumbu ya nsuka kele nkonga ya ba-Pentecotiste na mwa nkonga ya miziki ba ke tambusa na mutindu mosi ya ngolo mingi mutindu bawu lendaka, ke kima mbangu bisika nionso na kati ya kivinga, ke tuba na bandinga mpe ke boka, “mpe ke lakisa mutindu ya kinzambi, kasi ke manga Ndinga ya yawu.” Beno tuba na bawu na kubotama na Nkumbu ya Yesu Klisto; ba ke seka beno na mantwala ya beno. Kasi, ti, Nzambi ke landila kaka na kusala yawu mutindu mosi kaka, na kusiamisaka Ndinga ya Yandi na kuvwanda mutindu yina.

¹¹⁵ Beno tala, yinti yina Satana salaka ti Eve kukota, vwandaka “yinti ya mbote mpe ya yimbi.” Ya vwandaka yinti ya kuvukisa.

Ntangu yayi beno tala kilumbu yina beto ke na kuzinga, ntangu Yandi ke na kubokila Kento ya makwela. Yandi kele na dibuundu yina ke tubaka ti yandi ke sala mbote, ntangu ya kele yimbi, na kumangaka Ndinga. Yinti ya kuvukisa na kati ya potopoto. Oh, beno tuba, “Bawu—bawu kele na bimvuka ya nene.

Bawu—bawu—bawu—bawu ke sadisa *yayi*. Mpe ba-Croix Rouge ke siamisaka yawu. Mpe balukolo nyonso, bawu . . . Beno tala awa!”

Oh, kasi beno manga kaka Ndinga mosi, ya kele kaka yina beno fwana sala na kufwa; ya lenda vwanda yinki mutindu mayela, wapi mutindu mbote ya kele. Yesu tubaka, “Mwa levire ya fioti ke vimbisa pati.” Mwa ndambu ya levire ke bebisaka pati. Ndinga mosi ya Nzambi, yina ba me katula na kisika, ke bebisa Tablo nionso. Yinki ke vwanda samu na diboko ya munu wapi kisika dikulu ya munu lendaka vwanda? Beno me mona? Yinki kana dikutu ya munu vwandaka awa kisika diboko ya munu fwana vwanda? “Mwa ndambu ya levire ke vimbisaka pati.”

Beno ke tuba, “Wapi mutindu beno ke zaba ti Ya kele kieleka?” Nzambi ke siamisaka Yawu kieleka. Yandi ke siamisaka Yawu. Yandi tubaka Yawu awa na kati ya Ndinga, kuna Yandi ke siamisaka Yawu. Ya kele mutindu beto zaba ti Ya kele kieleka to ve.

Beno manga kaka Ndinga mosi kele nyonso ya ke lomba na kufwa. Ya nataka bandandu mosi na nsungi ya yimbi yayi, lufwa ya kimpeve, mutindu ya salaka lufwa na dikanda ya bantu nyonso.

¹¹⁶ Beno tala wapi mutindu Satana kuzwaka nsungi yina ya science kuna na manima, ya Noé, na kuyekama na zulu ya lubakusu ya bawu mosi. Huh! Biblia ke tuba na beto, na Proverbes, “Kuyekama ve na lubakusu ya beto mosi.” Mpe, “Ti konso ndinga ya muntu kuvwanda luvunu, mpe ti Nzambi vwanda kieleka.” Kasi Satana, na luzabu ya yandi, kubanda na mbatukulu na disamba ya Eden, nataka bantu na kuyekama na zulu ya lubakusu ya bawu mosi. Mpe, beno zaba, na nzila ya bisalu ya yandi ya nene ya Max Factor yina yandi vwandaka na yawu kuna, yandi kuzwaka bakento kitoko mingi ti ya salaka ti mwana ya bakala ya . . . bana ya Nzambi, na kisika, na kubwa na disumu mpe kukwelana na bawu. Kieleka. Yandi . . . Bakento vwandaka kitoko mingi, ya kulutila kitoko mingi.

¹¹⁷ Ntangu yayi beno baka kento ya mutindu kento nyonso na bala-bala bubu yayi. Mingi ya beno me tangaka disolo yango; beno me kuwaka yawu ata fioti ve, mpamba ve ya vwandaka na ntwala ya bilumbu ya munu. Pearl O’Brien, bantu yikwa me kuwaka yandi? Kieleka. Yandi zolaka vwanda kento ya kulutila kitoko ya yinza. Na yina, ya kele ve na mwana ya lukolo yina kele na lukolo bubu yayi kasi yina kele bambala zole kitoko mutindu yandi vwandaka. Samu na yinki ya kele? Kitoko ya bakento ke salama na bilumbu ya nsuka.

Ba me zenga bansuki ya bawu. Ba me tula yawu na mwa ba-robe ya bana ya bakento. Ba ke lwataka bakupe, mpe ba-bikini, mpe nionso yina beno ke bokila yawu, ba ke lwataka. Bawu ke tulaka maquillage, mpe na lulendo, mpe bima yayi nionso, samu na kusala bawu kima yina bawu kele ve. Beno me mona? Kasi na

nzila ya luzabu ya yinza ti bawu vwandaka na kiyeka ya kusala yayi. Beno zaba ti ba ke futa mbongo mingi samu na cosmetique samu na bakento, kulutila yina kele, na Etats-Unis, bambala zole to tatu, kulutila yina beto ke basisaka samu na madia? Ba me talisa yayi, ya kieleka, samu na ba-cosmetique.

¹¹⁸ Beno tala, “Bana ya babakala ya Nzambi kumonaka bana ya bakento ya bantu,” bana ya bakento ya Nzambi ve, “bana ya bakento ya bantu, ti bawu vwandaka kitoko,” mpe ya salaka ti bana ya Nzambi kubwa na nzimbani yayi. “Mpe bakaka mutindu ya bakento yina mpe kwelaka bawu,” mpe ya nataka nsungi ya kindumba, kaka mutindu ya kele bubu yayi; mutindu ya vwandaka na Sodome, mutindu ba zabisaka yawu na ntwala ti ya ke vwanda bubu yayi.

Ti, ntangu babakala mpe bakento ya kilumbu yayi ke sobasana bakento. Kana bawu zola ve kento yayi, bawu—bawu ke kwenda na Reno, Nevada, mpe ke kwelana; mpe, to kuzwa kufwa makwela, ti mosi, mpe kukwela dyaka na baminuti kumi na tanu. Mpe bakento ya kitoko ya kulutila ti na kutala kele bayina ke manga ve. Mpe yinki ya kele? Dyabulu! Beno me mona Satana dyaka na kitoko? Beno tala.

¹¹⁹ Beno tala, disumu yina ba lemvokilaka bawu yawu ata fioti ve. Nsungi yango ya kitoko, ya science vwandaka nsungi ya yimbi mingi yina Nzambi bebisaka na ntwala ya ntoto; nsungi yango ya kitoko, ya science. Yesu tubaka ti ya ke vwanda dyaka yawu ntete nkwizulu ya Mwana ya muntu. Ya kieleka? Beno tala, Yesu tubaka, “Mutindu ya vwandaka na bilumbu ya Noé, mutindu mosi ya ke vwanda na nkwizulu ya Mwana ya muntu,” ntangu bawu nyonso mekaka na kukwela. . . Ntangu yayi beno tala mbote, “Bana ya babakala ya Nzambi kwelaka bana ya bakento ya kitoko ya bantu,” mpe ata mbala mosi ve ti Nzambi lemvokilaka bawu samu na yawu.

¹²⁰ Kaka mutindu mosi na malongi ya Balaam, ti yandi nataka bakento ya kitoko, ya mayela, ya science ya Moab na . . . na meso ya yandi yina ke bendaka, mukubu ya yandi mpe baputulu, bamananasi ya yandi ya nsunga ya ngolo, samu na kuvunaka bana-babakala ya Nzambi; samu na kutelemina bakento ya bawu mosi ti bisalu mpe maboko kumaka ngolo mutindu kisengo, yina vwandaka tula ve maquillage. Ba vunaka bawu, mpe, “Beto kwelana mosi na yankaka, samu ti beto nyonso kele bantu mosi.” Yina vwandaka luvunu! Ya vwandaka luvunu, mpe kusalu ya dyabulu, samu na kunata bana ya Nzambi na kukwela bana ya bakento ya bantu.

Ya vwandaka luvunu ya dyabulu, samu na Balaam, profete yango ya luvunu, samu na kumeka na kupesa profesi na zulu ya Moise yina mekaka na kukebaka dikanda kintwadi; samu na kutuba, “Mbote, beto ke kwikilaka Nzambi mosi. Beto ke

pesaka makabu mosi. Beto kele na minkayulu mosi. Beto ke salaka nyonso kaka mutindu mosi.”

“Ya kulutila pene-pene ti ya ke vuna bantu ya Kusolama kana ya lendaka salama.” Beno me mona? [Kisika ya mpamba na bande—Mu.] Beno me mona? Beno vwanda na nkebolo na ntuala ya yandi, bantu! Beno kele ve na kima ya kusala na yandi!

¹²¹ Beno tala, ya vwandaka ve mutindu mosi ti Nzambi zolaka tendula Ndinga ya Yandi na nsungi ya yimbi ya Cain. Ve. Nzambi lendaka ve kutendula Ndinga ya Yandi na bawu. Beno tala. . . [Kisika ya mpamba na bande—Mu.]

Nzambi, luzabu ya yandi lendaka kusala yinza ya kulutila kitoko mpe ya kulutila science mpe ya kulutila disumu ti, Yandi zolaka bebisa yawu? Nzambi zolaka sala yawu, kusala yinza ya kulutila kitoko mingi; beno tala awa, Nzambi ke sala bana ya Yandi ya bakento ya kulutila kitoko mingi, mpe zolaka lwatisa bawu bilele ya kulutila sexy, ti bana ya Yandi ya babakala ke lula bawu mpe ke sala kindumba? Yinki? Nzambi ke sala kima ya mutindu yina?

Nkonga yayi ya Laodicée kinkonga, ba me katula bilele, na kusambilaka nzambi ya yinza yayi, na nzila ya binkulu ya bawu, mpe malongi ya lukolo, mpe balenda ya kulengula, mpe ya kitoko! “Beno basika na kati ya yandi,” Biblia ke tuba, “beno vwanda ve ya kuvukana na masumu ya yandi, mpe beno yamba ve bampasi ya yandi.” Kilumbu mosi Nzambi ke nokisa mvula ya matadi, yina kitini ya mvula ya matadi ke vwanda na bakilo pene ya makumi yiya na tanu, mpe ba ke bebisa yandi na kulosaka yandi matadi; mutindu Ndinga ya Yandi ntangu nyonso ke tubaka ti Yandi salaka, misiku ya Yandi.

Mbote, kana Nzambi salaka kima mutindu yina, monisaka Ndinga ya Yandi na bantu ya mutindu yina, Yandi ke—ke telemina lukanu ya Yandi Mosi. Nzambi kele ve bulawu. Yandi kele yinto ya ndwenga nyonso.

Na yawu beno me mona wapi kisika kima yina katukaka? Ya katukaka na Satana, mpe ya kele kaka ya Satana. Mpe dibuundu me kwikila yawu.

¹²² Ntangu yayi beno me mona, bakento, mu ke na kumeka na mutindu ya munu ya mbote na kotalisa beno Ndinga ya Nzambi. Biblia ke tuba, “Kana kento zenga nsuki ya yandi, yandi ke zitisa ve yintu ya yandi,” yina kele bakala ya yandi. Mpe bakala ya yandi kele yintu, na Nzambi, na yawu yandi ke zitisa ve Nzambi mpe bakala ya yandi.

¹²³ Ntangu yayi yayi ke talisa nani kele yintu ya sysiteme ya dibuundu ya yinza yayi. Yina ke talisa nani kele yintu ya yawu. Ya kele Satana, na mutindu ya muntu ya nene, muntu ya luzabu, luzabu ya kulutila. Yandi zaba mingi kulutila bayankaka nyonso ya bawu. Ya lenda vwanda nyonso yina Ndinga ke tuba, yandi—

yandi kele na ntendulu ya yandi mosi na Yawu, beno me mona, ntendulu ya nsungi yayi ya yimbi.

¹²⁴ Beno tala manaka ya yandi samu na kutunga dibuundu ya nene ya ba-denomination, Conseil Mondial ya Mabuundu, beno me mona, denomination ya nene, samu ti yinza nyonso kusambila yandi, kibulu, na yisi ya nkumbu ya Buklisto ya kuvukana. Beno ke zola kutanga yawu na Biblia? Apocalypse 13:6 mpe 8. Ya kele yinzo ya yinda ya Babel ya bilumbu yayi.

¹²⁵ Beno ke bambuka moyo ve yinki mutindu Nimrod yina, muntu ya luvunu yina, kutunga yinzo ya yinda yayi ya nene mpe salaka ti mwa bambanza nyonso yankaka kufuta mpaku na yawu? Babile mpe Babel kele kima mosi. Ya ke soba kaka bankumbu ya yawu, mpe, mutindu ya ke mata. Ya kele, Rome ntangu yayi kele Babylone. Mpe yinza ya muvimba me natama na Babylone, mpe ya me natama na Kimvuka ya Yinza ya Mabuundu yina ke sala bawu nyonso kufukama na yandi. Mpe beno me baka kidimbu ya kibulu, na kuzabaka ve yina beno vwandaka sala. Samu. . .

Kasi bayina kele ya kusolama ke kuwa Ndinga mpe ke basika na yawu.

¹²⁶ Wapi mutindu denomination kele luswaswanu ya Ndinga ya Nzambi! Yandi salaka ata fioti ve na mosi, ata fioti ve na kati ya mosi, mpe Yandi me salaka ata fioti ve na mosi. Mu zola ti muntu mosi ya masolo kutalisa na munu mbala mosi yina profete me basikaka na dibuundu. Beno talisa munu kisika Nzambi sakumunaka dibuundu mosi yina vwandaka. . . na manima ba bongisaka yawu. Yandi kwendaka na lweka ya dibaya mpe kufwaka na manima ya kuzwa ndwenga ya mayela ya dyabulu, na nzila ya bantwadisi ya bawu, mpe mangaka Ndinga ya Nzambi mutindu Yawu kulaka na ntela ya kulunga ya Klisto. Ntangu yayi ya me kuma na yintu. Wapi mutindu ya kele luswaswanu!

Beno kabuka na Eve yina ya kukondwa lukwikilu, beno bana ya Nsemo ya nkokila!

¹²⁷ Satana, nzambi ya nsungi yayi, na nzila ya luzabu ya yandi, na kunataka bantu na kudya na yinti ya yandi ya kuvukisa ya mbote mpe ya yimbi. Beno tala, Satana, na nzila ya luzabu ya yandi, salaka ti bantu ya nsungi yayi ya yimbi kudya na yinti ya yandi ya mbote mpe ya yimbi. Yandi tubaka ti yandi ke na kutunga civilisation ya kulutula nene ya Muklisto, na luzabu ya yandi ya mbote mpe ya yimbi, civilisation ya kulutula nene ya Muklisto.

¹²⁸ Kasi mwa Mwense ya Klisto, Ndinga, Mameme, Kento ya makwela, ke kipe ve luzabu ya yandi. Yandi ke keba, yandi, na kimpwanza ya yandi. Yinki kele. . . Ntangu yayi beto zonzila na yina me tala Yandi, minuti mosi. Yandi ke vingila Mfumu ya Yandi mpe Millenium ya Yandi ya makwela, kieleka, na

Ndinga Bakala ya makwela, mutindu Yandi kele Ndinga Kento ya makwela.

¹²⁹ Luzabu mpe civilisation, mpe Buklisto ya kieleka, kele na kima ve na mutindu nyonso. Civilisation, mpe Buklisto ya kieleka, kele ve na kima mosi na mutindu ya mumesanu.

Civilisation kele na nzila ya luzabu. Beto nionso me zaba yawu. Mpe luzabu me katuka na Eden, me talisa yawu, na nzila ya yina yandi longaka na Eden. Mpe luzabu ke nataka lufwa. Ya kele kieleka? Yinki nataka lufwa na nsaba ya Eden? Luzabu. Kasi ya lenda vwanda ve ya Nzambi, na yawu ya kele ya dyabulu. Fiou, ya vwandaka mosi ya mbote! Luzabu, science, ndongosolo, kele disakuba ya kulutila nene yina Nzambi me kuzwaka ntete ve. Ya kele ya dyabulu.

Ntangu yayi mu ke kuzwa mwa mikanda na zulu ya yawu, mu zaba. Mu ke na kuingila yawu.

¹³⁰ Beno tala na wapi kisika yina civilisation nataka beto ntangu yayi. Beno me mona? Beno tala yina yawu salaka. Wapi kisika beto kele? Beto me yekama na bima yina, na nzila ya lubakusu ya beto mosi na nzila ya science ya beto.

Beno ke tuba, “Wapi mutindu samu na Nzambi, beno ke banza ti Yandi kele kukondwa kuzaba?” Oh, ve.

Nzambi ke vwandisa mutindu ya Yandi Mosi ya civilisation na zulu ya ntoto, ntangu Yandi ke baka yawu. Yayi kele yinza ya Satana; yandi kele nzambi ntangu yayi na luzabu ya yandi ya yinza ya science. Kasi Nzambi ke vwandisa mutindu ya Yandi Mosi ya civilisation. Ya ke vwanda civilisation ve mutindu yayi. Beno bambuka kaka moyo na yawu. Ya ke vwanda ve mutindu ya civilisation yina beto ke na yawu bubu yayi. Ve, ve. Ya ke vwanda landila Ndinga ya Yandi mpe lukanu ya Yandi. Samu, nzambi ya nsungi yayi ya yimbi ke bebisama, mpe kimfumu ya yandi na yandi.

¹³¹ Nsungi yayi ya zola ya luzabu ya bilumbu yayi zolaka kuzwa ve ntwadisi ya kulutila mbote na yina bawu kele na yawu, Satana, kubeba ya Ndinga ya Nzambi, mutindu yandi bandaka na kati ya disamba ya Eden, kasi musambidi yina ke na kuyekama na lubakusu ya yandi mosi.

Mutindu mu tubaka na ntwala, Proverbs 3:5, ti, “Beto kele ve ya kuyekama na lubakusu ya beto mosi.”

Bawu fwana vwanda na nzambi, samu ti bawu kele bantu. Kasi, yandi ke salaka bawu yina bawu zola. Mutindu muntu, ntangu nyonso, bantu nyonso. . . Ntangu beto ke kwiza awa, beto ke tala ba-Indien ke sambilaka biteki, mpe mwini, mpe nyonso. Mutindu muntu, bawu fwana kuzwa nzambi. Na yawu nsungi yayi ya nene ya mayele fwana kuzwa nzambi, na yawu ya me kuma. . . Nzambi ya yinza yayi me kuma luzabu, denomination,

science, “ke lakisa mutindu ya kinzambi, kasi ke manga Ngolo ya yawu.”

¹³² Beno tala, nzambi ya bawu ke salaka kaka bawu yina bawu zola. Bawu ke lula samu na nsuni, mpe ya kele yina yandi ke pesaka bawu. “Bawu zola kulwata babikini. Beno bika bawu lwata yawu. Beno me mona? Kana bawu zola kusala *yayi to yina*, beno bika bawu sala yawu. Ya kele ve yimbi na kati ya yawu; bawu ke kwendaka na dibuundu. Mama ya bawu vwandaka Methodiste, Baptiste, Pentecotiste, Presbyterien. Beno bika kaka bawu swi.”

Ya kele nzambi ya nsungi yayi; ya mayela, ya ndwenga, ya science. Ya kele na nsatu ya lukwikilu ve. Ya kele ve na nsatu ya kusiamisa kima mosi. Ya kele yimeni ya kusiamisa, na nzila ya luzabu ya bawu. “Mbote, beto kele dibuundu ya kulutila nene yina kele na kati ya mbanza,” luzabu ya bawu. “Pasteur ya beto kele na Doctorat ya Théologie ya Théologie, ya Philosophie” Beno me mona, beno vwanda na nsatu ya lukwikilu ve; ya ke na kuyekama na zulu ya luzabu. Ti bawu zinga mutindu nyonso, ntangu nyonso bawu ke kwiza sambila yandi na nzila ya denomination ya bawu mpe credo ya bawu. Ya kele na disu mosi ya nene ya ndombi kuna, kasi beno tala yawu.

Ke seka Ndinga ya Nzambi, ke tuba bima ya kuswaswana na Ndinga; mpe ke meka, na nzila ya luzabu ya bawu, samu na kusiamisa luzabu ya yinza ti Ndinga kele ve kieleka. Oh, wapi nsungi beto ke na kuzinga! Beno me mona nzambi ya nsungi yayi?

¹³³ Beno tala, kasi Nzambi ke na kuingila tii disumu ya nkú ya ba-Amoréen yayi ya bilumbu yayi me fuluka. Beno vwanda na boma ve, Yandi ke kubika Moise ya Yandi na ntangu yina. Ya ke vwanda na exode mosi, kilumbu mosi, na yinsi ya nsilulu. Ya ke vwanda na Moise yina kwisaka kuna, yina ke bokila, “kuvutula Lukwikilu ya bana na batata.” Ya ke kwiza, mosi ya bilumbu yayi. Ve. . .

Beno ke tuba, “Mbote, beno tala mutindu beto ke na kukwenda na ntwala.”

Kieleka, disumu ya nkú ya Amoréens kele ntete ve ya kifuluka. Ya ke kwiza, mosi ya bilumbu yayi. Ti bawu kubebisa bawu mosi.

¹³⁴ Civilisation, luzabu, kubeba Ndinga ya Nzambi samu na kulunga ntomo ya bawu mosi. Konso denomination ke salaka mutindu mosi. Satana na manima ke longi nsangu ya yandi ya mbote ya luzabu na dibuundu ya yandi mosi.

¹³⁵ Ya kele kaka na bakategoli zole ya bantu yina zonzaka na Ngwisani ya Malu-malu. “Bana ya Nzambi, mpe bana ya dyabulu.” Beno zaba yawu? Beno zola kusonika Masonuku samu na yawu? Ya Ntete ya Jean 3:10, kana beno zola Masonuku. Mu ke

tanga kaka yawu awa, mu sonikaka yawu. Mbote mingi. Mbote mingi.

¹³⁶ Na Ephésiens 2:2, ba me bokila bawu, “Bana ya kukondwa kutumama.” Mutindu Ève vwandaka, ya kutumama ve na Ndinga ya Nzambi. Bana ya kutumama, mpe kukondwa kutumama, kele na kima ve na mutindu nyonso.

Na yina yinki mutindu Kento ya makwela ya Klisto ke vukana na kati ya denomination, na ntangu ti mosi kele ya kutumama ve mpe yankaka ya kutumama? Yinki mutindu mosi, ke vwanda Ndinga; mpe mosi yankaka yina, ndinga ya ba bebisaka? Yinki mutindu kento ya kindumba mpe kento ya kuvedila ke tambula kintwadi na ngwisani? Bawu lenda ve kusala yawu. Bawu kele ve na kubundana na nyonso. “Beno basika na kati-kati ya bawu!” Ya kele ya dyabulu. Ya kele kidimbu ya kibulu. Beno kota kaka na kati ya yawu ntangu yayi; ba-dénomination nyonso. Mu ke kipe ve nani ya kele.

Nzambi ke na kubaka, denomination ve, “bantu samu na Nkumbu ya Yandi.” Denomination ke ndima ve Bakieleka yayi. Ya ke lomba muntu yandi mosi yina lenda mona Nzambi, beno tala Ndinga ya Yandi mpe beno kwikila Yawu, mpe kele ya organisation mosi ve; kasi kuzinga samu na Nzambi, samu na organisation ya yandi ve, ndwenga ya mayela ya évêque mosi to kima mosi me longa yawu. Ya kele kieleka.

¹³⁷ Bana ya kukondwa kutumama, mpe bana ya kutumama, kele na kima ve na mutindu nyonso. Mosi ya . . . kele ya kilumbu ya Nsemo; mosi yankaka yina, ya mpimpa mpe ya mpimpa, nsungi ya yimbi, nsungi yayi ya yimbi ya mpimpa, Ba-bwati ya mpimpa, makinu ya nkokila, kasi beno kele kaka mambele ya dibuundu. Ya kele mbote na nzambi ya bawu. Bawu kele ve na lufundusu samu na yawu; kima mosi ve ke kwamisa bawu.

“Kasi, ya ke fundisa munu ve na kuzenga bansuki ya munu,” kento mosi tubaka. “Beno nyongisa ve konsiansi ya munu.” Yandi kele dyaka ve na konsiansi kulutila nyoka kele na luketo. Ya kele kieleka. Ya kieleka ve. Yandi zaba ve yina konsiansi kele. Yandi kumaka na ntima ngolo tii yandi zaba ata fyoti ve yina ya kele. Ya kieleka.

¹³⁸ Na kutambulaka bisika nyonso, na zulu ya Ndinga ya Nzambi, na kutubaka, “Mbote, yina kele mwa kima ya ntama. Kukwenda kuna ve; ba kele kaka nkonga ya makelele mpe ke sala makelele, na mutindu nyonso.” Huh! Mu zaba mingi ve na yina me tala Nzambi kulutila Hottentot lenda zaba mpimpa ya ba-Egyptien. Ya kieleka. Ya kele kieleka.

“Ke lakisa mutindu ya kinzambi, kasi ke manga Ngolo ya yawu; ke kwenda ntama na bantu ya mutindu yina. Samu yayi kele mutindu yina ke kwendaka na yinzo na yinzo, mpe ke twadisa bakento ya buzoba.”

“Oh, ya luzolo, nge kele, nge fwana sala *yayi*. Oh, ya luzolo, mu banza mulongi ya nge ya ntama ya buzoba kuna, kana kaka nge. . . Oh, nge ke vwanda kitoko na kini,” to nionso yina beno ke bokilaka kima yango. “Beno, kana beno sala nyonso *yayi, yina*, mpe *yankaka* yina. Mbote, mwa dikaya mosi ke talisa muntu ve mpasi. Mu kele mambele ya dibuundu, mpe beno zaba ti denomination ya beto kele yina ba ke zitisaka mingi kulutula ya muntu nyonso.” Beno kwikila ve ti muntu ya luvunu ya ntama yina me pakula. Yandi ke vuna beno. Ya kele kieleka. Yinga, tata.

¹³⁹ Ya kele mbote na nzambi ya bawu. Oh, yandi ke banza ti ya kele mbote, mpe bawu ke zolaka kaka yandi samu na yawu.

Oh, la la, ba ke swana na beno. Ba ke telama kaka kuna mpe ke swanisa beno samu na yawu. Mbote, kieleka, Satana telamaka kaka na ntuala ya Yesu Klisto, Ndinga, mpe mekaka na kutuba, “Ya kele ya kusonama.”

Mpe Yandi vwandaka kuna, Ndinga ya Nzambi yina me siamisama. Yandi tubaka, “Kwenda ntama ya Munu, Satana!” Kwenda kaka mpe sala kima mutindu mosi.

Mutindu muntu mosi tubaka na munu kilumbu mosi, yandi tubaka, “Ntangu yayi, kana nge ke kwikila ti mbotika ya Mpeve-Santu kele kieleka, mpe nge ke kwikila ti nge kele na Yawu,” yandi tubaka, “ntangu yayi nge kufwa munu meso.” Yina vwandaka mulongi. Yandi tubaka, “Nge kufwa munu meso!” Yandi tubaka, “Paul me kufwa muntu mosi meso kilumbu mosi.”

¹⁴⁰ Mu tubaka, “Tata, wapi mutindu mu lenda kufwa nge meso ntangu nge kele yimeni ya kufwa meso? Wapi mutindu mu lenda kufwa beno na yina beno kele yimeni ya kufwa?” Uh-huh.

Yandi tubaka, “Munu, meso ya munu kele na kumi na zulu ya kumi!”

Mu tubaka, “Kitini ya nge ya nzutu; kasi nge kele kaka mpofu.”

“Ya lenda salama ve! Biblia ke tendulaka ve bima. Beto ke zonzaka kisika Biblia ke zonzaka, mpe kuvwanda swi kisika Ya kele kuvwanda swi.”

¹⁴¹ Mu tubaka, “Mbote mingi, ntangu Elie vwandaka kuna na—na Dothan, beno me mona, basoda nionso ya bantu ya Syrie zungaka. Mpe kisadi yango kwendaka mbangu, tubaka, ‘Oh, tata ya munu!’ Yandi tubaka, ‘Tata ya munu,’ yandi tubaka, ‘bantu ya Syrie me zunga beto.’”

“Elie na kupakula ngolo meso ya yandi, na kuvumbukaka mpe tubaka, ‘Ya kele na mingi na beto kulutula yina kele na bawu.’”

“Yandi tubaka, ‘Mu ke mona muntu mosi ve.’”

“Yandi tubaka, ‘Nzambi, fungula meso ya yandi.’ Ntangu yayi, yandi vwandaka mpofu. Mpe yandi talaka pene-pene ya

profete yina ya kiboba, mpe na zulu ya myongo; vwandaka ya kufuluka na Bawanzio, mpe bapusu ya Tiya, mpe bampunda ya Tiya.”

“Mpe yandi kwendaka kuna, mpe Biblia ke tuba, ‘Yandi kufwaka bawu meso.’ Mpofo na yinki? Na yandi. Yandi kwendaka kuna, tubaka, ‘Nge ke na kusosaka Élie?’”

“Yinga, beto ke na kusosaka yandi.”

“Yandi tubaka, ‘Kwiza, mu ke talisa nge kisika yandi kele.’ Élie vwandaka twadisa bawu na Élie. Mpofo!”

Mu tubaka, “Nge zaba yina mu ke tuba na nge? Kaka kieleka yina Mfumu ya munu tubaka na tata ya nge, ‘katuka na manima ya munu.’” Uh-huh. Uh-huh.

¹⁴² Beno tala, bana ya kutumama, mpe kukondwa kutumama, kele na kima ve na mutindu nyonso. Kukondwa kutumama na kusambila nzambi ya bawu. “Oh,” ba ke tuba, “beto ke kwikilaka na Biblia.” Yinga, ya kele yinti ya kuvukisa. Beno me mona, bawu ke bwela yinza mpe luzabu na Yawu. Yinti ya Satana, ya kuvukisa; beno me mona, yandi bakaka yinti ya Satana, mbote mpe yimbi. “Oh, beto ke kwikilaka na Ndinga.” Kieleka, kasi Yawu nyonso ve. Éve kwikilaka Ndinga, mpe, kasi ti—ti Satana baka yinti ya yandi mpe ti yandi bebisa Yawu mwa fyoti. Ya kele yina ya kele.

“Muntu nyonso yina ke bwela ndinga mosi, to ke katula Ndinga mosi na Yawu.” Yandi kele kaka mutindu mosi mazono, bubu yayi, mpe kukonda nsuka! Beno tala. Mbote mingi.

¹⁴³ Nsungi yayi ya yimbi kele ya mpimpa, ya kulutila mambele ya dibuundu. Nzambi ya bawu, ba ke zolaka yandi samu na yawu, mutindu yandi ke bikaka bawu kusala. Ba ke na lufundusu ve. Kima mosi ve ke niongisa bawu ntangu nionso ba ke vwanda mambele na yinzo-Nzambi.

Balaam longaka dibuundu kima mutindu mosi. “Beto vukana; beto nyonso kele mutindu mosi.” Ya vwandaka kima ya nsuka. Nzambi ata mbala mosi ve lemvokilaka bawu samu na kukwikila luvunu ya mutindu yina.

¹⁴⁴ Beno bambuka moyo, ya vwandaka disumu ya kulemvokila ve, bambala tatu na Biblia, samu ti muntu nyonso na kubwela ndinga mosi ya ntendulu ya bawu mosi na Ndinga ya Nzambi na manima Yawu me siamisama Kieleka.

Na disamba ya Eden, ya kieleka, na disamba ya Eden, ndinga mosi bwelaka nataka lufwa.

Ntangu Balaam bwelaka ndinga, ti, “Beto nyonso kele mutindu mosi,” bawu, ata mbala mosi ve ti Nzambi lemvokilaka Israël yawu. Mosi na mosi ya bawu kufwaka na ntoto ya kuyuma, kana ti tatu yina Nzambi basisaka.

Yesu tubaka, “Bawu kele, bawu nionso, me kufwa,” yina kele kukabwana ya Kukonda nsuka. Bawu nionso me kwenda; ba me lemvočila bawu ata fioti ve. Ya kele disumu ya kulemvočila ve; ba lemvočilaka bawu ata mbala mosi ve. Oh, la la!

Beno kwenda ntama na yina, bana ya Bansemo ya nkokila!

¹⁴⁵ Beno me mona ntangu yayi nani kele ntwadisi ya nsungi ya bilumbu yayi, ya musambidi, ya yimbi? Ya kele dyabulu, ke baka yinti yango ya mbote mpe ya yimbi, mpe ke tula yawu na ngaanda kuna, beno tala, na kunataka kento ya yandi ya makwela ya dibuundu na kimvuka ya oecuménisme samu na makwela. Ya kele mosi ya mbote. Dibundu ya yandi ya kitoko ya science, na ba-diplome nionso yina ba lenda kuzwa; ba-Docteur ya Philosophie na zulu ya dibuundu ya Klisto, ba-Docteur ya Philosophie na zulu ya ba-Baptiste, ba-Presbytérien, ba-Pentecotiste, mpe nionso yina. Na kunataka bawu nionso, na mbongo ya bawu ya kulunga mpe mabuundu ya nene, na kimvuka ya oecuménisme, “Beto kele mosi.” Ba ke lemvočila bawu ata fioti ve. Denomination mosi, samu na kulwata kidimbu ya denomination, kele kidimbu ya kibulu. Beto me tala yawu awa; samu na kusala yawu. Beno kwenda ntama na yawu, bana, beno kwenda ntama na yawu! Beno me mona? Dibundu ya nene, ya kitoko yina ke na kwenda na makwela ya oecuménisme, na kulwata kidimbu ya yandi!

Bakupe, kieleka, robe ya yinza, ya kubongisa, ya kubongisa, bilandi ya mbote ya dyabulu, samu na kuzwa bana ya Nzambi; samu na kunata mwana-bakala ya mbote yina butukaka mbote na kukwela mwana-kento ya kubeba mutindu yina. Ya kele kieleka. Yinki . . .

¹⁴⁶ Beno tubaka, “Bansuki ya kuzenga, yinki ya fwana sala?”

Mpangi, beto telama fioti awa. Mu ke mona ti ya kele na muntu yina me sepela na yawu ve. Ya lendaka vwanda kuna na bansinga ya allo-allo kisika mosi kuna.

Beno kuwa. Nsuki samu na kento kele nsilulu ya Naziréat. Bansuki samu na Samson vwandaka nsilulu ya Naziréat. Mpe ntangu kento ke zenga nsuki ya yandi, yandi—yandi ke manga kieleka nsilulu ya yandi ya Naziréat ti yandi kele Kento ya makwela na Klisto. Samu, kuna, kima mosi yina, yandi me bebisa Foto nionso. Kieleka! *Naziréat* ya kele “mosi yina kele ya kukipesa samu na lukanu mosi.” Ya kele kieleka? Samson vwandaka ya kukipesa na nsungi mosi mpe na lukanu mosi, na yawu yandi vwandaka na bansuki ya yinda. Kento yina kele mwana ya Nzambi, ke bika nsuki ya yandi kukula, samu na kulakisa ti yandi kele na lutumu ya kukeba na konso Ndinga ya Nzambi.

¹⁴⁷ Kana yandi zenga yawu, mu ke kipe ve wapi mutindu yandi ke kina, ke yimba, ke na kati ya chorale, ke na kutuba na bandinga ya malu-malu, ke mata mpe ke kulumuka, to ke

kuzwa mutindu nyonso ya bimvuka, yandi kele ya kufwa. Ya kele MUTINDU ME TUBA MFUMU, Ndinga ya Nzambi. Ba-Corinthiens ya Ntete kapu 14. Yinga. Yandi me manga nsilulu ya yandi ya Naziréat mpe ba me pesama na nzambi ya nsungi yayi. Yandi ke salaka yawu. Ntangu yayi, nsoni na nge, mama, to kento!

¹⁴⁸ Ya kieleka bayina ke kangaka bana ya babakala ya Nzambi, mutindu ya vwandaka. Mutindu Yesu tubaka, “Mutindu ya vwandaka na bilumbu ya Noé, bakento ya kitoko, mpe bana ya Nzambi bandaka na kukwela na kati-kati ya bawu, mutindu mosi ya ke vwanda ntangu Mwana ya muntu ke vutuka.” Mpe nzambi ya bawu ke banza ti ya kele nene, mpe kitoko mingi, mpe luzabu ya yinza, luzabu; mvwatulu ya Hollywood, yina ba me yidika na butiki ya yandi mosi, kieleka, na bima yayi ya gomme mpe nionso, beno zaba.

¹⁴⁹ Mpe yandi, dibuundu ya yandi, ke zolaka kaka yawu! Oh, la la! “Mu ke tuba na beno na kubakula, mu kele Methodiste. Mu kele Presbytérien. Pasteur ya beto kele na sense ya mbote mingi kulutula kutuba kima ya mutindu yina.” Yandi kele ve na sense mingi samu na kutuba bima yina Nzambi me tuba na ntangu yina. Beno me mona?

¹⁵⁰ Yandi, dibuundu, ke sambilaka kaka yawu. Yandi zola yawu. Kaka yina yandi zolaka! Yandi ke vukana ve na kima mosi, mpangi-bakala, to ke kota na kima mosi ve yandi fwana sala mutindu yina kima ya luswaswanu na yina ba-Jézabel yayi ya bilumbu yayi kele, mpamba ve ti ya kele nkadulu yina kele na kati ya yandi.

Wapi mutindu beno lenda vwanda na nkadulu mosi . . . “Nani na kuvwandaka na manyongo lenda kubwela mwa yinda na ntela ya yandi?” Kana beno butukaka samu na kuvwanda ba bametele mosi na makumi tanu ya yinda, beno ke vwanda ve na bametele mosi na makumi nana. Oh, yinga, “masini ya yinda” ya Booth-Clibborn.

¹⁵¹ Na yina beno kuwa, muntu, beno nkonga ya ba-Ricky! Kana beno butukaka samu na kuvwanda muntu, na ntangu yina beno sala mutindu muntu. Mikoto yayi ke kubwa na zulu ya kizizi ya beno, mpe ya kuyoka mutindu samu na kusepelisa bantu, oh, beno nsungi ya kubeba ya banioka! Yinki diambu na beno, na mutindu nionso?

Nzambi ya munu ke sambisa yinsi yayi kilumbu mosi na tiya. Yandi ke kotisa yawu na yisi ya mubu. Ngunga ya lufundusu ya Yandi me kuma pene-pene. Yinza ya muvimba ke kwenda.

¹⁵² Kubeba ya bayina ke sambilaka! Kubeba ya kimuntu; babakala me zaba ve wapi mutindu ya sexe bawu kele, to bakento ve. Yandi ke telema kuna me lwata salopette ya bakala, to mwa kima mosi mutindu mwa kupe, bilele yina kele. . . kuningana ya yandi nionso mpe kusala ya nzutu ya yandi, mpe

kubokila yandi mosi Muklisto. Yandi kele ve ata mama, beno bikana kaka Muklisto. Yandi kele kento ya kindumba yina ba me sadila na nzila ya Satana, yina me twadisama na kimpeve na Satana, samu na kutinda bana ya Nzambi na difelo, samu na kulungisa Ndinga yina Yesu Klisto tubaka ti ke salama. Mu zolaka ve kutuba yawu, kasi Yandi tubaka yawu, na mutindu nyonso. Beno me mona kisika mpeve ya bayina ke sambilaka yayi me katuka? Yinti ya kuvukisa.

¹⁵³ Yandi tubaka, “Yinki ke tambula ve mbote na ba-pantalon yina,” to nionso yina ba ke bokilaka yawu, “pantalon ya corsaire?” to nionso yina ya kele.

Biblia ke tuba, ti, “Kento nyonso yina ke lwata lele yina kele ya bakala, ya kele busafu na meso ya Nzambi.” Ya kele **MUTINDU ME TUBA BIBLIA.**

Mpe kento yina ke zenga nsuki ya yandi, ke zitisa ve yintu ya yandi. Mpe ya kele ve. . . Ya kele kima mosi ya disumu samu na kento na kusala kisambu na nsuki ya nkufi, Biblia me tuba yawu, kusambila na meso ya bantu nyonso na yintu ya kukondwa kufika. Mpe yandi. . .

Oh, beno ke tuba, “Mu ke lwataka yimpu.”

¹⁵⁴ Beno bantu ya luvunu, beno longa bakento yayi bima ya mutindu yina! Ntangu, Biblia ke tuba, “Bansuki ya yandi me pesama na yandi mutindu vwale,” mwa yimpu yina muntu me sala. Ya kele yina Biblia ke tuba. Mu kele na kizitu ve; ya kele na kizitu ya munu na kutuba kaka Kieleka. Beno vwanda ve bantu ya mayuya, mutindu Biblia me tuba, “na kukatulaka ve ngolo ya Ndinga ya Nzambi na luvunu,” samu—samu na kukubama to—to kukutana na ndombolo ya nkonga ya ba-Ricketta.

¹⁵⁵ Mu kele na mpova ya *yimbi* awa. Mu kele na *Elvis* ya kusonika na kisika ya *dyabulu*. Ya kele nyonso mutindu mosi. Mpova *Elvis* zola kutuba “niawu,” mpe mpova *Ricky* zola kutuba “mpuku.” Ntangu beno ke tuba “Ricky mosi ya fioti,” beno zola kutuba, “nge kele mwa mpuku.” Yina beno ke bokilaka yandi, yawu yina yandi kele. Ba me bokila mwana ya beno yina, beno soba yawu na nswalu nionso, samu na zola ya Nsangu ya mbote. Beno soba nkumbu ve. . .

Beno me kuwaka ata mbala mosi ve bankumbu ya mutindu yina kuna na Biblia, to na nsungi mosi yankaka. Ya kele nsungi, nkumbu ya nsungi yayi. Kana ya me vwandaka ve na bampuku mpe baniawu ya kubeba, ya kele kuna.

¹⁵⁶ Nyonso yayi. . .? . . mafuku ya ba-dollar ke talana nsaka, mpe bana yayi ke na kutambulaka awa, bawu lenda ve kukwenda na—na lukolo kukondwa mwa kima ya kukotisa na dikutu, mpe mwa transistor na kati ya posi, yina ke sala, “bum-badabum.”

Oh, bawu mataka kuna na yinzo, mpe beto salaka . . . Bantu yina vwandaka meka na kutula mukubu na yinzo ya munu kuna. Beto tubaka, “Katula kima yina awa. Kana nge lenda ve kusala kukondwa yawu, na yina katuka kisalulu. Ya ke sala munu kudasuka mingi ti mu lendaka ata fioti ve kubikana kuna. Beto me sakumuna kisika yayi na Nzambi. Beto zola ve mutindu yina ya boogie-woogie buzoba ya bilumbu yayi ya nsuka awa.” Mu tubaka, “Kanga yawu to kanga kisalulu!”

¹⁵⁷ Beno tala, musambidi, ata ti, oh, kieleka, beno kwenda kaka na yinzo-nzambi mpe beno telama na manaka ya bafololo, samu na kuwa boogie-woogie.

¹⁵⁸ Mpe, beno tala, Kento ya makwela ya Klisto ke na kumata, mpe. Na yina beto ke mona kisika mbeni ya Klisto ke na kukwenda, yandi ke banda kuna na manima mpe ntangu yayi ke na kwiza na yintu; kimvuka ya mabuundu ke tula yawu na yintu ya dibuundu. Mpe Dibundu ya fyoti yina ke na kwiza, mpe, Kento ya makwela ya Ndinga ya Klisto na nzila ya nsungi, ke na kwiza na Yintu, mpamba ve ti Yandi ke vutuka na Mpangi ya Yandi. Ntangu nyonso, kaka mutindu dibuundu mpe nyonso yankaka, Ya fwana kuvukana. Blé, nyonso yankaka, ke vutuka kaka na yintu ya yandi kisika ya bandaka; mutindu Cain mpe Abel. Yintu ya Kento ya makwela ya Ndinga ya Nzambi yina me monisama na nsungi yayi ya yimbi yina beto ke na kuzinga. Beno me mona kisika ya ke mata?

¹⁵⁹ Mpe Satana ke baka ntama mingi ve kento ya yandi ya makwela ya mayela mpe ke zangula muntu yayi ya nene, yina kele mbeni ya Klisto, bukimumu, mpe kutula yandi na zulu ya kiti ya kimfumu, “mpe yinza ya muvimba ke kukiyufula na manima ya yandi.”

Mpe kuna Klisto ke kwiza. Mpe zole lenda kwiza na luzingu ve na ntangu mosi. Mpe ba ke baka kimfumu ya yandi; ba ke bebisa yandi.

Mpe Klisto, Ndinga ya Nzambi . . . Na yina, kento kele kitini ya nzutu ya bakala. Bawu kele zole ve; bawu kele mosi. Mpe Kento ya makwela, Dibundu, Ndinga, “bantu yina ba me bokila na kubasika *awa* mpe *kuna*, samu na zola ya Nkumbu ya Yandi,” ke vukana na Nzutu ya Yesu Klisto.

Mpe kimfumu ya mbeni ya Klisto ke bakama mpe ba ke bebisa. Mpe Klisto ke baka kiti ya kimfumu, mpe ke vwanda na zulu ya kiti ya kimfumu ya tata ya Yandi David, mpe ke yala na zulu ya ntoto bamvula funda mosi; na ntangu yina yandi ke talisa Dibundu na Nzambi, “kukondwa mifutu to kifu.” Yinga!

¹⁶⁰ Ntangu yayi beno tala nsuki ya yandi ya yinda, nsilulu ya Naziréat na Ndinga. Mu ke tala Kento ya makwela ya Klisto ntangu yayi. Beto ke kangaka mbeni ya Klisto, kisika yandi kele, musambidi mpe nyonso, science. Ntangu yayi mwa Kento ya makwela ya Klisto ke kwikilaka kaka na Ndinga, muntu nyonso

yina Yandi keke. Ya keke muntu yandi mosi. Mu banza mpe mu ke na kivuvu ti ya keke na mingi ya kuvwanda ntangu yayi, bantu mingi ke na kuwa. Mpe mu banza ti munu mosi, mpe mosi na mosi ya beno nyonso, keke kitini ya Kento ya makwela yina. Mu banza ti mingi. Mpe, ya ke vwanda ya kutumama, yina nionso ba me tumisa samu na yawu ke vwanda mutindu yina, mpamba ve ya keke nkadulu ya bawu. Bawu beno me mona. Ndinga lenda kaka kundima Ndinga. Yawu lenda ve kuzaba denomination to kubeba. Ya zaba mbote mingi; Ya keke Ndinga. Beno me mona? Ya lenda ve kuzaba kima mosi . . .

Blé lenda vwanda kima ve kasi blé. Ya bandaka, blé; ya ke suka, blé. Mpe dititi ya yimbi lenda vwanda ata mbala mosi ve blé, kasi ba ke tula yawu maza na nzila ya kupakulama ya mutindu mosi. Beno me mona? Kasi ya keke ve blé. Mutindu mu tubaka kilumbu yankaka yina, na zulu ya yinti na mavala ya mutindu na mutindu.

¹⁶¹ Nsuki ya yandi ya yinda, nsilulu ya Naziréat, ke talisa ti Yandi keke ya kukangama na nsilulu na Nzambi. Kento ya kitoko ya Ndinga ya Yandi ya nsilulu samu na nsungi yina Yandi ke na kuzinga, ya kufika pene-pene ya Yandi, na kusiamisaka Yandi na Yandi mosi, ya Hébreux 13:8, “Yesu Klisto mutindu mosi mazono, bubu yayi, mpe kukonda nsuka.” Mutindu, Yandi keke kitini ya Ndinga Bakala ya makwela, ya kieleka na Yandi na konso kisika yina.

¹⁶² Ntangu yayi beno tala. Kana kento basika awa mpe ti yandi me kwelana na bakala mosi, mpe yandi ke basika mpe ke sala zola na bakala yankaka mpe yandi keke na mambu ya yimbi na yandi, mpe kuvutuka na bakala ya yandi, yandi zolaka losa yandi na ngaanda. Ya keke kieleka? Yandi fwana vwanda kieleka na yandi, samu ti yandi keke ya kukangama na nsilulu na yandi.

Mpe Kento ya makwela ya Klisto keke ya kukangama na nsilulu na Klisto; mpe Yandi keke Ndinga.

Ya lenda ata fioti ve kusala mbwetolo ya disu bakala yankaka, kento lendaka ve kusala mbwetolo ya disu na bakala yankaka. Yandi lendaka kusala ata kidimbu mosi ve, ata émotion mosi ve na ntwala ya yandi, samu ti yandi keke kaka kento ya makwela samu na bakala mosi ya makwela.

¹⁶³ Beto zola ve ata mosi ya bayinti ya beno ya kuvukisa, ba-denomination ya beno. Beno vwanda kieleka na Klisto, Ndinga. Yandi ke siamisa ti Yawu keke kieleka. Ve, tata, kutalisa ve ata émotion mosi ya kuvukana na yandi, kukota ata fioti ve na ndonga ya yandi to kima yankaka, to ti yandi nata beno na maboko ya yandi to na lukengolo ya yandi, to—to kuzonza na beno na lweka *yayi*, mutindu *yina*.

Beno kuwa kaka Ndinga mosi. “Mameme ya Munu zaba Ndinga ya Munu. Nzenza bawu ke ve . . .” Yinki keke Ndinga ya Yandi? Ndinga ya muntu nionso keke ndinga ya yandi. Mpe yayi

kele Yawu, Biblia, ata mpova mosi ve ya kubwela na Yawu to kukatula na Yawu. Beno bikana kaka ya kusungama na Ndinga yina. “Nzenza bawu ke landa ve,” denomination.

¹⁶⁴ Mutindu, Yandi kele kitini ya Bakala ya makwela, ya kieleka na Yandi na konso kisika yina, ke na kuingila Makwela. Kuvukana, ve na conseil oecuménique; kasi na zulu, na Kudya ya Makwela. Ba me pesa yandi. . . .Yayi kele samu na dibuundu ya beto mosi. Ba me pesa yandi. . . .Ba me pesa yandi, mpe ba me monisa Yandi, mansweki Sambwadi ya Biblia. Beno me mona? Yandi ke mona bulawu ya muntu ya luvunu, pene-pene mingi na Kieleka, ti na kutala ya kuvuna bantu ya Kusolama. Yandi ke mona yawu. Yandi. . . .

¹⁶⁵ Beno me mona bampeve nyonso zole ya yimbi ke salaka na nsungi yayi ya yimbi? Beno lenda mona yawu? Konso musambidi ya kieleka, Cain mpe Abel, bampeve dyaka vwandaka kwiza na bayintu ya bawu, dyaka mutindu mosi bawu bandaka. Mosi, ke sambila na nzila ya kitoko, mpe na nzila ya luzabu, mpe na nzila ya malongi, mpe na nzila ya science, mpe na nzila ya mayele ya kimuntu. Mpe Yina yankaka, na lukwikilu ya luzayikisu ya Ndinga ya Nzambi. Bawu nyonso zole kele ya kutelama kaka na yinzo yayi ya nene na suka yayi. Ya kele kieleka.

¹⁶⁶ Apocalypse, to lukwikilu, na Ndinga ya Yandi, ke tuba ve luzabu; Muklisto ya kieleka, ya kieleka.

Bawu ke tuba, “Nge ke—nge ke na diplome ya doctorat?”

Yandi ke tubaka ve. “Mu—mu ke kwikila Ndinga ya Yandi.” Beno me mona? Yandi ke na kulomba kima mosi ve. Yandi ke tuba ve ti yandi me longukaka. Yandi kele ve na kati ya denomination mosi, ata na parti mosi, ata na kinzambi-nzambi mosi. Ya kele ya Klisto. Ya kele Kento ya Yandi; dibuundu ve.

Yandi kele ndumba. Biblia ke tuba ti yandi vwandaka “ndumba,” mpe, “MAMA YA BAKENTO YA KINDUMBA,” mpe bawu nionso ke vukana mpe ke sala kento ya kindumba mosi. Mpe mutindu ya kento yina kele kento yina kele ve ya kukwikama na Bakala ya yandi; mpe ke tuba Klisto mutindu bakala ya yandi, mpe yina kele ya denomination. Buzoba ya mutindu yayi! Beto kele ya Klisto.

¹⁶⁷ Kasi, na kutumama, Kento yayi ya fioti ya lukwikilu, yina ke zinga na lukwikilu, Kento ya makwela; muntu yayi *awa, kuna*; awa, na kisika yankaka, na dibuundu mosi yankaka, na denomination yankaka, nyonso yina ya kele, na mosi ve. . . .Ke kwikila Ndinga ya Nzambi, ya kulemvuka, ke na kuingila na zola, samu ti nsilulu ya nsungi ba siamisaka. Yandi ke na kuingila yawu. Yandi kele kitini ya Ndinga yina, mpe Yandi ke na kuingila luzingu ya Yandi samu na kumonikisa Ndinga yina.

Bampangi, beno lenda mona yawu ve? Mu banza ti ya me luta beno ve.

Nzutu ke na kuvingila (yina kele Ndinga), ke na kuvingila Luzingu (yina kele Mpeve) samu na kusiamisa to kusala Yawu kuzinga. Ya kele samu na yina Yandi ke na kuvingila. Luzingu yankaka ve ke sala na kati ya Yandi. Yandi lenda kwiza ve na luzingu mutindu nyonso yankaka. Kasi, Yandi ke kuwa yawu kuna, mpe Yandi zaba ti ya ke salama; kuna ya ke salama, na ntangu Yandi ke vumbuka. Nzambi tubaka, “Ti ya vwanda,” mpe Yandi basikaka mutindu yina ya ntete basikaka.

¹⁶⁸ “Bana ya kutumama” zola kutuba kutumama. . . *Kukondwa kutumama* zola kutuba “kumanga kutumama.” Mu talaka yawu na buku ya bampova, samu na kundima yawu. Kumanga, kumanga kutumama na (yinki?) Ndinga ya Nzambi yina me monisama pwelele. Mutindu Cain yina me monisama. . . mangaka kutumama na luzayikisu yina me monisama pwelele ya Abel, yina me siamisama na Nzambi ti ya vwandaka ya kusungama. Mpe Cain mangaka yawu, mpe kufwaka mpangi ya yandi ya bakala.

Ba-Pharisien, na luzabu ya denomination ya bawu mosi na yina Ndinga ya Nzambi vwandaka, muntu yina ba soolaka na manima, mangaka kutumama na Ndinga ya Nzambi yina me siamisama samu na kilumbu, Yesu Klisto, mpe Yandi kufwaka Yandi. Ya kieleka?

Ya kele yina “bana ya kukondwa kutumama” kele, kumanga kutumama na Ndinga ya Nzambi.

Ntangu yayi beno me mona kisika bawu kele? “Oh, bilumbu ya bimangu me luta. Yesu Klisto kele ntete ve mutindu mosi. Ya kele ve na kima mutindu mbotika ya Mpeve-Santu. Bima nyonso yina kele buzoba!” Beno me mona, kumanga kutumama! Bawu kele ve na nsatu ya kutuba bima zole; kaka fwana tuba mosi, kaka yina. Ya kele kumanga kutumama, kaka kuna. Bawu lenda tuba ve ti beno kele na meso ve, beno kele na makutu ve; beno fwana baka nzutu nyonso, Ndinga nyonso. Beno me mona?

Mpeve-Santu ke bokila, “Beno basika na yandi, beno vwanda ve ya kuvukana na dogme ya yandi ya denomination,” mutindu yandi ke seka mpe ke kudya na Ndinga ya Nzambi ya kilumbu yayi.

“Samu Nzambi me seka ve,” beno bambuka kaka moyo. Yandi ke kuzwa yawu. Beno vwanda na boma ve. Yandi ke kuzwa yawu. Biblia, na Éphésiens 4:30, kana beno zola kusonika yawu, na Éphésiens 4:30, me tuba. “Nzambi kele ya kuseka ve. Nionso yina muntu ke kuna, yawu yina yandi ke buka.” Bawu lenda ve kuseka mpe kusawula, mpe kutuba bima yayi, mpe kuluta na yawu. “Mutindu dimpa na zulu ya masa, ya ke vutuka.”

¹⁶⁹ Yandi kele kento ya makwela ya dyabulu, ya kufuka na luzabu ya yandi ya musambidi, ya luzolo ya disumu samu na nsungi ya ntangu yayi ya yimbi, samu na kuvuna beno. Oh, la la! Kimvuka ya muvimba to denomination ya bampeve ya yimbi ya

luvunu, na luzabu ya science mpe civilisation ya bilumbu yayi!
Ya ke lomba . . .

Beto ke sukisa kaka na mwa minuti fioti. Mu ke sukisa, samu mu lenda ve kumanisa yawu nionso, beno me mona.

Na kuzonzaka ti yandi ke na kutunga yinza ya nene samu ti beno zinga na kati. Yandi ke tuba, ti, na civilisation ya yandi, yandi me tunga bayinzo-Nzambi ya kitoko, balukolo ya nene, balukolo, balupitalu, bayinzo ya babuku, mpe kusadisa muntu samu na ntangu ya fyoti, kukondwa Ndinga ya Nzambi. Yandi me sala yawu. Yandi me talisa ti yandi lendaka sala yawu. Mpe bantu me kubwa samu na yawu; yinga, tata; balukolo, badenomination, civilisation, bantu yina me lwata mbote mingi, bantu yina kele na madya ya kulutula.

Mu ke zola kuvwanda na mulonga samu na kuzwa dimpa, mpe kuvwanda ya kusungama na Nzambi; na kisika ya kudia nsusu ya kukalinga bambala tatu na kilumbu mosi, mpe kuvwanda mambele ya kento ya kento ya kindumba mutindu yayi.

¹⁷⁰ Beno bambuka moyo, ngunga me finama ntangu kidimbu ke kwiza. Beno ke vwanda na kati ya yawu to na ngaanda ya yawu. Ya ke kwiza mutindu muyibi na mpimpa. Ya ke simba beno kaka kuna, mpe beno kele kuna. Ya kele ve na kima yina ke basika na yawu kuna; beno me baka yawu. Beno basika!

Wanzio mosi kulumukaka na Zulu, na kizizi ya nene yina vwandaka sema, mpe bokaka na bantu. Yawu ningisaka ntoto. “Beno basika na Babylone, samu ti yandi me kubwa. Beno vwanda ve ya kukubama na bampasi ya yandi, bantu ya Munu!” Beno basika na yandi. Beno basika! Beto me tanga yawu ve na kati ya Ndinga, ntama mingi ve? *Wanzio* kele “munati nsangu,” beno me mona, ya me kulumuka. Beno tala Mpeve-Santu, “Beni basika na yandi, ti beno me belama ve.”

¹⁷¹ Ntangu yayi yandi me tunga bima nyonso yayi. Yandi me tunga mabuundu ya nene. Yandi me tunga lukolo ya nene, balukolo, ke nata bantu mpe ke longa bawu na kisika ya kulutula mbote, mutindu ba ke bokilaka yawu, civilisation. Mpe ba me longusaka bawu na civilisation ya bilumbu yayi yina nataka bawu na dibulu ya lufwa, na nzila ya luzabu, ntama na Nzambi mpe Ndinga ya Yandi.

Beno ke mona ve mutindu ya muvimba? Beno ke mona yawu, dibuundu? [Dibuundu me tuba, “Amen.”—Mu.] Kuna na mupepe, kana beno mona yawu na mabuundu ya beno mosi kuna, beno tuba “amen,” bayankaka ya bawu ke zaba kisika beno kele ya kutelama. Beno me mona?

Yandi me sala yawu. Yandi kele . . . Ya kele nzambi ya ntoto yayi, mpe yandi me tunga balukolo. Yandi me tunga ba-université. Yandi me tunga balupitalu. Yandi me tunga bayinzo ya babuku. Yandi me tunga bima nyonso yayi samu na

lusalusu ya muntu, kaka mingi samu na kuvuna bawu, samu na kukatukila Ndinga yina. Mpe yinki yandi twadisaka bawu na yinki? Dibuundu ya muvimba ke kota na lufwa, samu ti Nzambi tubaka ti Yandi ke yoka na tiya kento ya kindumba, mpe bana ya yandi, na tiya ya yimvu na yimvu.

Beno basika na yawu, bantu! Beno kota kuna ve. Beno kwenda ntama na kima yina na nswalu nyonso mutindu beno lenda!

Na luzabu ya yandi ya science, yandi vwandaka na kiyeka ya kusala yayi, ntangu yayi beno tala, kukondwa Ndinga ya Nzambi.

¹⁷² Nzambi tumaka beto ata fioti ve na kubasika mpe kuzwa balukolo. Yandi salaka yawu ata fioti ve. Yandi tubaka na beto ata fioti ve na kutunga balupitalu. Ba kele mbote. Yandi tubaka na beto ata fioti ve na kutunga bayinzo ya babuku. Ve, tata. Yandi me salaka yawu ata fioti ve.

Yandi tubaka, “Longa Nsangu ya mbote.” Mpe, Nsangu ya mbote, ke talisa, ke na kumonisaka ngolo ya Mpeve-Santu.

Paul tubaka, “Nsangu ya mbote kwisaka na beto, na nzila ya ndinga kaka ve, kasi na nzila ya kumonisama mpe kumonisama ya Mpeve-Santu.” Paul tubaka, “Ata mbala mosi ve ti Mu me kwizaka na beno na bampova ya nene ya ndwenga na nzila ya dokotolo mosi ya nyonso yina, kasi mu me kwiza na beno na ngolo mpe kumonisama ya Mpeve-Santu; ti lukwikilu ya beno ke vwanda ve na ndwenga to luzabu ya bantu ya yinza yayi, kasi na ngolo ya mvumbukulu ya Yesu Klisto; samu Yandi ke zinga, mutindu mosi mazono, bubu yayi, mpe kukonda nsuka.” Nzambi sadisa beto na kukwikila kima mutindu mosi, mpe Nzambi ke siamisa kima mosi mutindu Yandi vwandaka sala.

¹⁷³ Yandi ke kangaka beno nzila na kumona luzayikisu ya kieleka mpe lukwikilu ya Ndinga ya Nzambi me monisama pwelele mpe me siamisama bubu yayi, na nzila ya balukolo ya yandi, bayinzo ya babuku, kusonika mikanda, balupitalu, mpe nyonso yankaka yina. Beno me mona? Yandi ke kangaka beno na yawu. Yandi ke na kutendula ntangu yayi, mutindu yandi salaka na Pharaon, na kumekaka na kukanga beno nzila na kumona ntendulu ya Ndinga yina me siamisama ya nsungi ya Yandi ya nsilulu na kati ya Nsemo ya nkokila, yina me siamisama mpe me siamisama. Yandi me meka, na nzila ya luzabu ya yandi, mpe balukolo, mpe bantu ya kulutila mbote yina me longukaka, mpe binkulu, mpe nyonso yina, samu na kunata beno ntama na kumona Yawu.

Nyonso, samu ti beno tala Yawu ve mpe kumona ti ya kele Yesu Klisto! Wapi mutindu beno ke zaba ti ya kele Yesu Klisto? Yandi kele Ndinga, mpe Yandi kele Ndinga ya nsungi yayi. Mpe nsungi yayi, tubaka ti yayi ke salama na nsungi yayi, mpe yawu

yayi ke na kusalamaka. Beno me mona? Beno me mona? Yandi ke meka na kukanga beno nzila na kumona Yawu.

Yandi ke vukisa nkumbu nyonso ya mvindu na Yawu yandi lenda. Beno me mona? Yandi ke bokila Yawu “ba-exalté” mpe nyonso yankaka. Yandi bokilaka Yesu “Béelzébul.” “Mpe bawu ke bokila Mulongisi ya yinzo Béelzébul, wapi mutindu bawu ke bokila bilandi?” Beno me mona?

¹⁷⁴ Beno me mona, na kumekaka na kukanga beno na kumona ntendulu ya kieleka ya Ndinga. Ve yina . . . Beno me mona, yandi ke na kutendula Yawu, na kutubaka Yawu zola kutuba *yayi*.

Nzambi tubaka, “Mu silaka na bilumbu ya nsuka Mu ke fidisa beno Malachie 4.” Ba fwana tendula yawu ve; Yandi salaka yawu. Yandi tubaka, “Mpe mutindu ya vwandaka na bilumbu ya Lot, yinza ke vwanda na nkadulu ya Sodome; mpe na ntangu yina, mu ke monisa Mwana ya muntu na nzila ya yawu, na bukieleka nyonso.” Beto kele na mitindu nyonso ya bilandanda mpe nyonso yankaka, ya yawu, kasi beto kele na Mosi ya kieleka, mpe. Beno me mona? Yandi tubaka ti Yandi ke sala yawu.

Yandi tubaka ti mbeni ya Klisto ke vumbuka mpe na kutala ke vuna bantu ya Kusolama kana ya lendaka salama. Kasi yandi tubaka, “Beno bika bawu swi. Beno bika bawu kukwenda na ntuala. Bulawu ya bawu ke talana.” Samu na yinki? Kumekama ya Ndinga ke siamisa yawu. Beno me mona?

Ntangu ya kumaka na Ndinga yina, “Yina vwandaka ntama mutindu *yayi, ti?* Oh, mu ke kwikilaka ve na nkuna ya nioka. Mu ke kwikilaka ve na *yayi, yina*, mpe *yankaka*.” Ya me monisamaka ata fioti ve, beno me mona, ve, ata fioti ve. Oh, mpangi ya bakala, beno tala kaka kisika . . .

Beto ke sukisa, samu ya kele ngunga ya kumi na zole.

¹⁷⁵ Beno tala, na kumekaka na kukanga beno nzila na kumona ntendulu ya Ndinga ya nsungi yayi, ya Nsemo ya nkokila yina ba me tendula. Ya kele . . . Yinki ya zola kutuba? Ya kele ntangu ya exode me kuma pene-pene, Nzambi ke na kwiza samu na Yandi, kieleka kieleka mutindu yinza. Beno me mona?

¹⁷⁶ Ntangu yayi mu zola kuyufula beno kyuvu mosi. Na yina, ya kele ngunga ya kumi na zole ntangu yayi, baminuti tanu na manima; mpe beto ke landila, na nkokila yayi. Beno me mona nzambi ya nsungi yayi? [Dibuundu me tuba, “Amen.”—Mu.] Beno ke kwikila yawu? [“Amen.”] Beno me mona mutindu ya kele, dibuundu, ya mayela, ya science?

Yinza ya muvimba kele ya yawu, beno me mona, denomination. Mpe, beno ke tuba, “Mu kele Muklisto.” “Wapi denomination beno kele?” Mbote, kana mu vwandaka ya denomination, mu ke kwikila ve ti mu ke vwanda Muklisto. Ntangu yayi, yina kele ndinga ya nene, kasi ya kele kieleka.

Mu me manisa kaka na kutuba luzabu yina mpe science, mpe Buklisto, kele na ata kubundana ata fyoti ve. Mosi kele ya dyabulu, mpe yankaka yina kele ya Nzambi. Nyonso yina ke manga Ndinga ya Nzambi, beno vwanda ntama ya yawu. Beno me mona? Ve, tata. Biblia ke bokila, samu na bilumbu yayi ya nsuka, samu ti Baklisto kubasika na kento ya kindumba yina, yina kele yinti ya mbote mpe ya yimbi.

¹⁷⁷ Kieleka, yandi kele na mbote. Muntu nyonso lenda zonza yimbi ya lupitalu? Ve, tata. Yinzo ya babuku? Ve, tata. Ndongosolo? Ve, tata. Kasi, beno me mona, ba ke na kupesa bawu yina kukondwa Ndinga. Beno me mona mutindu ya luvunu ya kele? Na kupesaka bawu dibuundu ya kukwenda, kusambila samu na kusambila, “nzambi ya kuvwanda na zulu ya kiti ya kimfumu.” Biblia zabisaka yawu na ntwala.

¹⁷⁸ Ntangu yayi beno kele mambele mosi ya banzutu yango. Ya kele kaka na zole ya yawu na ntoto ntangu yayi, ya ke vwandaka ntangu nyonso, mpe ke vwanda tii kuna Yesu ke kwiza, mpe mosi ya bawu ke bebisama. Ntangu yayi beno kele mambele mosi ya banzutu. Mosi ya bawu, beno me kotaka; yankaka yina, beno me butuka na kati ya Yawu. Beno me mona?

Mosi ya bawu, beno kele kitini ya, samu ti beno kele ya kubutama na kati ya Yawu, beno fwana vwanda kitini ya Yawu. Mu lenda manga ti mu kele na diboko? Kulutila ve ti mu lenda manga Ndinga nyonso ya Nzambi, kana mu kele kitini ya Nzambi. Mu kele kitini ya William Branham, mu kele na bitini, mpe na konso kitini kele kitini ya munu. Mpe konso Ndinga ya Nzambi fwana kulunga na mpeve ya munu, fwana kulunga moyo ya munu, fwana kulunga na luzingu ya munu, Yawu fwana kulunga mabanza ya munu. Kana mabanza ya munu kele ya luswaswanu na Yawu, na yina Mpeve ya Nzambi ke zingaka ve na kati ya munu. Ya kele kieleka. Lenda manga ve Ndinga mosi ya Yawu.

¹⁷⁹ Beno kele mambele mosi ya banzutu. Ya fwana vwanda, ya fwana vwanda kaka. Ya kele to Nzutu ya Nzambi, yina kele na nzila ya Ndinga; to nzutu ya Satana, na nzila ya dibuundu. Mpe yinza ya mvimba fwana vwanda ya dibuundu mosi; ya ke sambila nzambi mosi. Beno fwana sambila to nzambi ya luzabu, beno ke yekama na zulu ya yina beno ke kuwa na nzila ya luzabu, beno ke yekama na zulu ya *yayi*, to *yina*, to *yankaka*; to beno ke yekama na zulu ya Ndinga ya Nzambi, na nzila ya lukwikilu, na kutalaka Yandi na kusiamisa Yawu mpe kukumisa Yawu kieleka.

Dibuundu ya kieleka ya Nzambi ke na kuingila nkwizulu ya kilumbu yina ya kiese ya Millenium,
Ntangu Mfumu ya beto ya kusakumuna ke kwiza mpe ke zangula Kento ya Yandi ya makwela yina ke na kuingila;

Oh! Ntima ya munu kele ya kufuluka na enlevement mutindu mu ke sala, beno tala mbote mpe beno sambila,
Samu ti Mfumu ya beto ke na kuvutukaka dyaka na ntoto.

Oh! Mfumu ya beto ke vutuka dyaka na ntoto,
Ba ke kanga Satana bamvula funda mosi,
Beto ke kuzwa mpukumunu ve na ntangu yina,
Na manima Yesu ke vutuka diaka na ntoto.

¹⁸⁰ Oh, bantu ya Etats-Unis yayi, kisika Nsangu yayi ke na kukwenda ntangu yayi, beno kwenda ntama na nswalu nyonso mutindu beno lenda na luzabu yayi, na nsungi ya science yina beto ke na kuzingila. Beno kwenda swalu na Ndinga ya Nzambi!

Beno, munu, muntu ve lenda—lenda, zaba Yawu. Muntu ve lenda siamisaka Yawu. Nzambi yandi mosi ke na kusiamisaka Yandi Mosi. Muntu mosi ve ke na muswa ya kutendula Yawu; munu, muntu yankaka ve ke na muswa. Nzambi ke sala ntendulu na Yandi Mosi. Yandi salaka nsilulu. Yandi tubaka ti Yandi ke sala yayi na bilumbu ya nsuka.

Mpe na bilumbu ya nsuka nzambi ya nsungi yayi ya yimbi ke kufwa meso ya bantu, na luzabu ya yandi ya mayela, na kuvukisa na zulu ya yinti ya mbote mpe ya yimbi, kaka na kupesaka yawu na bantu. Mpe awa me kwiza, kima yina vwandaka mata, dénomination yina katuka ntama kuna na Bansungi ya Mudidi, mpe ntete Bansungi ya Mudidi, yintu nyonso na muntu ya kulutula nene, Satana, yina tubaka, “Mu ke kembisa munu mosi bana ya Nzambi, mpe bawu ke kuwa munu.” “Mpe yandi mutindu Nzambi ke vwanda na tempelo ya Nzambi, mpe bana ya Nzambi ke kubwa samu na yawu.”

¹⁸¹ Mbote, mwana ya Nzambi, ke tuba, “Mbote, kento ya munu, ya kele ve; yandi kele mbote. . .” Kwenda na ntwala, landila kaka na kukwenda na ntwala. Beno me mona?

Beno ke tuba, “Mbote, Yandi tubaka ‘bana ya Nzambi.’” Yinga, tata.

Muntu, muntu nyonso yina yandi kele, ba salaka yandi na kifwani ya Nzambi, samu na nkembo ya Nzambi. Mpe kento kele kima na nzila ya bakala, ve ya Nzambi. Kieleka. “Ntangu bana ya babakala ya Nzambi monaka bana ya bakento ya bantu kitoko, bawu bakaka bakento na kati ya bawu.”

“Mpe mutindu ya vwandaka na bilumbu ya Noé, mutindu mosi ya ke vwanda na nkwezulu ya Mwana ya muntu.”

Ntangu yayi beno tala, kana beno zola kuzaba wapi kitezo dibuundu kele, beno tala mbote wapi kisika bakento kele, beno me mona, samu ti yandi kele dibuundu. Beno tala mbote yina yandi ke na kusalaka, beno me mona, mpe na nsungi yayi ya yimbi ya kento ya kindumba.

¹⁸² Beno tala, ya vwandaka ve na kima ya yimbi, yina vwandaka sala yimbi, mbanza ya kindumba na yinza, kulutila Nazareth, mpe kuna Nzambi soolaka mwense. “Kima ya mbote zolaka basika na Nazareth?”

Mpe na nsungi yayi ya yimbi, kisika nzambi ya nsungi yayi me kufwa meso ya bantu, na ba-dogme ya bawu mpe ba-denomination ya bawu; na nsungi yina ya kieleka, Nzambi ke soola bantu samu na Nkumbu ya Yandi.

Ata ti ba me losa bawu mpe ba me vweza bawu,
kilumbu mosi Mfumu ke kotisa
basolami ya Yandi na kati ya mwelo, mpe ya ke
lomba bangolo nionso.

Na manima beto ke yimba mpe ke boka mpe ke
bina,
Mwana-dimeme ke mwangisa masa ya meso ya
beto;
Beto ke kuzwa sabala mosi ya kiese na
kuvutuka na yinzo,
Bamvula mafunda kumi ya ntete. (Ya kele
kieleka.)

Bantu ya kuyituka samu na Nkumbu ya Yandi
mpe ba ke bokila bawu Kento ya Yandi ya
makwela. (Ya kieleka?)

Ata ti ba me losa bawu mpe ba me vweza bawu,
kilumbu mosi Mfumu ke kotisa
Bayina ba solaka na kati ya mwelo, (na exode)
mpe ya kele bangolo nionso samu na munu.

¹⁸³ Mu ke na kukumaka kiboba ya bakala. Mpe bilumbu ya munu bandaka na kuzimbana; mpe meso ya munu ke banda na kukuma mpimpa; mpe mwa tiya ya luzingu ya munu ke banda na kupela. Mu ke na boma ve na mpimpa. Samu ti mu zola kutuba yayi, na Paul, “Mu zaba Yandi na ngolo ya mvumbukulu ya Yandi.” Mu ke kipe ve kisika ba ke zika munu, kana mu ke dinda na kati ya mubu, to mu ke yokama na kati ya dibulu ya tiya, to ba ke kudia na nkosi, Yandi ke bokila nkumbu ya munu, mpe mu ke zonza. Amen!

Beto sambila.

¹⁸⁴ Kana ya kele na kati awa, to kuna na bansinga ya Nsangu yayi na yinsi ya muvimba, na mwa mabuundu ya beno mpe bimvuka mpe ba-couloir, mpe bisika nionso beno ke vwanda, kana ya kele na mosi, oh, beno bika mu ndimisa beno; beno bika mu bondila beno, mutindu longi ya Nsangu ya mbote; beno bika mu lombala beno, na Nkumbu ya Yesu Klisto; beno tina nganzi ya nsungi yayi ya yimbi! Beno sadila ve nzambi ya nsungi yayi ya yimbi.

Oh, mu zaba ti beno ke tuba, “Ya kele mbote. Ba kele mbote.” Kieleka, yinti ya kuvukisa. Beno lenda ve kuvukisa luzabu na Ndinga ya Nzambi.

Ya kele Ndinga yina fwana kwikila na lukwikilu, luzabu ve. Beno ke bakula Yawu ve; beno ke ndima Yawu. Beno ke tuba ti Ya kele kieleka, mpe na manima beno ke zinga na nzila ya Yawu. Yawu yina kaka Yandi ke lomba beno na kusala.

Kana ya kele na mosi awa na kati ya kimvuka ya beto, beto lenda ve kusala mbokolo na autel samu na kunata beno awa, samu ti ya kele ve na kisika; to kuna na zulu, na banzila ya allo-allo, kana ya kele na muntu mosi kuna yina zaba Yandi ve. Ve . . .

¹⁸⁵ Oh, bakento, mu me nganina beno na suka yayi, munu ve, mu me tanga kaka Ndinga. Bansuki ya nkufi, kulwata mwa bilele ya fioti, kulwata samu na kutalisaka nzutu, beno ke bakula ve ti mpeve yina . . . Beno lenda vwanda ya kuvedila, mpangi ya kento, ya luzolo, ntangu ya ke kwiza na nzutu ya beno, kasi na kati ya moyo ya beno beno ke mona ve yina kele na diboko ya beno?

Nzambi ke sala mwana ya Yandi ya kento kutalana sexy samu na kuvuna mwana ya Yandi mosi ya bakala, samu na kulula yandi, samu na kusala bawu nyonso zole kupesa mvutu samu na pité? Yandi ke sala yawu, mpangi ya kento? Beno yufula beno mosi kyuvu yina. Ve, ve na nzila ya ba-million kumi ya bakilometre. Beno tula yawu ve na Nzambi.

¹⁸⁶ Mpangi ya bakala, nzambi me pesa nge mpeve ya yinza yayi tii kuna nge lenda mona ve ti ya kele luvunu? Yandi me kufwa meso ya beno, na bankadulu ya dibuundu, denomination, credo, mpe nionso yina, ti beno lenda ve kumona ti Nzambi ke na kusiamisaka Ndinga ya Yandi mpe ke sala Yawu mutindu yina? Kisalu ya nge, kele na mfumu ya nge ya kisalu, kento ya nge, kele na bana ya nge, dibuundu ya nge, to kima mosi, me kabula beno na Ndinga ya Nzambi, yina kele yinto kaka ya Luzingu? Beno tina yawu, mpangi ya munu! Mu zola beno, na zola ya kinzambi. Mu ke zitisa ve mosi ya bampangi ya munu ya babakala na zulu ya beno, ata fyoti ve. Kana mu salaka yawu, mu ke lakisa luzitu na muntu nyonso. Mu ke tuba ve bima yayi samu beno kudasuka. Mu ke lakisa, ke tuba bima yayi samu ti yawu kele na kati ya Ndinga ya Nzambi. Mpe mutindu kisadi ya Nzambi, mpe zola ya Nzambi na kati ya ntima ya munu, mu ke tuba na beno bima yina samu beno kumona mpe beno bakula. Mu banza ti beno lenda zaba ve kana mu me tuba na beno ve. Beno ke tina yawu bubu yayi?

Ntangu yayi, na bisika nyonso na yinsi, beto kulumusa bayintu ya beto.

¹⁸⁷ Nzambi ya luzolo, yina me vwanda na ntwala ya munu kele bamuswale. Bantu kele na kimbevo; mu ke tentika maboko ya munu na zulu ya bawu, ti Nge ke belusa bawu.

188 Mpe mu ke na kivuvu, Mfumu, na nkokila yayi, ti ya ke vwanda na lukutakanu ya nene, ti Ngolo ya Nzambi ke vwanda awa, bidimbu ya nene mpe mambu ya ngitukulu. Mutindu beto kuwaka bandandu ya mbote na balukutakanu zole yayi ya nsuka, mutindu mfunu ve, beno me mona yina salamaka! Mu ke sambila, Nzambi ya luzolo, ti Nge ke pesa beto makabu zole ya bima na nkokila yayi. Mu ke sambila yawu na ntima ya bukieleka nyonso, Mfumu, samu ti ya kele zola ya munu samu na Nge mpe Ndinga ya Nge, mpe samu na bantu yayi. Pesa yawu, Nzambi ya luzolo.

189 Mpe kana na kati ya yinsi, to na kati awa ntangu yayi, ti ya kele na bayankaka yina kele ya kubela mpe kele bantu ya mpasi, mpe fwana kwenda na nkokila yayi, ya ke vwanda ve awa, to ya ke vwanda kuna na mabuundu to bisika kisika ba ke kutana bawu; Mu ke sambila ti Nge belusa bawu. Ntangu yayi, Mfumu, kasi samu na kubeluka ya kulutila nene! Kana Nge belusa nzutu ya bawu na cancer, na tuberculose, na pneumonie, kima mosi, bawu ke bela dyaka, kukondwa ntembe, kana bawu zinga mingi, samu ti nzutu ya bawu kele dyaka na yisi ya disumu, nsingulu. Kasi bika bawu kuzwa kubeluka ya kieleka ya Kinzambi, kubeluka ya moyo, yina ke sala kivangu ya malumu, kuluta lufwa na Luzingu, mpe kuna ke na kuingilaka na tabernacle ya ntama yayi samu na mpulusu ya nzutu na manima moyo ke kuzwa mpulusu. Pesa yawu, Mfumu.

190 Ti bawu tina ba-denomination ya bawu mpe ba-credo. Nzambi, kuna na kati ya ba-credo mpe ba-denomination yina mu me kutana na bampangi ya babakala ya kulutila mbote. Mpe, Nzambi, wapi mutindu mu lenda tuba yawu ti bawu ke mona, mpe ke bika bawu kumona Ndinga? Ya ke kwamisa munu. Kasi mu zaba, dyaka, ti Nge tubaka, “Muntu ve lenda kwiza,” ya lenda vwanda wapi mutindu ya mbote, wapi mutindu ya lembami, wapi mutindu ya kitoko, “kaka kana Tata ya Munu me bokila yandi ve. Mpe Tata ya Munu nionso me pesa Munu, bawu ke kwisa.” Mpe, Mfumu, mu ke na kutala pwelele kizitu ya munu mosi na kutuba Kieleka.

Mpe ve mutindu Paul tubaka, “Kukatula ve ngolo ya Ndinga ya Nzambi,” na kuvukisaka Yawu na ba-dogme ya ba-denomination, yinti ya kuvukisa na mbote mpe luzabu, mbote mpe yimbi; kasi kunata Yawu na ntima ya pwelele mpe Mpeve-Santu. Pesa yawu, Nzambi. Vulusa muntu nyonso.

191 Ntangu yayi na bayintu ya beto ya kukulumusa mpe meso ya beto ya kukangama. Mpe ve samu na munu. . . Mu lenda tuba yawu ve mutindu yayi, “Ya ke sala munu ata luswaswanu ve kana beno sala to ve.” Ya ke sala munu luswaswanu. Mu zola beno. Mpe mu banza ti beno ke banza ve samu ti mu fwana zonza ngolo. . . Mutindu Paul tubaka, “Mu ke zola kuvwanda ntangu yayi na beno, mpe mu ke soba nkadulu ya munu.” Ya wandaka ve samu ti yandi zolaka bawu ve; yandi zolaka bawu. Ve. . .

Mutindu Yesu zolaka kusemba bawu, mpe na manima kufwa samu na bawu. Beno me mona, “Tata, lemvočila bawu; bawu zaba ve yina bawu ke na kusalaka.” Na kubanza, muntu yina zola kuvwanda ya kusungama, mpe kumeka na kuvwanda ya kusungama, mpe na kumona dyabulu yango. . . Ya kele yandi yina mu ke teleminaka, ya kele kufwa meso ya bantu yayi.

¹⁹² Yinsi yayi zolaka kuya tiya na nkembo ya Nzambi, samu na kutala yina salamaka na yandi na kilumbu yayi ya nsuka, na nsuka yayi. Samu na yinki ba-reveil yayi ke bula ve bayinsi ya ntama? Yayi kele Simu ya Wesete awa, na lweka ya kulutila na wesete beno lenda kwenda. Ntangu yayi kibaka ya disumu basisaka makelele ya ngolo na yisi ya ntoto, mpe yandi ke na kudyama; bisika, mpe Los Angeles mpe Hollywood, ke na kudyama na ba-centimetele mingi na ngunga mosi, ya ke na mutindu ve ya kukangimisa yawu. Yinga, beto kele awa. Mingi ya ntangu nyonso beto ke kuwa mbokolo. Kana beno zaba ti. . .

Ntangu yayi, muntu ve ke tala. Kasi kana beno zaba, na ntima ya beno. . . Mu ke yufula beno. Mu lenda zaba ntima ya beno ve, kana Nzambi me monisa yawu ve. Kasi na ntima ya beno, kana beno lenda mona ti beno kele ve kisika beno fwana vwanda na Nzambi mpe Ndinga ya Yandi, na lukwikilu, beno zola kaka Yandi kutelemisa diboko ya beno, kutuba na Yandi, “Mfumumu, sadisa munu.” O Nzambi! Na ngaanda ya dibuundu yayi, ya kufuluka, ya kunata na lweka ya bibaka, na kati mpe na ngaanda, kieleka bankama ya maboko, ya lendaka vwanda ti bankama zole ya maboko me telama. Matondo na nge samu na bukieleka ya nge.

¹⁹³ Yesu ya luzolo, bika ve mosi ya bawu kuzimbana. Mutindu kisadi ya Nge, yina me telama na kati-kati ya luzingu mpe bantu ya kufwa, ke talisa bawu, na musapi, na Ndinga ya Nzambi. Mu lenda vulusa bawu ve, Mfumumu, kasi bawu zola kuzwa mpulusu. Mpe, Tata, mutindu mu me tubaka bambala mingi, mwini ke basikaka na suka; mpe na yina ya ke basika na ntoto, ba me tinda yawu na Nzambi samu na kuyelisa mbuma, samu na kusala madya ya yinza samu na kuzinga ya yinza. Kasi, O Nzambi, Nge tubaka, “Na bayina ke tala boma Nkumbu ya Yandi ke basika Mwini ya ludedomo na kubeluka na nzutu na mapapu ya Yandi.” Ti Mwini ya ludedomo, Ndinga ya Nzambi, kutelama na kati ya bantima ya bantu, mpe bakungenga yina ke belusaka ya lukwikilu na kati ya Ndinga yayi belusa muntu nyonso yina ke tumama ve na Ndinga, mpe kunata bawu na muvimba ya bana-babakala mpe bana-bakento ya Nzambi.

Bawu kele ya Nge, Mfumumu. Na Nkumbu ya Yesu Klisto, bawu nyonso zole awa mpe kuna na zulu, mu me lakisa bawu yina me telemisa maboko ya bawu na Nge samu na mpulusu ya myoyo ya bawu. Amen.

Kuna moyo ya munu ke kuzwa (Wapi kisika?
Na autel yayi.)

Kupema na manima. . . (Na lukwikilu mu ke
tala kuna kisika mu ke kwenda.)

Pene-pene ya kulunsi, (Ya kele kisika yina
Ndinga kele.) . . . kulunsi,

Vwanda nkembo ya munu ntangu nyonso;
Tii moyo ya munu me yangalala ke kuzwa
Kupema na manima ya nzadi.

Yesu, bumba munu. . . (Ya kele, yina ba me
koma na kulunsi na Yandi, mu zola kima mosi
ve ya yinza. "Bumba munu na kulunsi.")

Ya kele na Kiteko ya ntalu,
Ya kele ya mpamba na muntu nyonso, yinto ya
lunyakusu,

Ke basika na Yinto ya Calvaire.

Na kulunsi, na kulunsi,
Vwanda nkembo ya munu. . .

Beto telemisa maboko ya beto.

. . . ntangu nyonso;

Tii moyo ya munu me yangalala ke kuzwa
Kupema na manima ya nzadi.

¹⁹⁴ *Mu Lenda Kuwa Mvulusi Ya Munu Ke Na Kubokila.*

Beno tanda diboko mpe beno simba diboko ya muntu mosi,
mpe beno tuba, "Nzambi sakumuna nge, Muklisto."

Mu Lenda Kuwa Mvulusi Ya Munu Ke Na Kubokila. Beno ke
kuwa Mvwandulu ya Yandi? [Dibuundu me tuba, "Amen."—Mu.]

Beno yina kele kuna na bansinga ya allo-allo, beno nyonso
kupesana mbote mosi na yankaka kuna, mpe kutuba, "Nzambi
sakumuna nge, Muklisto."

¹⁹⁵ Beno zaba, ya kele na baptistère ya maza awa. Yandi ke na
kubakaka bantu yina ke na kulwata Nkumbu ya Yandi. Beno me
botamaka ve na Nkumbu ya Yesu Klisto samu na mulemvo ya
masumu ya beno, ya kele na kiziba ya maza, ya kele na ba-robe,
ya kele na muntu ya kutelama ya kukubama. Beno ke yambaka
beno, kana beno me ndima Yesu ya kieleka mutindu Mvulusi ya
beno mpe beno ke kwikila ti ya kele Kieleka.

¹⁹⁶ Beno bambuka moyo, ya vwandaka ata fioti ve na muntu
mosi na kati ya Biblia, to na ntangu mosi na ntwala ya kubongisa
ya dibuundu ya Katolika, me botamaka mutindu yankaka na
kati ya Nkumbu ya Yesu Klisto. Ya kele ve na kisika na kati ya
Masonuku, to disolo, ti muntu kubotamaka ntete, na Dibuundu
ya Nzambi ya moyo, na nkumbu ya bisalu ya "Tata, Mwana,
Mpeve-Santu." Ya kele dogme ya Katolika, mpe ya kele ve
malongi ya Biblia.

¹⁹⁷ Ba yufulaka yandi na nganga-Nzambi, mu yufulaka yandi yawu. Yandi tubaka, “Ya kele kieleka. Kasi beto kele dibuundu; beto lenda soba nyonso yina beto zola. Kieleka kele na kati ya dibuundu. Nzambi kele na kati ya dibuundu ya Yandi.”

¹⁹⁸ Mu tubaka, “Nzambi kele na kati ya Ndinga ya Yandi. Mpe kana dibuundu kele . . .” Mu tubaka, “Nzambi kele Ndinga. Mpe kana dibuundu kele ya kuswaswana na Ndinga, na yina mu ke kwikilaka ve na dibuundu.”

Mu ke bika ti konso ndinga ya muntu kuvwanda luvunu, kana ya kele nganga-Nzambi, pape, nyonso yina yandi lendaka vwanda, mpe Ndinga ya Nzambi kuvwanda kieleka.

Mpe Paul salaka ti muntu nyonso, ata mutindu ba botikaka yandi, kana ba botikaka yandi ve na Nkumbu ya Yesu Klisto, na kukwiza mpe kuzwa dyaka mbotika.

¹⁹⁹ Mpe na manima bayankaka kuzwaka yimeni Mpeve-Santu, Pierre tubaka, “Beto lenda yimina maza, na kumonaka ti bayayi me kuzwa Mpeve-Santu,” Actes 10:49, “na kumonaka ti bayayi kuzwaka Mpeve-Santu mutindu beto salaka na . . .” Mpe yandi pesaka bawu lutumu, “Ntete beno katuka kisika, ata ti beno kuzwaka Mpeve-Santu, beno kwiza mpe beno botama na Nkumbu ya Yesu Klisto.”

Samu ti, ba pesaka Pierre fungula ya Kimfumu, na kutubaka, “Nyonso yina beno ke kanga na ntoto, Mu ke kanga yawu na Mazulu.” Mpe yinki fungula ke sala? Ya ke zibula kima mosi, mansweki.

²⁰⁰ Mpe ntangu Yesu tubaka, “Kwenda, botika bawu na Nkumbu ya Tata, Mwana, Mpeve-Santu,” ya kuvwanda kuna samu na kufwa muntu ya kukondwa lukwikilu.

Beno tala mbote! Samu na yinki Pierre salaka yawu ve, mpova na mpova? Yandi zolaka sala yawu.

Kana muntu kele ya kubotama na bisalu, “Tata, Mwana, Mpeve-Santu,” ata mbala mosi ve ti yandi me kuzwaka mbotika ata fyoti ve; yandi kele na ata Nkumbu. *Tata* kele nkumbu ve, *Mwana* kele nkumbu ve, mpe *Mpeve-Santu* kele nkumbu ve. Mpeve-Santu kele yina Yawu kele; mutindu, mu kele muntu. Ya kele Mpeve-Santu.

Tata kele kusalu; mu kele tata. *Mwana* kele kusalu; mu kele mwana. *Muntu* kele kusalu; ya kele yina mu kele. Kasi nkumbu ya munu kele William Branham.

Mpe Nkumbu ya Tata, Mwana, Mpeve-Santu kele Nkumbu ya “Yesu Klisto.” Yesu tubaka, “Mu me kwiza na Nkumbu ya Tata ya Munu.” Yinki kele Nkumbu ya Tata? Mwana nyonso ke kwizaka na nkumbu ya tata ya yandi. Mpe Nkumbu ya Tata kele Yesu Klisto. Beno me mona? Beno me mona yina mu zola kutuba?

²⁰¹ Kana mu tubaka na beno na kukwenda kuna mpe kunata munu kima yina ke na kulanda awa, na nkumbu ya mfumu ya

mbanza. Bantu yikwa zaba nani mfumu ya mbanza kele? Nkundi ya munu ya mbote, Rich Vissing. Mbote, beno ke kwenda kuna ve mpe ke tuba “na nkumbu ya mfumu ya mbanza.” Beno ke tuba, “Na nkumbu ya Richard Vissing.” Beno bantu awa na Jeffersonville zaba nani yandi kele.

Mpe ya kele samu na yina Yandi tubaka, “Tata, Mwana, mpe Mpeve-Santu.” Na kati ya Yandi ke zinga Bunzambi, muvimba ya Bunzambi na nzutu. Yandi tubaka, “Beno botika bawu na Nkumbu ya Tata, Mwana, Mpeve-Santu.”

²⁰² Pierre vwandaka ya kutelama kuna na luzayikisu na yina Yandi tungaka Dibuundu, ya Nani Yandi vwandaka, yandi tubaka, “Beno balula ntima, mosi na mosi ya beno, mpe beno botama na Nkumbu ya Yesu Klisto.” Mpe ata mbala mosi ve . . . Bafungula balukaka na Mazulu mpe na zulu ya ntoto. “Ya kele ve na Nkumbu yankaka na yisi ya Mazulu yina pesamaka na kati-kati ya bantu na yina beno fwana kuzwa mpulusu.”

²⁰³ Samu na yinki beno ke botikaka na Nkumbu ya Yesu Klisto? Samu na mulemvo ya masumu. “Bayina nionso beno ke lemvo kila masumu ya bawu, ba ke lemvo kila bawu.” Beno me mona? Kasi kana beno banza ve ti yandi kele ya kulunga mpe ya kulunga na kuzwa mbotika, beno sala yawu ve. Samu, ntangu beno ke sala yawu, ya ke sala yawu, beno me mona. Beno me bakula yina mu zola kutuba?

Mu lenda kuwa Mvulusi ya munu (Ndinga)
kubokila, (Kubokila kuna na ntoni.)
Mu lenda . . .

“Nge ke kufwa na Munu ve, samu nge lenda telema na Munu?”

. . . Mvulusi ke bokila,
Mu lenda kuwa Mvulusi ya munu ke na
kubokila, (Yinki yinza ke tuba?)
“Baka kulunsi ya nge, mpe landa, landa . . .”

Ntangu yayi, kana beno vwandaka ve:

Kisika Yandi (Yandi kele Ndinga.) ke twadisa
munu mu . . . (Ya kele na baptistère.)
Kisika Yandi ke twadisa munu,
Kisika Yandi ke twadisa munu,
Mu ke kwenda na Yandi, na Yandi tii na nsuka.

Beto kulumusa bayintu ya beto.

²⁰⁴ Nzambi ya luzolo, baptistère me kubama. Ntangu yayi zonga na bantima, Mfumu. Ti bawu kuwa Klisto, Ndinga, kubokila bawu, mpe kukwenda na Yandi nzila nyonso.

“Mu ke kwenda na Yandi na disamba. Mu ke kwenda na Yandi na baptistère. Mu ke baka Nkumbu ya Yandi. Mu zola vwanda mosi ya bantu yina Yandi ke na kubokila Nkumbu ya Yandi. Mu ke kwikila Ndinga ya Yandi. Mu ke landa. Mu

ke tambula ve na yinza. Mu ke vwanda Kento ya makwela ya kieleka, yina me kuzwa nsilulu. Mu ke bika ve kitini mosi ya Ndinga ya Yandi. Konso lombilu, mu ke vwanda Kento ya makwela ya kieleka, ya kieleka. Nyonso yina Yandi ke pesa munu balombilu ya kusala, ya ke sala munu.

“Kana Bakala ya munu ke kwisa zola ti mu yambula bansuki ya munu kukula, mu ke sala yawu. Kana Yandi zola ti mu katula maquillage yayi, mu ke sala yawu. Kana Yandi zola . . . Yandi ke tuba na munu ti ya kele mpeve ya yimbi, muntu ya yimbi mu ke sakana na yawu, na bilele yayi ya sexy; Mu ke sala yawu, mu ke katula yawu. Mu ke kipe ve yina muntu yankaka ke tuba, mu ke katula yawu.

“Yandi zola ti mu basika na kimvuka yina mu kele, na bantu ya kukondwa lukwikilu, mu ke sala yawu; ata ti mu ke sala dimpa ya munu, to nionso yina ya kele. Yandi silaka ti Yandi ke bika munu ve to ke yambula munu ve. Mu ke—mu ke sala yawu. Mu ke kwenda na Yandi nzila nyonso. Yandi zola ti mu baka mbotika na Nkumbu ya Yandi, mu ke sala yawu.”

Mfumu, Nge silaka yawu na Ndinga ya Nge awa, ya kele yina Nge zolaka. Bika ti muntu nyonso kumona yawu, Mfumu, mpe na lembami, na kulemvuka nyonso na Yawu. Na Nkumbu ya Yesu mu ke sambila. Amen.

²⁰⁵ Beno kele ya Nzambi. Ti Nzambi baka mwa bampova yina ba me buka mpe kukumisa yawu kieleka na beno, ya kele kisambu ya munu ya kieleka.

Baptistère ke kubama. Muntu nyonso yina zola kukwiza, bawu kele. . . Mulongi ke zabisa yawu mwa ntangu fyoti na ntwala. Muntu nyonso yina me balula ntima mpe zola kuzwa mbotika, na kusadilaka Nkumbu ya Yesu Klisto, beno kwiza kaka na ntwala. Bima nionso me kubama. “Bima nionso me kubama.” Nyonso yina beto lenda sala samu na kusadisa beno na kuzinga samu na Nzambi, beto kele awa samu na kusala yawu. Nzambi sakumuna beno.

²⁰⁶ Ntangu yayi beto telama. Ntangu yayi mwa nkunga ya beto, *mu Zola Yandi*. “Mu zola Yandi samu Yandi zolaka munu ntete.” Beto yimba yawu, muntu nyonso ntangu yayi.

Mu zola Yandi, . . .

Beto telemisa maboko ya beto mutindu beto ke yimba yawu.

. . . Mu zola Yandi

Samu Yandi zolaka munu ntete


Mpe futaka mpulusu ya munu

Na zulu ya yinti ya Calvaire.

Na bayintu ya beto mpe bantima ya beto ya kukulumusa ntangu yayi, beto yimba yawu na kati ya yinwa samu na Yandi. [Mpangi Branham ke yimba na kati ya yinwa *Mu Zola Yandi—Mu*.]

Mu zola Yandi.

O Nzambi, Tata ya beto, vwanda na kyadi ya beto bivangu ya mputu, Mfumu. Pesa beto ngolo samu na ksalu yina kele na ntwala. Sadisa munu, O Nzambi, sadisa munu! Mu ke na kuwa ti kima mosi me vwanda awa, Tata. Sadisa munu, O Nzambi, na kuzaba Kieleka. Sakumuna bantu yayi, Nzambi ya luzolo. Twadisa bawu, mu ke sambila, na Nkumbu ya Yesu.

²⁰⁷ Ntangu yayi na yina beto ke kulumusa bayintu ya beto, mu ke lombana na pasteur awa, Mpangi Neville, mpangi ya beto ya ntalu, beno telama awa ntangu yayi mpe beno tuba yina yandi ke sala, samu na kana . . . samu na mbotika. Mu lendaka zabisa yawu. Mu banza ti baptistère kele ya kuzibuka, ata mutindu yina. 

65-0801M Nzambi Ya Nsungi Yayi Ya Yimbi
Branham Tabernacle
Jeffersonville, Indiana U.S.A.

KIKONGO-KITUBA

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org